

شريف أسعد

#اعترافات_جادة

الطبعة
11



مكتبة الحبر الإلكتروني
مكتبة العرب الحصرية

#اعترافات_جامدة

"التلاتيني"

شريف أسعد



	dartoya2015@gmail.com
	Dar.toya دار توبا للنشر و التوزيع
	@Dar_Toya
	Dar.toya
	(+2) 01140899887 - (+2) 01000706014
	٢١٣ ش عبدالوهاب عبد اللطيف - كوبري القبة - القاهرة - مصر

جميع حقوق الطبع والنشر محفوظة للدار

#اعترافات_جامدة

"التلاتيني"

شريف أسعد

دار تويا للنشر والتوزيع

إهداء

الابتسامة.. صناعة.. لا يجيد استخراجها ثم معالجتها ثم تكوينها ثم رسمها على الوجوه إلا
محترف...

إلى كل من ساهم باحترافية في وضع ابتسامة على شفاه لا يبتغي من ورائها إلا وجه الله
سبحانه وتعالى...

أهديكم هذا الكتاب.
أولكم "أبي" رحمة الله عليه

مقدمة

هذا الكتاب ليس مجرد كلمات وجمل تراصت لكي تدخل السرور والبهجة على قلب من يقرأها.. على الرغم من أن هذا في حد ذاته إنجازا يستحق عمل تمثال من البرونز يوضع مكان تمثال طلعت حرب في وسط البلد..

ولكن.. تمت صياغة هذه المواقف وسردها في إطار الأسرة والاقارب والأصدقاء.. لتي نتذكر معا أسرنا الصغيرة.. في خضم "هرس" الحياة لكل واحد فينا، كأنا "كيلو طماطم" من أجل الصلصة...

تنكروا أسركم.. وأقاربكم.. وأصدقائكم.. عودوا لصلة الجميع مرة أخرى كما كنا في الماضي.. وفي هذا السبيل.. يؤكد الكاتب أنه ليس مسئولا بأي شكل من الأشكال عن حالات الضحك الهيستيري التي تنتاب القارئ.. ويعلن خلو مسئوليته عن علاج أي نوع من أنواع الكسور الناتجة عن سقوط القارئ من فوق أريكة أو سرير أو مكتب ضاحكا.. كما يتمنى ألا تصله تلك العبارات والتعليقات التي لا تنفك تطارده في كل مكان على شاكلة.. "أنا لو اطلقت حبيقي بسببك.. أو.. "لو اترفدت حتبقى انت السبب".. أو "الناس بتتفرج عليا في المواصلات وبتقول عليا مجنون".. ومثل تلك العبارات التي لن يتحمل الكاتب مسئوليتها على الإطلاق...

ألا هل بلغت؟.. اللهم فأشهد..

شريف أسعد

تقديم

حقبة الثمانينيات والتسعينيات.. تلك الحقبة الماسية التي كونت لجيل كامل ذكريات متشابهة إلى حد كبير...

نحن عائلة مصرية بسيطة كالسواد الأعظم من العائلات المصرية.. أسرة مكونة من خمسة أفراد يقودهم الأب المصري الصميم "أبأبا".. وترعاهم الأم الرؤوم لكل فرد في مصر "أمأما".. وتتكون الذرية من الأشقاء الثلاثة.. أبطال المواقف والحكايات ومخزن ذكريات اليوم والغد في كل بيوت مصر على مر الزمان..

كثيراً ما نشتاق إلى لحظات وسط الأب والأم والأخوة بلا التزامات وبدون أعباء الحياة اليومية.. كم منا يتمنى يوماً واحداً بدون محمول أو مستقبل رقمي "ريسيفر".. أو مناقشة سياسية تنتهي بـ "ست غرز فوق الحاجب"...

اليوم وفي هذا الكتاب.. نسافر إلى ذكرياتنا بشكل ساخر بسيط عبر مواقف عشتها.. وعاشها الكثير منا بشكل أو بآخر..

اليوم نتحدث عن مواقفنا التي خضناها مع أصدقاء الطفولة والشباب.. المواقف التي عايشناها مع عائلاتنا الحبيبة.. المواقف التي تترك في داخل كل شخص منا ما يجعله يبتسم حين يتذكرها..

اليوم أذكركم بكل أب وكل أم وكل أخ لكم..

تعالوا أقص عليكم قصصي!!!!

الاعتراف الأول

البداية لازم تكون واضحة.. أنا مش حاقدر أدعي إني سوبر مان.. وإني راجل مختلف عن كل الرجالة.. لأن الموضوع أبسط من كده..

انا راجل طبيعي في حاجات.. ومش طبيعي في حاجات تانية..

الوقف ده.. حيثبث لكم بالدليل القاطع إني راجل مش طبيعي في "الحاجات التانية"..

في ليلة من تلك الليالي اللي الواحد بيبقى حاسس فيها إن فيه مشكلة أكيد تحصل والعياذ بالله..

كنت قاعد باتفرج على فيلم رعب في التلفزيون.. اليلة طبعاً سكون تام.. مفيش أي صوت غير صوت الساعة اللي عقاربها بتقولك "الساعة الواحدة بعد منتصف الليل يا خفيف وده مش وقت مناسب إنك تتفرج حتى على فيلم كارتون"..

للتوضيح فقط.. أنا كشخص مش بحب أفلام الرعب.. ولا بطبقها في الأساس.. يعني اقدر أعترف لأي حد فيكم من الآخر إن أكثر حاجة.. أكثر حاجة مرعبة بالنسبة لي ممكن تكون مشهد "توم" أما بيجرى ورا "جيري".. وقبل ما "جيري" يوصل للفتحة اللي في الحيطه.. بكون أنا بعيد عنكم اتصفيت من الخضة..

أفتكر من كام سنة اما دخلت فيلم "ذا رينج".. قعدت تقريبا حوالي تسع أيام بخش الحمام وأسيب الباب مفتوح وموارب.. عشان لو حصل حاجة انفد بجلدى.. مش مهم خالص حد يشوفنى في

الحمام.. لأن الأهم بكثير.. إنى ما اشوفش حاجة في الحمام.. أو حتى اتخيل حاجة في الحمام.. ده
حيكون سبب كافى إنى اتسرسب في البلاعة اللي في الأرضية زي مية المسيح..

فما بال سيادتكم بقى بفيلم رعب من عينة الفيلم المأسوف على عمره "اكسسيروسيزم اوف
مارى زفته روز"؟؟؟؟.. أو مثلاً فيلم من سلسله أفلام "بارانورمال أنشطتى".....!!!!

المهم في الموضوع ده مش إن الانسان تبقى عنده الشجاعة إنه يقعد يتفرج ويقول أنا جدع..
لا خالص على فكرة.. المهم إن حقيقي الإنسان ده بيكون عنده قدرات عمره ما بيتعرف عليها ولا
بيكتشفها غير في المواقف الصعبة اللي زي دي..

يعني مثلاً.. أما تبقى قاعد في الضلمة بتتفرج على الفيلم المهبب المرعب ده.. لوحذك..
بطولك.. ومفيش حد جنبك تقفش فيه أو تستخبي في جيبه لو حصل حاجة..

وللعلم برضو.. القعاد في الضلمة دي مش شجاعة ولا شدة بأس يعني.. ولا أي كلام من
الهرى اللي ممكن تسمعه من الشباب.. لا لا لا لا.. خالص حضرتك.. القعدة في الضلمة دي سببها
الوحيد إن مراتي طفت النور وهى داخلة تنام وأنا مش قادر أحرك رجلي وانزل من على الكنبه
وافتح النور من كتر الفزع اللي طالع على الشاشة.. طبعاً أنا قعدت أنه عليها كتير عشان تيجى
تاخذنى من الصالة.. إنما هى كانت في مرحلة غز الملاك اللي بيدم إيده في طبق الرز يتل بتاعها
في الحلم.. وكل استغاثاتى راحت هباء..

للأسف بتبقى قاعد انت بقى وقتها.. بتتفرج غصب عنك وتقربيا عضم ركبك في سقف بوقك
من التفوق.. وشعر راسك واقف وقفة الدائرى الساعة ستة ونص مساء يوم الاثنين.. وانت متأكد
تماماً.. إن الليلة مش حتعدى على خير..

وبعدين طبعاً.. هوووووب.. تلاقي مجموعه الكتب اللي انت راصصها جنبك في المكتبة
تتزلق وتقع..

في بعض الأفلام الأجنبية المرعبة.. اللي بتحتاج إلى أدوار بطولة خارقة.. البطل الشرس
المغوار المقتول العضلات.. بيقوم يشوف الكتب اتوكست واتزلقت ليه.. وإزاي أساساً تتزلق
وهو قاعد؟؟.. ده اسمه إسفاف.. وغالباً طبعاً زي ما بتتابعوا إنتو في الأفلام دي.. الموضوع بينتهي

بأن العفاريت الزرق والخضر والحرر بيلعبوا في البطل المغوار ده البخت.. ويعملوا كولو بامية
كمان على مين اللي حيلعب فيه البخت الأول.. والبطل المغوار اللي كان عامل فيها الممثل الرسمي
لسباع غرب أفريقيا.. بيتحول بعد خمس ثواني فقط إلى "فتحية بتاعة الولاات".. بعد ما تناوب
الشارع كله الاعتداء عليها وهى عمالة تصوت بالحياني..

يا ختالليiiiiiiiiii

أنا بقى الحمد لله أذكى من كده بكثير.. بطل مغوار إيه وهري إيه بس؟؟؟..

أنا اكتشفت قدراتي الخارقة في الرحلة دي.. بمجرد وقوع الكتب اللي في المكتبة..

قبل ما الكتب تلمس الأرض أصلاً.. اكتشفت إنى ممكن أقطع المسافة من شلثة الكنية اللي
كنت قاعد عليها واتبلت.. لمخدة السرير اللي نائمة عليها مراتي في أقل من ثانية إلا ربع..

واكتشفت كمان إنى ممكن بمنتهى السهولة واليسر أقطع المسافة دي اللي تقريبا حوالي 14
متر في خطوتين.. خطوة من الكنية للطريقة.. والخطوة الثانية من الطريقة للسريير..

تقريبا.. النظريات الفيزيائية ممكن تأكد على إنى لو كنت استخدمت دراعاى وررفت عل
شكل بطة هربانة من قصاد عربية ربع نقل حتهرسها.. كنت أكيد حطير وارفر في الفضا فترة
مش بطالة..

إنما للأسف الشديد دراعاى الاتنين كانوا في حالة شلل تام من الخضة والفرع..

طبعا لازم أعترف لكم إن كل محاولات مراتي إنى أشيل رجلي من فوق شعرها اللي على
المخدة لمدة ربع ساعة بانت بالفشل تماما.. وخصوصا وأنا عمال أسقف إن فيه عفريت برة في
الصالة..

طبعا برضو كل محاولات مراتي لاقتناعي إنى أخرج أظفي التليفزيون اللي شغال برة كتب
لها الفشل أكثر من فشل انتزاع شعرها من تحت رجلي.. وكان أسهل لها وأسرع وأضمن تبعث
تجيب البواب يظفي التليفزيون.. لانى حلفت بشرف خالتي حموءة ما أنا متحرك من فوق المخدة
غير اما يبعثوا يجيبولي أمي أستخبى في حضنها..

طبعاً كل محاولات مراتي انها تقنعنى ليلتها اتوكس وأنام ناحية باب الأوضة برضو كان من نصيبها الفشل المروع.. لأن العفريت طبعاً بياكل أول واحد جنب الباب أول ما يخش.. ودى حاجة معروفة مش محتاجة فكاكة يعنى.. أنا بقى حطع ناصح وحنام جنب الحيطه وحط البطانية تحت رجلي.. ومخدة فوق دماغى احتياطى إن شالله أموت مخنوق حتى..

طبعاً كل محاولات مراتي إنها تغير قناة سبببس تون لمدة شهرين.. فشلت فشل ذريع لأنى كنت مخبي الريموت تحت شلثة الكنبه اللي عليها اثار بقعة المعركة السابقة.. ولو كنت اتفرجت وقتها على سي بي سي سفرة حتى كان جالي شلل توساعي من الرعب.. كفاية شنب الشيف الشر بينى...

طبعاً كل محاولات مراتي إنني أتكرم وأتفضل وأتنازل وأطلع الشقة وأنا راجع من الشغل من غير ما تبقى باصة لي من بير السلم فشلت بجدارة واستحقاق برضو.. والمرة اللي كانت مشغولة فيها وايديها مليانة صلصة ومعرفتش تطلع تبصلي عشان أطلع.. بعنتلي الواد ابني يجيبني من الدور الأرضي بحجة إنني معايا كيس تقيل مليون مناديل..

لا لا لا لا لا تفزعی

#سحقا للافلام العرب

#الجبن كنز لا يفنى

#قفزات الفتى الطائر

الاعتراف الثاني

طول عمري ما بخافش من الكلاب.. ومن زمان على فكرة.. أبابا الله يرحمه قالى أما أي كلب بلدي مسلط في الشارع يبجي ناحيتك.. إعمل نفسك بتجيب طوبة من الأرض أو انزل اربط رباط الجزمة "قال يعني هو مفكوك بقي وبتاع".. وارفع إيدك.. حتلاقي الكب البلدى ده قلب قطه وجرى صاروخ واختفى من قصادك.. وديله ما بين رجلية..

أما كلب بلدى صحيح!!!

وفعلاً.. كنت بنفذ دايماً وصية "أبابا" الله يرحمه كل ما الاقي كلب عامل فيها نمر أرقط بنغالي على مطلع كوبري المشاة مثلاً.. أو تمساح أمازونى مغطى بحراشيف خضرا على ناصية شارع قاعد بيتشمس..

لحد ما جه يوم إسود ومهيب ما طلعتلوش شمس..

وكنت لسة حلو كده تمناشر سنة وراكب العجلة ورا واحد صاحبي عزيز عليا جداً.. اسمه "حمادة مطافي"..

طبعا إحنا كنا في وقت العصارى ده نحب نتمشى بالعجل في الشوارع الهادية بتاعة المعادي.. وكنت دايماً مؤدي بارع لدور "شادية" في فيلم معبودة الجماهير أما كانت راكبة ورا عبدالحليم حافظ.. وأفضل أغنى "في السكة في السكة في السكة" بتاعة محمد فؤاد ساعتها..

كنا ماشيين بالعجلة في شارع من شوارع المعادى اللي جنب البيت عندنا.. ومعديين من عند فيلا رجل أعمال كبير جداً.. كان ساعتها وزير..

كنا طول عمرنا أنا وجيراني وأصحابي بنعدي من جنب الفيلا دي.. وكان فيها كلب حراسة "وولف" من بتوع زمان أصيل ومربرب كده ومفترس حلو أعتقد كان ثلاث ارباع جسمه سنان وأنياب والربع الباقي مخالب.. كان مربوط بسلسلة حديد جنزير دايم من اللي بيسحبوا بيها المقاطير دي.. لأنه كلب عفي ومحتاج يتثبت كويس.. بدل ما ياكل سكان الشارع غلط والا حاجة..

قعدنا سنين من حياته وحياتنا نعدي عليه.. وهو مربوط.. ولأنه مربوط.. كنا دايم بنعامله على إنه فرخة شامورطى.. أو معزة محلوقة لا حول لها ولا قوة..

نحدفه بالطوب مثلا.. وهو بقى يا عيني..

هاو هاو هاو هاو هاو

نعمله اشارات استفزاز وهمية.. وهو حيتجنن..

هاو هاو هاو هاو هاو

ننام قصاد الجراش بالعرض ونرفع رجلينا لفوق دليل على عدم الخوف منه ومحاولة مننا إننا نجيبه بوهاق من الغيظ.. وهو طبعاً..

هاو هاو هاو هاو هاو

الخلاصة.. الكلب كان حيتجنن لمدة سبع سنين تقريبا..

وفي اليوم الأزرق ده اللي بيحكيلكم عليه ده.. عدينا بالعجلة ض قصاد الجراش اللي مربوط فيه الكلب.. لقيناه قاعد عادي جدا.. زي كل مرة بنعدي فيها.. طبعاً صاحبي سايق العجلة.. وأنا بحكم العادة ليس إلا.. بصيت للكلب.. وهاتك يا رقص رقصات أقل ما يقال عنها إنها مثيرة ساخنة.. اقتبست منها شاكيراً بعد كده رقصاتها في أغنية "وين ايفر".. ما كانش ناقصلي إلا إني أعمل "استريبتيز" للكلب.. وكل ده من أجل إغاضته فقط لا غير.. وعشان اسمعه وهو بيقول..

هاو هاو هاو هاو هاو..

وحشني..

عمري في حياتي ما حانسى وش الكلب ساعتها.. طول عمري.. أكاد أجزم وأقسم.. إن الكلب تقريبا ظهرت على وشه "ابتسامة" سعادة

ابتسامه انتقام.. ثم.. انطلق..

أنا كنت راكب على العجلة ورا "حمادة مطافى".. قلت زي كل مرة.. عادي يعني الكلب
 حيجري لحد ما السلسلة تجيبه من قفا أمه ويفضل يشب ويلب لحد ما صوته يتحاش من النرفزة..
 عادي.. زي كل مرة.. وأنا حا افضل أضحك عليه لحد ما اتقلب من فوق العجلة من كتر الضحك..

إنما المرة دي.. الكلب جرى لحد طول السلسلة اللي احنا متعودين عليه.. وبعدين.. جري زيادة حتة عن ما كان بيجري كل مرة.. وبعدين ابتديت ألاحظ انه تقريبا كده والله أعلم السلسلة طولت..

یا ختاااااااااااااااااااای..

دا مفیش سلسله..

یا ختااااااااااااای..

دا الكلب سايب من غير سلسلة خالص..

یا ختااااااااااااااای..

لا بالیبی، یا ختااااااااااااااااای..

وعنها..

انطلق الكلب وهو حالف بديل امه اللي مدفونة في مقابر الكلاب في ألمانيا الشرقية.. إنه حينئذ للسبعة العجاف اللي قضاهم مذلول ذل الإبل وهو مربوط..

حمادة أخذ باله بعد ما صرخت وأنا ماسك "كلاويه" في ايديا وأنا قاعد على العجلة.. أخذ باله ان الكلب خرج من الجراج وابتدى يجري كأنه كان عامل استرتنشات فى الجراش ومستعد من

تبديلة يمين وتبديلة شمال.. إنما كانت المسافة برضو بتقرب.. والكلب عينه بتطق شرار..
وسنانه بتلمع وراء ابتسامة الانتقام.. أنا كنت باصص ورايا عشان أتأكد إنه مش بيقترب.. إنما كان
بيقترب..

كنت شايف فى نظرات عنيه عبارة "هنا يرقد شريف أسعد"..

يحكى فيما بعد إن فيه ناس قالت إنها سمعت كسري لحاجز الصوت من الجري..

وفيه ناس افكرتني "مصاص دماء" من كثر السرعة..

فيه ناس حلفت إني كنت باخد الخمسين متر في ثلاث خطوات..

وفيه ناس أكدت إن الكلب نفسه ارتفعت حواجبه اندهاشا من سرعتي في الجري.. ووقف

يسقف

طبعاً الحمد لله.. أنا كنت أسرع من العجلة بكتييير ساعتها.. ونفدت بعمرى..

والحمد لله إني ما حاولت أنفذ وصية "أبأبا" في اللحظة دي.. لأن ده مش كلب "خرمنط" بلدي عقيم.. وإلا كانوا رجعوا اللي اتبقى منى لأبأبا في كوباية بلاستيك.. وبعدين الكلب كان شكله مكشش ناوى يتراجع حتى ولو كنت حذفه بإزارة مولوتوف أو قنبلة يدوية.. أو حتى لو كان في إيدي مسدس.. وخصوصا بعد سنوات من الإهانة والمعايرة والسباب بالكلية الأم بسبب وبدون..

أفندم؟ نعم؟؟ اه... صاحبي أبو عجلة؟؟ تقصدوا حمادة مطافي!!

لا لا بسبب الحمد لله..

حمادة ما اتبناش منه حاجة غير بلف العجلة..

#اللص_والكلاب

#اجرى_اجرى_اجرى

#سلام_يا_صاحبى

الاعتراف الثالث

مين فينا ما راحش فرح ما يعرفش فيه حد خالص؟!.. وحس وقتها إنه طالع كده زي البتاعة
في البتاع؟؟؟ ولا له أي لازمة!!

أكيد كلنا عدى علينا بشكل أو بآخر موقف اتجررنا فيه.. اتسالنا واتحطينا واتحشرنا في
بدل وفساتين "سواريه".. وتم دفسنا في عربيات ضيقة جنب بعض.. وتم اقتيادنا إلى صالات أفراح
كالعبيد إلى أمريكا الشمالية.. واترمينا في احضان ناس ما نعرفهمش ولا عمرنا شفناهم واتباسنا
منهم بوس غير طبيعي بلا وعي.. وشدولنا وشنا عشان نبان بنضحك في الصور واحنا أصلا عندنا
مغص.. واتهددنا من أهالينا بأننا حننام من غير عشا لو ما اتنيلناش قمنا جبنا أكل من مجمع التحرير
الساعة اتناشر الضهر اللي بيطلقوا عليه ساعتها بالكذب.. "البوفيه"!!

أبابا.. كان راجل يحب الأصول قوي ويفهم فيها بشكل يضايق الشباب اللي زينا.. كان دائما
يعرف في الواجب.. زي السواد الأعظم من أباهاتنا زمان..4

في يوم.. من تلك الأيام التي تتسم بداياتها بالإغمقاق في كتاب حياتك وانت بتبقى عارفها
كويس من أولها.. من ساعة ما بتفتح عينيك الصبح..

دخل "أبابا" من الشغل معلنا..

"يا جماعة.. عندنا النهاردة فرح"..

وتم تحديد الزمان والمكان وكله ابتدى يجهز نفسه صاغرا للامتثال لأوامر الحاج "الله
يرحمه" التي تعد مناقشتها نوع من أنواع قلة الرباية وأنا معرفتش أربيكم..

منطلون من هنا.. على قميص من هناك.. المكوّة من عندك يا ابني.. سيّب يا حبيبي الحزام بتاعي.. لو لقيتلى في درج الشراب فردتين معاك شبه بعض تبقى كفاءة.. هات يا أخى كرفاة من دولاب أبابا..

"فبين الكر فقات يا حيو اناااااااات؟؟؟"

ما هو احنا ثلاث صبيان بقى في عين العدو.. أبابا كان بيخبي مننا الشرابات بتاعته في درج التلاجة من الزهق.. ومكانش بيلاقيهم برضو..

الخلاصة.. استعد الجميع.. واتجهت قافلة المهنيين إلى الفرح..

أبأبا كان رايح يجمال زميل له في الشغل.. وكان الفرع في بيت زميله ده.. لا في دار ولا فندق ولا بتاع.. مكان أول مرة يروحه أبأبا.. ووصلنا إلى الشارع.. وشفنا اللمض الملونة والكهارب اللى مزوقة البيت.. كان فرح في بيت بسيط جميل.. وبدأنا نركن العربية..

وأخذنا التوراة!!

ودي كانت أول حالة يسجلها التاريخ الحديث إن عيلة تروح فرح بتورثة.. كانت عيلتنا الحمد لله.. الكلام ده متسجل في موسوعة جينيس للأفعال القياسية اللي تفضح الحمد لله جنبنا إلى جنب مع عبارة "أبابا" الخالدة..

- خلى بالك من التورته يا حيوان لتقع

- حاضر أبابا.. فى عينيا

شيلنا التورته الملكية.. وطلعنا الدور الرابع.. ودخلنا الشقة واستقبلنا الناس أصحاب الفرح استقبال الفاتحين طبعاً.. ويا أهلاً.. ويا سهلاً.. ويا تلتوميت مرحباً.. والحمد لله.. سلمت التورته لأحد الناس اللي معدية ولايسة بدلة.. وخدت بيها إيصال امانة إنها سليمة كمان..

وبدأنا مراسم الاحتفال.. ودخلنا أنا وإخواتي بقى ما قولاكش.. قلبنا الفرح درمغة.. ورقصنا مع العروس.. وانتطاطنا مع العريس.. وهبيصة طبعاً.. الفرح اتقلب مع وصولنا بالفعل.. أبابا طول

عمره يقول علينا عيلة تفضح.. بضرب بعيني بعد ساعة ونص من الرقص الهيستيري أنا واخوتي..
لقيت أبابا بيشاورلى بما معناه..

"تعالى عاوزك بسرعة يا حيوان"

انسحبت من وسط الرقصة بهدوء.. وأنا سايب ورايا أسدين: اخواتى نازلين رقص لحد ما
كانوا حيهدوا السقف عل دماغ الناس اللي تحت.. واتجهت ناحية "أبابا"..

- خير أبابا؟؟

- أنا مش شايف فين أبو العروسة..

- طب وايه المشكلة أبابا.. عادى.. فيها إيه مش فاهم..؟؟

- أنا مش عارف ولا واحد من المعازيم.. غير أبو العروسة.. ومش لاقيه

- أبابا دلوقتى يظهر.. تلاقيه بيعمل حاجة كده والا كدة.. فرح بقى عقبال ولادك أبابا

- اخرس يا حيوان.. أنا حاسس إن مفيش ولا واحد من الزملاء في الشغل موجود في الفرح
والموضوع ده قالفنى.. أنا شامم ريحة مش تمام

- آآآه في دي عندك حق.. البوفيه بتاعهم ريحته تقرف القنفذ الموريتانى فعلا..

- اخرس يا حيوان.. بوفيه ايه؟؟؟ أنا أقصد اقول إني قلقان جدا..

امممم..؟؟ طب عاوز إيه أبابا خلصني أغنية شيك شاك شوك قربت تخلص.. والأغنية اللي
جاية بتاعة حكيم "أعمل إيه ولا إيه والا إيه" وأنا مستنيها من أول الفرح عشان متمرن عليها
كويس.

- بس يا حيوان اخرس.. روح كده اسأل على أبو العروسة.. شوفو فين

- أبابا أنا مالى؟؟؟ أسأل أعمل إيه يعنى..؟؟

- ياللا يا حيوان.. رووووح.. "مصحوبا بزغد في الكتف"

- حاطر أبابا..

وبالفعل.. اتجهت منسالا بإنسيابية كراقص الباليه وسط الزحام.. متجها إلى حيث بدا وظهر
مجموعة من الناس "المهمين" .. وسألت..

- هو عمو "محسن" والد العروسة فين؟؟

واحد منهم رد..

- أنا أبو العروسة يا حبيبي.. بس أنا ما اسميش عمو "محسن" .. أنا إسمى عمو "سالم"

طبعاً.. أنا بكل فتاكة.. وفكاكة.. عملت نفسى اتلخبطت في الاسم.. وسورى قوى يا عمو..
معلش أصل الرقص فرهضنى.. وسألت على مكان الحمام لإنى محتاج أعمل بيبى ضرورى يا
عمو من كتر شربات الورد اللي سفينه وشكلي عندى بواذر إسهال كمان.. وبعدين طبعاً رجعت لبابا
عشان أبشره بالخبر الأسود..

أبابا.. احنا تقريبا كده والله اعلم.. في فرح غلط

- يا دي المصيبة.. إنت كده ما بيجيش من وراك غير المصايب.. حيوان.. بومة

- لا حدد بقى.. حيوان والا بومة؟؟ أنا مالى أنا أبابا؟؟؟؟

- بس يا حيوان..

- حاطر أبابا.

كان فات حوالي ساعتين ونص بالفعل.. وأبابا.. توجه إلى صاحب الفرع.. وبطريقته اللطيفة
الرائعة التي لا تخلو من اللباقة.. فهم الراجل إنه جه فرح غلط.. والراجل أكد له فعلاً بابتسامة
ترحاب ومودة.. إن بالفعل فيه فرح تانى بعد أربع بيوت على نفس الصف في آخر الشارع.. وان
أكيد حصل لخبطة..

وحلف علينا ما نمشى غير لما البوفيه يفتح.. وأبابا اعتذرله بكل ذوق..

ونزلنا من الدور الرابع.. ومنظرنا عبارة عن مجموعة من الغيارات على جبل غسيل من غير مشابك.. مبلولين..

وصلنا لحد العربية.. وبعدين.. هوبال.. أبابا وقف.. بصلي.. وسألني باندهاش مدهش الصراحة..

- فين التورته يا حيوان؟؟

- نعم؟؟؟؟؟؟؟؟؟؟

- إطلع هات التورته...

- بس أبابا بدل ما احدف نفس قصاد عربية..

- إمشى يا حيوان بسرعة.. إنت عاوزنا نخش على الرجل بإيدنا فاضية؟؟

وبين مناقشات لمدة عشر دقائق.. وحلفان على أمي بالطلاق لأجيب التورته.. ورمي اخواتي في دار الأحداث.. ومحاولاتي المستميتة استعطافه واستماله قلبه إنه يرحمني من الموقف ده اللي حكون فيه شبه العرسة اللي بان على بطنها فضيحة الحمل.. اضطرت صاغرا في النهاية إلى إني أقول الجملة الخالدة.. حاطر أبابا

وبدأت رحلة الصعود مرة ثانية عشان الزفتة.. أقصد التورته

وكان في استقبالي عمو "سالم".. خلاص بقي.. دا بقى عشرة أصله..

وطبعا بمظهر يجمع ما بين القطنيل والجيل وأبو دكة.. شرحته الموقف.. والراجل تفهم ضاحكا مبتسما.. وجابلي التورته.. ونزلت بيها وأنا حموت.. حموت أحدفها من بير السلم وأنزل ألمها تحت وأعبيها في العلبة من غير ما أبابا الحاج يعرف..

ركبنا العربية.. روحنا الفرع الثاني.. ودخلنا مش طابقين نفسنا أساسا.. سلمنا على الناس.. طبعا السلام كان مختلف بقي.. سلام الناس اللي عارفانا فعلا.. واستقبل زملاء أبابا بقي عيلتنا بترحاب شديد ومودة.. لحد ما جه واحد لطيف كده بيحاول يا خد منى التورته اللي شايلها على قلبي أما جابتلي الدوالى من الطلوع والنزول.. طبعا أنا استوقفته بإيدى في صدره.. وقولتله:

- عندك.. إنت مين سعادتك؟؟

- أنا "أحمد محسن" أخو العروسة.. عنك عنك

- باس باس باس.. روح اندهلى "محسن" شخصيا ياخذ التورتة يا ابنى إنت

#مش_هارووووووووووح

#حاضر_ابابا

#تورتة_جلوباس_الشهية

#افراح_ايه_اللي_بيروحوها_بتورت_دى

الاعتراف الرابع

"سحلية ولابسة مايوه"

ده مش عنوان لفيلم.. ولا اسم قصة.. ده وصف لشكلى وأنا عندى ستاشر سنة وأنا واقف على الرملة على البلاج في المعمورة أما كنت باطلع المصيف مع أبابا وأماما وإخواتي المقاطيع.. طبعاً ده مكنش إحساسى وقتها.. ولا احساس أى شاب بنفسه في السن ده..

إنما إحساسى وقتها إنى طبعاً عبارة على مثلث جبنة لافشكيرى مقلوب كبير.. عريض المنكعين من فوق.. عضلات مفتولة الصدر.. ضرغام متحرك على الرمال في خيلاء وكأنه الجبل.. وإن البنات اللي في البحر وبتعوم دي.. مش بتعوم أساساً.. دي نازلة البحر تنتحر من شدة فتكس ووسامتس وخصوصاً شوية الريش الاسود اللي منبتين تحت مناخيري وأنا مصدق و مقتنع فعلاً إنهم شنب..

بينما في واقع الأمر.. ونظراً إلى الصور اللي أبابا كان بياخودها على الشط عشان يوثق الحادثة ويدلني بيها بعد كدة.. ويعرفنى مدى الكارثة اللي حلت على البشرية.. اكتشفت ان البنات اللي في البحر دي.. كانت بتفرق فعلاً.. مش من وسامتى ولا فتكى ولا فتحي حتى.. إنما كانت بتغرق من الضحك على منظري..!!!

وده بياخدنا ويرجعنا مرة ثانية إلى العنوان الرئيسى..

سحلية ولابسة مايوه

في سنة من السنين.. كنا مع الأسرة اللي طالعة تبع الشغل عند أماما.. هما نفس الوشوش اللي بنطلع معاهم كل سنة.. زميلات أماما في العمل.. وأبنائهم اللي كانوا دايمًا بنات.. إنما بشكل أو بآخر.. شاعت الأقدار إن أنا واخواتي الاتنين نكون مسؤولين عن هذه الفرقة من "الاناث" بحكم قال إيه.. إننا رجالة.. وإننا أكبرهم سنا.. وإننا متربيين.. كل الحجج اللي بيقولها أهاليهم عشان نشغل لهم حراس في المصيف سمعناها..

وطبعًا.. وقتها.. ده كان بيدينا إحساس أنا واخواتي أننا في مسلسل "باي واتش".. وإننا بنيجي اسكندرية مش عشان نصيف.. لا خالص..

أحنا بنروح عشان نحرس القطيع وخصوصًا إننا اسرة سباحين أساسًا من صغرنا.. "حقيقة علمية خاصة بنظرية طفو الخشب"

وطبعًا مفيش مانع إننا نستشعر إننا مسؤولين عن أمن وسلامة الحدود الشمالية للبلاد في هذا الوقت.. ضد أي محاولة لاختراق المياه الإقليمية..

"ما تخافيش يا مصر.. وراكي ضفادع.. بشرية طبعًا"

وكما هو البروجرام كل يوم.. نزلت البنات إلى مياه البحر الأبيض المتوسط.. بينما كنت أنا حارس الشمسية والكراسي وأكياس اللب والسندوتشات والترامس والشباشب والفوط والأكياس البلاستيك الفاضية اللي حناخد فيها الفوط المبلولة وأحنا مروحين... وكان اخواتي الاتنين بيقودوا الفوج الثاني الذي يمثل السيدات الأمهات القادمات من البيوت ولسة ما وصلوش.

وبعدين.. البنات غوطت شوية في البحر.. وبعدين طبعًا.. حدث ما تعتقدونه.. بدأت علامات الغرق تظهر في صورة "بلولوق.. بلولوق.. بلولوق".. وبدأت علامات الاستغاثة تلوح في نداءات على شكل

- "أحييييه بنغرق الله يحرقك غبي"..

وطبعًا.. هذا ما كان ينتظره التاريخ ليدونه عني..

الخلاصة.. كل هذه المراحل تمت في ثواني معدودة.. وضربتين من دراع السباح العالمي.. وصلت وسط حالات الغرق الجماعى اللي فكرتنى بالحيثان على شواطئ استراليا أما بيفيض بيها الكيل من البحر وبلاويه واللى بيجرى فيه.. ولكن.. تبقّت مشكلة صغونة بصراحة..

طب أنا حانقذ واحدة.. لالا.. أنا حانقذ اتنين... لالا.. التاريخ إن شاء الله سيذكر إني انقذت ثلاثة.. طب اعمل أيه في الستة الباقيين؟؟؟

البنات اللي بتغرق ابتدت تمسك فيا على اساس انى بروس ويلز في فيلم أرماجدون.. وانى بكل تأكيد حنق كوكب الارض من الدمار اللي حيطوله.. وهنا تطور الأمر أكثر بقي..

یا ختالالالالالالالالالالال

تسع بنات فى محاولة إنهم يتعلقوا بعصاية غلية أساسا كان موضوع فاشل من البداية..

وبعدين وقع من طوله عاملا بيبيى عل روحه من الضحك.. جراء محاولتي المستميتة الهروب من البنات وهما ممسكين بيا كما العوامة السوداء داخل الربع نقل المنفوخ على تمانية

وعشرين..

كل محاولاتى للهروب فشلت.. أعوم في ناحية الاقى واحدة.. ألف الناحية الثانية الاقى واحدة.. ابتديت ارفص بقى كرد فعل طبيعي لاسفيسيا الغرق بلا جدوى.. ابتديت أشتم بقى يمكن يتكسفو ويسبيوني.. محصلش.. كانوا بيغرقوا وما فيش مجال للأدب أو الكسوف.. دخلت بقلب في نوبة سريخ حادة كسريخ الفقمة عندما يهجمها القرش الابيض.. وأخيرا..

جاء الإنقاذ من عند رجالة الشط المنقذين فعلا مش اللي شبه سفاية الرنجة أمثالي.. أربع منقذين عتولة.. وصلوا في أقل من عشر ثواني على وصولي.. عدو عليا كأنهم أسبوعين.. وأول واحد وصل منهم.. مسكت فيه بنت من اللي كانوا بيغرقوا.. طبعاً دي جبتها من شعرها في المية علطول.. واتشعلت في رقبتة مكانها زي الكابوريا النتاية..

تبادل المنقذين الإمساك بالبنات وإنقاذهم.. والحمد لله طلعنا كلنا..

ومن يومها.. تذكر كل الأمهات-مع التاريخ طبعاً- بطولتي النادرة من أجل إنقاذ أرواح بناتهن الصغيرات.. وخصوصاً ان كل البنات خرجوا كويسين جدا الحمد لله.. وأنا خرجت في شبه حالة إعياء.. نتيجة تناوب البنات الاعتماد عليا بين الزراعات..

قصدي بين الموجات..

#يا_حلو_صبح_يا_حلو_طرز

#سيذكر_التاريخ

#الانتحار_الجماعى_للحيتان_على_شواطئ_استراليا

الاعتراف الخامس

كثير قوي بأصحى مفزوع من النوم على هذه الذكرى القذرة.. أنا واخويا الوسطانى.. كانت أماما الله يديها الصحة وطولة العمر.. ويسامحها على العقدة النفسية اللي مسبها لنا لحد النهاردة.. كانت بتأخذنا كل أول شهر كدة.. حلوين.. تمان سنين وست سنين كدة.. براعم تشرح القلب.. وتروح تودينا عند "الأسطى أونكل عزت الحلاق"..

طبعا سيبك تماما من إنها كانت بتعاملنا معاملة المعيز.. بدء من جرجرتنا في الشارع غصب واقتدار عشان نروح نحلق.. ومرورا بمحاولاتنا المستميتة التي لا تنتهى أنا واخويا الفرار والهروب عشان نحذف نفسنا تحت أي مكروباص معدي أفضل كثيرا من مواجهة أونكل عزت.. ونهاية بوضع أونكل عزت قبضته على كتفنا احنا الاتنين وعلى وجهه ابتسامة سمجة كدليل على استلام البضاعة استعدادا لتجهيزها..

كان الأسطى أونكل عزت كشخص عبارة عن جسم عليه خزان مية فاضي.. رأسه وإيده كانوا أكبر من جسمه بكثير.. صورة فرانكنشتاين في عقلى كانت جنبه أكنها صور سنووايت في أوضاع رومانسية.. كان دائما عندى فضول رهيب أسأله.. انت بتلبس الفانلة ازاي أعمو؟؟ وازاي بتعدى من رأسك دي اللي عاملة مشكلة للأقمار الصناعية في الفضاء؟؟؟

طبعا للي مش متخيل.. أنا باتكلم عن محل حلاقة في أوائل الثمانينات.. يعني لا كان فيه مناديل تتلف حوالين الرقية ولا امواس بتتغير ولا مقص بيقص أساسا.. اتذكر إننا في مرة من المرات حلقنا شعرنا "نتفا".. وبالمقص برضو..

الأسطى أونكل عزت كان عدو التكنولوجيا تماما.. والتكنولوجيا في حالتنا دي هي "سن المقص"..

كنت في بعض الأحيان اتمنى اروح عند حلاق الخرفان لإنى كنت على يقين إنه سيكون "أحن" عليا منه بكثير.. إنما لم يسعفى القدر لبلوغ المرحلة دي.. وكنت دايمًا واقع في مرحلة مواجهة الوحش اللي مفيش قبلها حاجة سهلة بتقابلها!!

الأسطى أونكل عزت كان بيقد واحد مننا على الكرسي.. ويحاول يخلي الثاني وراه.. بحيث إنه يبقى مغطى بين الاخ وأخوه عشان اللي ورا يا كبد أمه.. ما يشوفش أخوه وهو بيتعذب.. نفس نظرية دبح الخرفان.. ما تدبش خروف قصاص خروف.. كفاية عليه بس يسمع صوته وهو بيصرخ طلبا للاستغاثة بلا جدوى.. وده لوحده كان كفيلا إن كل واحد مننا يقوم ياخذ دوره وهو سايب تحتية "فطيرة" من الخضة..

كانت العملية عبارة عن "تعذيب سادي صرف".. لا علاقة لها بفن الحلاقة من قريب أو من بعيد.. مبدئيا هي فورمة وقصة واحدة بس.. قصة "حود لأقفشك".. التي لا تتغير.. وبعدين أونكل عزت كان بيتعامل مع رأس الواحد مننا على إنها بطاطساية صغيرة.. كان بيقرها مش بيحلقها.. يجيبها يمين.. يجيبها شمال قوي.. تطق في إيده ما يضرش.. تتعوج وتدلعل على صدرنا فايتأكد إننا لسة صاحيين ما موتناش إنما ممكن تكون حالة إغماء من التعذيب وطفى السجاير غلط بس فيبقى عادى.. يرش في عينك كولونيا تقوم سارخ.. يروح واكلك على بوقك.. تنام تانى.. كده يعنى..

الأوسطى أونكل عزت.. كان أحيانا يعدي عليه حد يقف على باب المحل ويتكلم معاه.. وحد فينا تحت إيده الكريمة.. وبيتدوا يتناقشوا في موضوع لحد لما يتترفز ويندمج من الحوار وبيتدى بقى يشوح بالمقص...

مش حكمل أنا لإن التفاصيل مرعبة..

أماما كانت بتلف لفة وترجع تاخذنا على ما نكون خلصنا حلاقة وتقف على باب "الصالون الثقافى" اللي بيقدم النهاردة قصيدة "وأنا كالجزمة في إيده".. وتسأله بخضة..

"العيال فين؟؟"

طبعا أونكل عزت كان بيشاور علينا مش بيتكلم.. مفيش فرانكنستاين بيقول غير جملة واحدة..

"إنه حي" .. ويجري..

واحنا قصاد عندها ومفيش غيرنا في المعتقل.. بس من كتر السحجات والتشوهات الخلقية والغرر والعيون والجفون والحواجب اللي مضروبة مفكات.. ما كنتش أماما بتصدق اننا عيالها.. غير لما تسألنا على كلمة السر..

أحيانا أماما كانت بتكلم سؤالها ليه بعد ما يشاور لها علينا.. وتسأله..

"هما دول؟؟؟ بجد؟؟؟ طب احلف بأمك كدة!!!"

كنا بنخرج من عنده وكم الإهانة اللي على وشوشنا اكبر من ان يتحملة بشر.. وكانت أماما بتاخذنا نرجع نخلق عنده تانى كل أول شهر.. مش عشان شعرنا طول في الشهر ده.. لا أبدا..

ده عشان مدة الشهر كانت يا دوب كافية نكون اتعالجنا وخفيينا من السحجات والجلطات اللي في الوش مش أكثر..

#الاولسطى_اونكل_عزت

#اريد_حبا_وختانا

#حلاق_الصحة

#يا_ريتنى_كنت_خروف

الاعتراف السادس

"نينيا"

مش بتاعة عماد حمدي.. لا.. بتاعة أبابا الله يرحمه ويرحمها ويبيشش الطوبة اللي تحت راسهم هما الاتنين.. كانت بتحب أبابا جدا.. وكانت تحبنا الخير أنا واخواتي قوي.. بس على قدها طبعا..

كانت "نينيا".. ساكنة في شارع القصر العيني.. واحنا من سكان المعادي.. وكانت تحب كل فترة كدة.. تندهنا عشان "تبشيشها" علينا.. وخللوا بالكم من "تبشيشها" علينا دي... واحنا كشباب طبعا.. طول عمرنا "مقصرين".. وعندنا لعب وأصحاب ومش فاضيين.. فكان من وقت للتاني.. لا بد من تدخل أبابا بكل هدوء وحكمة والتوجيه لنا بالنصح والإرشاد على شاكلة:

"لو مرحتش لستك بكرة مش حدلك البيت يا حيوان"

"إنزل يا حيوان روح لستك عشان عاوزاك"

وكانت الإجابة الدائمة في جملة واحدة لا تتغير..

"حاضر أبابا"

وطبعا.. بانزل من البيت واتجه إلى القصر العيني عن طريق المترو من المعادي وأنا باتسلى في السكة بالندب على اليوم اللي ضاع مني لاني مش حلعب أو مش خرج أو مش حأنتخ.. وكله عشان خاطر "نينيا" عاوزاني في حاجة مهمة جدا.. وطبعا مهمة جدا دي بتدخل في خيالك دور "رأفت الهجان" في مسلسل "دموع في عيون تافهة".. المهم..

عارق إنه مش بتاع رأفت الهجان.. قصرُوا..

كانت "نينّا" الله يرحمها تآخذنا من أول اليوم.. وبعدين تفطرنّا.. بكل أنواع الجبن والبيض اللي كانوا في التلاجة عندها من حوالي ربع قرن.. وتقريبًا كانت الحاجة دي فاضلها بتاع ست ثوانى كده وحتبدأ في خلق حياة ذاتية من كمية العفن و"الفنجاى" اللي متشعب فيها..

حتسألني وتقولي.. طب وهي ما بتكلش منهم.. أقولك لا سعادتك.. "نينّا" خلاص.. عايشة على الزبادي بحكم السن..

حتسأل وتقول اومال بتجيب الحاجات دي ليه.. حقولك تقريبًا بتجيبها عشان يقعدوا في التلاجة لحد ما يعفنو وبعدين تبعت تجيبنا عشان ناكلهم.. الأمور تحولت إلى روتين بفعل الزمن سيدي الفاضل..

المهم بعد ما القدر بيعث بمعجزة من السماء.. وتتجاوز سيادتك مرحلة التسمم الدموي نتيجة اكل كوكتيل السموم الكافي لقتل تريناصور ريكس من العصر البلشوفى.. تدخل في مرحلة الدلع بقي..

- تعالى كده يا واد يا شريف.. قيس القميص ده..

- قميص ايه يا "نينّا"؟؟؟..

- القميص بتاع أخويا لله يرحمه..

- أيوة يا نينا بس ده ياقته جناحات طيارات.. يعني ممكن معرفش اخرج من باب الشقة لو لبسته.. حالتحشر

- يا واد بطل لماضة.. قيس القميص..

- يا نينا أحب على ضوافر رجلك.. السيرك القومى مكانه في العجوزة مش في شارع القصر العينى..

- حتلبس والا اتصل بابوك.. هاااا؟؟؟

- لا.. أبابا لا.. حا ألبس.. يا نيينيينيينة

- بتقول ايه يا واد؟؟؟

- بقول حلبس اهو يا نينا..

ثم أدخل إلى الحمام مطأطأ الرأس.. خالعا ملابسني القطعة تلو القطعة.. ومشاعرنني تخبرني بأن أحد ما سيقترح الحمام محولا هتك عرضي بلا شك..

لكن هتاك العرض لم يكن في الحمام.. هتاك العرض كان مستننى في المرايا برة بعد مشاهدتى لمنظري مرتديا ذلك القميص..

خرجت لنينا طبعاً.. وعلى وشى ابتسامة أقل ما يقال إنها ابتسامة ضفدع

- الله الله الله.. حلو عليك خالص يا واد يا شريف

- تحبى، ابدأ الفقرات يا نينا واتشقلب؟؟؟

- بس يا واد لاقول لأبوك.. ده حيفرح قوى أما يلاقيك داخل عليه بيه

أدخل على مين؟؟ بأيه؟؟ هو أنا حاروح كدة؟؟

- آه طبعاً.. وشوف بقى الناس اللي في الشارع حتقول عليه إيه.. تحفة.. لو حد وقفك سألك عليه.. ما تقولوش بقى..

- لا ما أنا عارف انه تحفة من غير الناس ما تقول يا نينا.. شوفى يا نينا.. استحلفك بكل ما هو عزيز لديك.. وشرف ام شهداء دنشواى اللي عاصرتيهم شهيد شهيد.. وحمامة حمامة.. حاخذ القميص فى كيس واروح البسه فى البيت.. عارفة حنام بيه كمان

- لا طبعاً يا واد.. حتروح بيه يعني حتروح بيه.. إنت واد عبيط ومش عارف مصلحتك..
ومش عارف قيمة الحاجات دي.. دي تحف؟

وتبدأ مراحل الانهيار العصبى.. وصرخات الرحمة تصدر من حنجرتي وأنا ممسكا بكعب قدمها ونازل تقويل فى الشبشب الى بصباع الذى ترتديه منذ بدأ الخليقة.. وتبدأ هى فى الحنين..

معجبة بشجاعتك وثقتك بنفسك ومن حولك الأطفال.. منهم السعيد.. ومنهم من يردد تلك العبارة التي
انتفض ليلاً صاحيا من الكابوس مرردا ايها..

"العبيط اهو اهو.. العبيط اهو اهو"

#حتروح_منى_فين_يا_مازنجر

#انا_اكره_السيرك

#فقرة_الساخر

#اعترافات_بنت_حرام_صحيح

#انا_موتضايق_يا_نيلة

#_عماد_حمدى_كان_اسد_انه_استحمل_نينا

الاعتراف السابع

يا جماعة.. ده مش اعتراف بالمعنى الحرفي للكلمة.. هو أقرب لأنه يكون رسالة اعتذار لـ "أماما" ولكل الأمهات جميعا ربنا يديهم الصحة..

أما تكون فيه أم عندها من الأولاد ثلاثة.. وبتربي معاهم الأب كمان باعتباره ابنها.. يعني تقريبا بتربي أربعة رجالة في المنزل.. بيبكون مشكلتها الأساسية في حاجتين لا تالت لهما..

المشكلة الأولى: الزى الصيفي الرسمي

كما تعتمد وزارة الداخلية على تغيير أزيائها من شتوي إسود إلى صيفي أبيض.. يلجأ الشباب في عمر البغال اليافعة إلى نفس الاستراتيجية.. وخصيصا في فصل الصيف

طبعاً وكما هو معروف عند الصبيان معدومي الحساسية.. إن الزى الرسمي في الموسم الصيفي.. غالبا ما بيبكون زي صيفي.. صيفي قوى.. صيفي لدرجة "مثيره"..

مجموعة من العصا عيص تجوب أرجاء المنزل كالأشباح الطائفة.. مرتدية الزى الأبيض المكون من الفانلة الحمالات.. والسليب الاسبيدو الأبيض ماركة جل.. قبل اكتشاف الامبراطور وبوكسراته.. الذي جعل للحياة لونا بدلا من الأبيض "المزهر".. اللي مدي عل مزرق ده..

شكوى لا تنقطع عن الأمهات جميعا باختلاف ألوانهم.. لهم الجنة تلاقهم بيقولوا..

"يا حبيبي البس كده حتبرد"

"أماما الدنيا حر"

"يا حبيبي في اختراع اسمه البيجاما"

"أماما الدنيا حر"

"يا حبيبي عيني وجعتني من أشكالكم المقرفة"

"أماما البسى نضارة شمس الدنيا حر أماما"

وانت واخواتك طبعاً.. اللي تنام بيه تصحى بيه..

الشباب في هذه الرحلة السنية بتكون في مرحلة اكتشاف القدرات الذاتية.. وأهمها القدرة الذاتية على البجاجة.. تتساقط أوراق التوت عن السواد الأعظم من الشباب.. ويبدأ في التعامل مع العالم على إنه حمام ثلاث كبير متواصل طوال ايام الاسبوع..

إيه ذنب المكوجى القادم من الشارع إنه يشاهد عضلات الفخدة الأمامية؟؟

إيه اللي يهم السيد محصل الكهرباء في تكوين فكرة عن تلك الشعيرات التي بدأت تنمو على صدرك واللي انت بتفكر جدياً إنك تضفرها؟؟؟

تفتكر بجد إن بواب العمارة حيزيد احترامه ليك لما يعرف انك من النوع اللي بيدخل حرف الفانلة جوة السليب؟؟

أسئلة لن تجد لها إلا إجابة واحدة لا تتغير

"أماما.. الدنيا حر أماما"

المشكلة الثانية: إنهم يأكلون كل شئ متحرك أو ثابت

مرحلة النمو.. عند السادة مرتدي الزي الابيض الثنائي القطعة.. تصاحبها مرحلة من التوحش..

افتكر أماما ربنا يديها الصحة.. ماكانتش بتلاحق على أكلنا..

واحد داخل البيت والثاني خارج والثالث قايم من النوم.. والرابع جاى من الشغل "اللى هو أبابا" .. ومولد بقى.. والكل على نغمة واحدة..

"فين الاكل ياست انتى"؟

كانت الله يمسيها بالخير.. عل وشك إنها تبدأ تعملنا الأكل في بستلة عشان الكميات.. وبالنسبة للشرب.. أحيانا البانيو مكنش بيكفى.. وكانت الكميات المطلوبة هي نفس الكميات اللي بتحتاجها باقي شقق المنطقة كلها تقريبا..

الموضوع بفضل الرياضة واللعب والمرواح والمجي.. اتحول من سد جوع إلى إشباع فجع.. البطون طول الوقت محتاجة تتملي بالأكل.. وكأنها بتسرب الاكل زي تسريب المكالمات بتاعة عبر حيم علي كدة..

وأماما الله يديها الصحة.. مش ملاحقة..

الهجوم على التلاجة يوميا كان استراتيجية عصابة العصا عيص البيضاء للفتك بأس شيء يحتمل الأكل أو لا يحتمل كمان.. مش فارقة.. أرفف التلاجة عليها علامات تدل على نشوب معركة بالاسنان داخلها.. وبابها عليه الخدوش اللي بتوضح ان كان في ديب جعان زارها منذ فترة قريبة..

فى بيتنا.. كان البقاء"اللي يلحق"..

أبابا كان بيحب "التين الشوكي" جدا.. وكان بيشتري في الصيف.. بتلاتة جنيه ايام ما كانت اجدعها تينة بخمسة ساغ.. بمجرد إنه يحطهم في التلاجة عشان يسقعوا ويتغدى.. بح.. بس خلاص

وطبعاً.. الهتاف الأشهر في تاريخ البيت..

"مين الحيوان اللي أكل التين؟؟؟؟؟؟؟؟" ..

الإجابة صمت مطبق..

فكان بيوصل لمرحلة العند إنه لازم ياكل إن شالله "تينة واحدة" قبل ما يتوفى.. فبدأ في إنه يجيب بخمسة جنيه.. يعني ميت تينة!!... وبرضو بيكون مصيرهم نفس مصير ما سبقهم.. ويتردد الهتاف مرة ثانية..

"مين الحيوان اللي أكل التين؟؟؟؟"

الصمت المطبق هو المجيب دوما..

فا يزود بقى أبابا لحد ما وصل إلى بعشرة جنيه تين.. وقعد يزود يزود يزود..

وبحمد الله.. في النهاية.. وقبل وفاته رحمه الله.. يأس ابويا إنه يدوق التين من الأساس جوة البيت وبطل يشتري لنا خالص..

مشاهدات

- أماما كانت بتحط الأكل أحيانا.. وتخش تستخبي في المطبخ حتى لا تشاهد معركة السباع على الطعام.. وخصوصا مرحلة وضع الأطباق على الأفواه مباشرة..

- أبابا.. كان بيشتري بجنيه تين ويقف ياكله على العربية وبطل يجيبلنا فوق

- لولا وجود فصل الشتاء.. لكننا عممنا الزبي الصيفي على الشعب بالكامل في الشوارع أنا واخواتي..

#كان_نفسى_اخلف_بنات

#طوبى_ابابا_وتينة_كمان

#سامحيننا_يا_اما

#لك_الجنة_انت_وكل_الامهات_وانا_شاهد

الاعتراف الثامن

فى حد ما كانش ليه هواية وهو صغير؟؟؟

كلنا كان لينا هوايات.. اللي بيرسم.. واللي بيغنى.. واللي بيربى حيوانات..

أنا كنت بحب أربى حيوانات قوي..

طبعا الكل بسذاجته.. حيعتقد إن الحيوانات اللي ممكن تتربى زي الكلب والهرة.. "القطة"

يعني..

لالالا.. انسوا الكلام ده خالص..

لولا استحالة دخول الافيال من باب الشقة.. ولولا طول رقبة الزرافة مقارنة بالسقف.. كنت

ربيتهم..

فى لحظة من لحظات الزمن.. قررت أربي "تعبان".. أيون.. "تعبان".. بعد ما اتكلمت عنه

أنا وواحد صاحبي.. وقالى وعادلى عل قد إيه هو جميل وقد إيه هو حيوان "أليف".. آه والله أليف..

وخصوصا بقى اما شرحلي إن التعابين ممكن تشتريها منزوعة غدد السم.. ومنزوعة

الانياب كمان..

ده من أجل مزيد من الاطمئنان..

طبعا.. أنا مكديتش الخبر.. وقررت أنزل سوق الإمام.. إلى حيث بائع التعابين..

"يا عم يا عم.. علوز تعبان.. من غير سنان"

الدنيا كانت زحمة مووت في السوق.. فين وفيين.. أما الراجل إداني التعبان.. أخذته مسكته بحذر كأول تعامل وتعارف بيني وبين التعابين غير السامة.. وحطيته في علبة خشب من عند الراجل صغيرة كدة..

وبدأت رحلة العودة إلى المنزل.. عبر ركوب أتوبيس سبعمية وواحد "المطبعة - العباسية" ..

التعبان فضل محترم جدا طول الطريق من السوق لحد محطة الأوتوبيس.. وعشان اكون اكتر تحديدا.. كان محترم لحد ما طلعت الأوتوبيس..

وهوووووب... هو ركب الأوتوبيس من هنا.. وكأنه ركب عفريت.. حتى التعبان قرف من الأوتوبيس.. والله احنا لينا الجنة..

خرج التعبان من فتحة العلبة الخشب.. ووقع في الأرضية المزيطة..

أسيب لكم تماماً حرية التخيل.. أوتوبيس فيه ما لا يقل عن انتشار تريليون شخص.. وقع وسطهم تعبان.. لا يعرفوا بقى إنه سام ولا منزوع الغدد ولا منزوع الدسم حتى ولا نيلة.. كل ده انتهى بمجرد صرخة احد السادة رواد الأوتوبيس بكلمة واحدة..

"تعباااااااااااااااااان"

أقدر أقول إن دي كانت المرة الأولى في حياتي اللي أركب فيها أوتوبيس فاضي..

دى كانت المرة الاولى فى حياتى اللي اشوف فيها ناس بتتنزل من شبابيك الأوتوبيس..

ودي كانت المرة الأولى في حياتي اللي اشوف فيها أوتوبيس ماشي من غير سواق ولا كومسرى..

كان المشهد نسخة طبق الأصل لمشهد فرار قطيع من الغزلان من أمام أسد.. هروب عشوائى فى كل مكان من كل مكان ممكن تسميه "فتحة" خروج.. حتى لو كان فتحة الشكمان.

الناس اللي في الشارع قالت إن الأوتوبيس لو كان فيه قنبلة هيدروجينية ماكانش الناس
حتخرج منه بالسرعة دي..

الأمور وصلت إن الناس مش بتنزل ورا بعض.. لالا.. الناس كانت بتنزل فوق بعض..

الناس عملت خط طولي بأجسادها يرسم مسار الأوتوبيس من كتر القفز والوقوع على
الأرض مفترشة الأسفلت..

وطبعاً.. أنا كان دوري في هذه اللحظة.. هو "السحف" تحت الكراسي.. والجري ورا
التعبان والامساك به.. لحد ما ربنا وفقني.. ومسكته.. و"دسيته" بسرعة في العلبة الخشب... ونزلت
مع الناس أكنى مش تبع الأوتوبيس..

طبعاً لو كانوا مسكوني أو عرفوا إني صاحب التعبان.. كانوا حطوه في.. ما علينا..

وصلت إلى البيت بفضل الله.. وطلعت.. وطبعاً.. كان لازم أتأكد إن أماما وأبابا مش قاعدين
في الصالة.. اتسحبت وأنا داخل.. لدرجة إن التعبان كان حيقوللي:

"يا ابن اللعينة.. بتتسحب أحسن مني"

ومسافة ما دخلت.. وبقيت في نص الصالة.. جاء أخويا.. ومن وراه أبابا.. ومن وراه أماما..
ومن ورائهم أخويا الثاني.. وفجأة لعبت الصدفة أقدر أدوارها.. وتحولت صالة بيتنا بقدره قادر إلى
ميدان عام يلتقي فيه الكل من كل مكان..

ماكانش ناقص غير إنى الاقى عربية حلبسة معدية في طريقة بيتنا..

والكل سبحان من له الملك.. سألوا سؤال واحد..

"ايه اللي في العلبة ده؟؟"

طبعاً.. أنا قلت اعترف.. واقنعهم.. وخصوصاً إنى بعد ما اشرح لهم الموقف وإن التعبان اللي
اشتريته عشان أربيه في البيت معانا منزوع السن ومنزوع السم.. ممكن يقتنعوا.. ودى كانت أكبر
غلطة في التاريخ المعاصر..

بمجرد ان التعبان "طل" براسه من العلبة الخشب.. تحول بيتنا لإقامة فعاليات مهرجان "الطيران للجميع" ..

كانت أول مرة أعرف فيها إني من عائلة "سبايدر مان"

كانت المرة الأولى في حياتي اللي أعرف إن اخواتي عندهم إحساس وبيخافو زي البنى
ادمين!!

دي كانت المرة الأولى في حيافي اللي فيها صوت الصويت في بيتنا يوصل لعمى في قلب الكويت

كان المشهد يستحق الحضور على أوسكار أحسن مؤثرات بصرية وسمعية.. حركة ثري دي.. صوت دولبي اربعة وسبعين جيجا هيرتز..

مسكت التعبان.. ولسة حقولهم

"يا جماعة.. ده معندوش سنان"

هوب.. راح التعبان عاضض صباعى.. ولقيت صباعى في ثانية.. بينقط دم.. وهنا.. هنا فقط.. تطور المشهد..

الحركات الثرى دي.. تحولت إلى فيلم "ماتريكس ريلودد".. و"الصوت" الدولبي بقى "صويت" دولبي..

انا اتفرعت.. الراجل اكيد غلط واداني تعبان تاني غير اللي أنا قتلته عليه..

أنا بمووت يا فخری !! !! یا ختااااااااااای

أماما بقت تصاااااوت..

وأبأبا بيجرى فى الشقة مش عارف يعمل ايه..

وإخوانی بیعیتو!..

فكرت للحظة.. وقتلته مباشرة..

- قالى احتمال كبير تموت..

راحت أماما بقت تصااااااااااااوت

وأبأبا رجع يجري فى الشقة مش عارف يعمل إيه..

وإخواتى رجعوا يعيطوا..

ما أنا لو قتلته التعبان مفهوش حاجة.. كان أقل حاجة حيعملها إنه حىخنقى بيه..

لملمت شتات نفسي... حلوة لملمت دي..

ودخلت الصالون.. مسكت التعبان بعصايا.. حطيته فى كيس.. واخذنا التعبان أنا وإخواتى وأصحابنا.. نزلنا بيه الميدان تحت البيت.. وتناوبنا الإعتداء عليه.. حتى لفظ أنفاسه الأخيرة متأثرا بجروحه.. حطينا عليه جاز وولعنا فيه.. كنوع من أنواع التمثيل بالجثة عقابا على ما اقترفته من خطأ العض..

ومن ساعتها..

أماما ما بطلتش تصااااااااااااوت

ولا أبأبا بطل يجري فى الشقة مش عارف يعمل إيه..

ولا إخواتى بطلو عياط..

احتجت إلى شهر من التعافى النفسى من آثار الشتيمة اللي أبأبا شتمهالى..

أماما احتاجت إلى شهر من التعافى النفسى من آثار رؤيتها التعبان وهو داخل الصالون يدلع يملا القل.. وقعدت تصحى كل يوم بليل وتصااااااااااااوت..

إخواتى بقى قرررو يشتركوا معايا.. ونشتري "نسر" نربيه فى البلكونة..

هع هع هع هع

ولكن.. تلك اعترافات اخرى..

#السلم_والتعبان_والاوتوبيس

#ثعبان_غير_سام_زى_دم_لونه_اخضر

#هوايات_مفيدة_للقتل

#انتظار_الموت_مرعب_حقيقة

الاعتراف التاسع

أبأبا الله یرحمه نسخة مكررة من أبهات كثيرة.. النظام ثم النظام ثم النظام.. مريض بالنضافة.. كان مقضي حياته في بلكونة الشقة المطلة على ميدان الاتحاد في المعادي.. أحد أهدي وأرقى وأنصف ميادين مصر.. شجر.. زرع.. مساحة خضراء كبيرة هادئة..

كانت البلكونة هي حياته.. يقضي فيها معظم ساعات يومه بعد عودته من الشغل.. صيفا وشتاء..

في بداية حقبة التسعينات.. قرر بعض الناس اللي "مش نضيقة" إنها تتخذ من الميدان المواجه للبلكونة مكان لتجميع وإلقاء أكياس الزباله!!!

لسة فاکر اوامر أبأبا الميدانية ليا كأنها امبارح.. أنا واخوای.. مطلقا صرخة التنين الغاضب

"يا شرييييييييييييييييييييف"

"نعم أبأبا؟!!!"

"انزل يا حيوان انت وهو بسرعة.. خد الكيس ده.. وامشي ورا الراجل اللي لسة حاطه دلوقتي.. وامشو وراه لحد بيته.. وسيبه هناك قصاص عمارته وتعالى.. حيخلو الميدان خرابة"

عزيزي القارئ.. اسرح بقى..

مرة الراجل يحط الكيس ويطلع ساكن على بعد 10 كيلو مثلا.. ونازل يرمي الكيس ويتمشى..

"يا شرييييييييييييييييييف"

"حاضر أبابا؟!!!"

مرة ست تحط كيس ونشيله ونمشى وراها وتطلع شغالة كانت بتنضف شقة ومروحة..
ونحتاس بالكيس ما نعرفش نوديه فين أنا والعيال اخواتي ونركب بيه ميكروباص ونروح.. وركاب
الميكروباص تشتمننا على القرف اللي شايلينه.

"يا شرييييييييييييييييييف"

"حالا أبابا؟!!!"

مرة واحد يحط الكيس ويمشي شوية نقوم نمشي وراه.. يركب عربية ويمشي نقوم نجري
وراه بالكيس..

"يا شرييييييييييييييييييف"

"فوراً أبابا؟!!!"

مرة تلاقى الكيس مقطع.. فنتعلم بعد كده تنزل من البيت معاك كيس احتياطي عشان تلم فيه
الزبالة اللي حتدلق وتكمل مشوارك ورا صاحب الكيس إلهي يحرقه هو والكيس في ساعة واحدة..

"يا شرييييييييييييييييييف"

"في التو أبابا؟!!!"

مرة عقبال ما تنزل تلاقى الكلاب الضالة حاصرت الكيس حصار الإغريقين لطروادة وهى
بتبصلك ولسان حالها بيقولك..

"لو دكر.. قرب من الكيس.. وحيكون مصيرك مصير هيكتور"

"يا شرييييييييييييييييييف"

"Consider it done أبابا؟!!!"

وهكذا..

كانت تلك المرحلة.. قد حولتنا إلى رجال مطافي أنا واخواتي..

نايمين نص نومة..

مغمضين عين ومفتحين عين..

لابسين دايمًا.. ومستعدين.. منتظرين للنداء الذي لا ينقطع

"يا شرييييييييييييف"

"افنظم أبابا؟؟؟"

فكرنا أنا واخواتي نعمل عامود من البلكونة نتزحلق عليه من الخامس.. بس الفكرة ما تمتش..

وبرضو.. الناس اللي بترمي الزباله ابتدت تتعلم هي كمان ان في "زبالين" بيحرسوا الميدان..

فبدؤوا في مرحلة جديدة..

يحطوا الكيس.. ويجروا.. عشان منحصلهمش..

"يا شرييييييييييييف"

يحرق شريف على أكياس الزباله في ساعة واحدة.

"شريف بيجري أهو ابابا"

غيرنا الاستراتيجية.. وابتدينا في مرحلة جديدة.. اننا نستخبى في الشارع للناس اللي بتحط الزباله عشان عنصر المفاجأة.. ونطلعهم من اللا مكان زي الأرواح الشريرة..

فبدأت مرحلة أجدد..

الناس تعدي بالعربيات وترمي أكياس الزباله من شباك العربيه.. وتخمس بالعربيه و"تأمرك".. وتتطلق انطلاقه عربيات السباق في آخر خمسين متر لسباق باريس دكار الدولى..

"يا شر بيبيبيبيبيبي"

قووووم ايه.. شريف واخواته وعلى خدودهم آثار الدموع من التعب.. لابسين الخوذ ومحضرين العجل البني ام اكس بتاعهم.. وطالعين خاطفين كيس الزباله قبل ما يلمس الأرض على طريقة شروخان فى الأفلام الهندى وطالعين ورا العربية بالعجل..

وهكذا استمر أبابا

"يا شر يييييييييف"

واستمرت عصبة "الولولة الحمراء" في الجري بأكياس الزباله ورا البشر من كل مكان في مصر.. مردين في نفس واحد

"حالااااااظر أبااااااااااااااااااااااااااا"

كنا قد وصلنا لمرحلة نكاد نقسم فيها إن الناس حولت الموضوع لتسالي.. وبترمي اكياس فاضية عشان نجرى وراهم بالأكياس زي المجانين..

بعض الناس كانت بتخلي عيالها الصغيرة معاها في العربية.. وتشاور علينا بضحكة وكأنهم بيقولوا لعيالهم..

"بصويا حبايبي.. المجانين أهم اللي بيجرو ورا العربيات"

وتفضل العيال تشاورلنا باي باي من شباك العربية الوراني واحنا حيجيلنا تهتك في السمانة
من التبديل...

تحول الأمر إلى كابوس.. الهرش زاد عندنا في العيلة.. الإجهاد ابتدى يزيد وابتدى يجيبلنا كرمبات واحنا بنفكر.. الكلاب بقت تجرى ورا العجل لاننا بناخد أكل عيشهم وبنهرب بيه...

الى أن تدخل أبابا..

"يا شرييييييييييييييييييييييييف"

كان منتظر يسمع

"البقية في حياتك يا حج.. اتهرس تحت عجل أوتوبيس وهو بيجري ورا عربية بكيس زباله"

إنما أخيرا تحرك أبابا بنفسه.. وجمع السكان من كل العمارات المحيطة للميدان.. عرض عليهم آثار التعذيب اللي في رجلنا وجسمنا.. كرد فعل طبيعي للمجهود.. وجنزير العجل اللي بيلف على كعوب رجلينا.. وبرضو حالات الجرب والهرش اللي أصابتنا من جراء احتضان أكياس الزباله والجري بيها لمسافات بعيدة المدى.. مع العرق.. كوكتيل يسبب ملاريا على إيبولا.. مش جرب.

صعبنا على الناس.. وابتدوا يتحدوا تحت راية القائد صلاح الدين الأيوبي اللي هو أبابا..

وبدأ كل واحد فيهم يستغل علاقته وقدراته في عمل أسلاك شائكة.. ووضع لافتات.. وعمل كمائن للناس دي.. وتوبيخهم بشدة.. واتعمل بعض المحاضر في القسم..

وفي النهاية..

عاد الميدان إلى رونقه.. وعملولنا تكريم لائق.. على المجهود الخارق للطبيعة اللي بذلناه طوال شهور.. الناس والله الحمد..

أعلنونا المسؤولين عن زباله المنطقة كلها!!!

#يا_شرييييييييييييييييييييييييف

#ارحم_امى_أبابا

#غرندايزر_انطلق

#النضافة_من_الايمان_عشان_انتو_طلعتو_ايمانى

#قناصين_اكياس_الزباله

"ياختا اaaaaaaaaaaaaaaای"

وصلنا لمرحلة شعرت معها إن الفار فهم إنه مخيف وابتدى يجرى وانا في الطريقة..
والموضوع ده خلا العيال صحابى يتحولوا من مرحلة الصويت لمرحلة "التضحية"

[illegible][illegible]

"یاختا اaaaaaaaaaaaaaaaaaaaaaaaaaaaaای"

حقوقی تضحیہ ازای یعنی؟؟؟

يعنى بقوا يزقو بعض عل الفار كمحاولة لإنقاذ انفسهم من براثن الوحش المفترس.. لا رجولة ولا نخوة.. أنانية مفرطة..

طبعاً أنا في وسط كل ده.. كنت ببذل مجهود خرافي للحفاظ على استمرارية الفوطة الخضرا على وسطي أصلاً.. مع الزق ومحاولات الهروب العشوائي.. أصبح الأمر جحيماً.. أصبحت الفوطة ممسحة بلاط..

فى وسط معركة حطين اللي فى الطريقة دي.. واحد شاف الفار بيجرى نحيتة.. طبعا استقبله بالنداء الرسمي للحفلة

"ياختاااااااااااااااااااااااااای"

حاول ينظ من فوقيه لكنه أخطأ تقدير المسافة.. فا نزل عليه.. هوب.. الفار اتهرس وطب محطش منطق..!!!!!!

الكل شاف الفار ميت جالهم حالة من التشنج..

صويت صوت صوت...

"يا ختاااااای.." "یا ختااااااااااای.."

أنا مبعثش عارف دي صرخات فرح.. والا خوف.. والا اشمئزاز.. أنا حقيقي بقيت بدعي ربنا إني أحافظ على ورقة التوت الأخيرة الخضراء اللي ساتر بيها نفسي..

وفي النهاية.. بعد مرور نص ساعة من العجن.. انتصرنا على الفار عن طريق "القتل الخطأ".. جريمة لا يعاقب مرتكبها إلا بسنة مع الشغل الحمد لله..

نزل أصحابي من البيت.. بعد ما تعاونا جميعا في إخفاء جثة الفار "من البلكونة".. اللي تقريبا نزلت على عم "حجاج" البواب لأنى سمعت من المنور حد بيقول:

"باختااااااااااااااااااااای.."

ووقفت موقف المنتصر.. بذات الفوطة.. ببص حواليا.. اكتشف حاجة مهمة جدا جدا..

أبأبا وأمأما حأخربوا بآت أبوأا وأمأ أنا وأأواتأ على الأراب اللأ حل بالشقة وأأنا بأأور
على الفار

"احییٰبیبیہ یا ختالای.."

#الله يرحم المعلم رشدان

#طريقة الموت

#بشکیر ہر کلیر

#طرزان ده بیتعب من الشعلة يا كبدی

الاعتراف الحادي عشر

طبعا في يوم الخامس و"العشرين" من يناير لعام الفين و"... اشر" حظ انت بقى الحروف
اللي تحبها.. "حد".. "اتن".. "تلات".. "اربعت".. اليوم ده هو كان وسيظل يوم الاحتفال بيوم الثورة
المجيدة..

"مجيدة دي تبقى مرات مجدي"

كثير مننا فاكّر الميدان.. وأيامه الجميلة.. فاكّر الملايين اللي كانت بتنزل بتدور على بلدها
اللي ضايعة ما بين دول ودوكهوما.. وطبعا أما تشوفو حلمة ودانكم لا حقولكم مين دولا.. ولا مين
دوكهوما.. بلا نيلة.. "عفوا سيدي المراقب".

في يوم.. كنت مثل الملايين التي خرجت للميدان.. الميدان لا موضع فيه لقدم.. خارج من
شغلي.. متفق مع أفضل من عرفت من البشر وأنقاهم.. مجموعة أصدقاء الميدان.. نتوجه إلى
الميدان سويا.. حيث محاولة الوقوف ضد ممارسات كل اللي خربها.. واللي لسة عاجز يخربها

في منكم حي قول أيام المجلس العسكري.. هع

وفيه منكم حي قول أيام حكم الإخوان.. هعين..

كل واحد يفتكر اللي عاجز يفتكره.. لأن مش ده الهم.. المهم إن الشباب كان دايما موجود في
وش الظلم بكل أنواعه.. أي ظلم.

طبعا للى ما راحش الميدان اثناء امتلائه.. في بعض المشاكل اللي ممكن تمر بها.. وممكن
تتجاوزها.. وفي مشاكل.. بتحاول تتجاوزها..

بس للأسف.. القدر يوقف بكل قوته ضدك.. زي ما حصلي فجأة..

لقيت نفسي.. من صباحية ربنا.. في عز الصيف..

شارب اتنين قهوة في الشغل.. وتلاتة شاي.. وازاتين مية.. وواحد ينسون.. وكانزتين ببس
وواقف في وسط الميدان بقى عامل زي فنطاس المية اللي على عربية نقل.. حدلق بيبي من بوقى..
ومحتاج أدخل الحمام.. فوراً.. بدون تأخير

جربيببيت على مكان المراحيض العامة اللي في الميدان.. اللي كنت اتخيلت مرة انها
مفتوحة زمان قبل الثورة.. اما وصلت للمكان بعد محاولات عدة وسط الحشود الرهيبة.. وسط
عبارات كتير على شكل..

"محدث يرجنى"

"ما تضغطش عليا أرجوك"

"وسع من قصاى بدل ما تتبل"

كانت المراحيض عبارة عن أنقاض..

طبيعي.. لو كل واحد من البشر دي نزل نقطة "عرق" حتى على المراحيض.. الحيطان
حتبوش!!!

الببي أمام باب المراحيض المغلق.. كان يبعكس ضوء القمر من خلال ارتفاع منسوبه
خارج المراحيض أصلاً..

ومن جهة اخرى الرائحة كانت واضحة عل جتت البنى ادمين اللي اترمت جنب المراحيض
نتيجة التسمم الدموى الناتج عن استنشاق سادس أكسيد البول..

الخلاصة.. كان في مجزرة بشرية في المنطقة دي.. الفكرة في حد ذاتها إنى أقترب كانت
مرفوضة تماماً.. عقلي الباطن جاب سيرة أهلى لمجرد التفكير..

وفي الوقت اللي عقلي الباطن رافض الفكرة.. كانت المئانة بتقولي..

"بشوفك بقى.. أنا مستحملك.. ومستحمله قرفك إنت وعقلك الزفت الباطن.. بس مش
حستحملك أكثر من كدة.. أنا عاوزة اطلق"

بعد المحايلة.. والوعد بالجواز..

قلت أيوووووة.. صح.. مفيش غير كنتاكي.. وهاتك يا هرس وسط حشود البشر مرة ثانية..
وصولا لكنتاكي..

- يا أخ الله يكرمك.. ما ترجنيش بجد.. أنا ماسك نفسى بالعافية.. رجة كمان وحفور زي
ازازة الكازوزة.

وصلت لكنتاكي.. اللي كان أذكى منى بكتير.. الحمام مقفول طبعاً.. لأنهم معندهم مش أي
استعداد ان حمام كنتاكي.. يبقى زي المراحيض اللي برة..

مفيش حمام..

طب أرجع المراحيض بقى..!!!

عقلي الباطن: مش حيحصل إلا على جثتي

المثانة: ابقى خللي زفتك الباطن يخزن هو بقى البيبي يا روح ستك

محاو لا الفصل بين السلطة العقلية والسلطة الإخراجية.. توجهت إلى الشارع زي المجنون..
أبص يمين.. أبص شمال.. أعمل إيه يا ربي..

خلاص.. على الترتووووووفة.. مش قادر..

أيوة.. يا ربي.. بيت ربنا.. الجامع.. الميضة..

- فين أقرب جامع يا عم ابوس إيدك..

- ورا هناك يا ابني

زحفا للجامع.. وأنا قافل رجلى منعاً أي تهريج بايخ من المثانة.. وعقلي الباطن منفصلي تماماً.. وصلت إلى الجامع بحمد الله..

لكن..

الجامع قافل..

ليبيبيبيبيه "صرخة شو بير"

الساعة تسعة.. صلاة العشا خلاص.. وقفلوا الجامع..

أروح فين بس الساعة دي يا ربي...؟؟؟

هووووووووووووووووووووووووووووووووب..

المثانة اعلنت انقلابا عسكريا على عقلى الباطن..

اوسكوت يا ابن الوارمة...

أصلاً أنا ما كنتش حلق أرجع للمراحيض..

أفكار كثيرة جاتني أثناء آخر نفس في مقاومتي للمثانة..

فكرت أعمل زي محمد هنيدي في رمضان أبو العلمين حمودة.. وخلاص.. وأقول إزاة مية وقعت على رجلى.. وخلاص بقى.. محصلش حاجة

بس عقلي الباطن رفض.. واحتفظ بأخر ما تبقى له من كرامة.. رافضا هذا المبدأ.. قبل أن تقوم مئانتى بغزه بالسكينة في ضهره وهو واقف يخطب خطب رنانة.. وتعلن سيطرتها على مجريات الأمور بعد اغتيال عقلي الباطن تماما..

وكاف اول بيان إذاعته المثانة من "مازيرو" ..

"جنب الحيط يا حبيبي.. اعمل بيبي حفاظا على ملابسك الداخلية.. وإلا سيضطر المجلس السمكرى إلى فتح كل قنوات الاتصال على مصرعيها مما سيؤدى إلى غرق البلاد فى مياه

الفوضى.. ومحدث حينفعك"

بلا وعي.. اتجهت إلى الحائط.. وبصيت ليه.. وكأني بقوله.. سامحني.. أنا مش كده

وهوووووووووووووووووووب

- انت عاوز ايه يا ابني؟؟؟ "واحد معدى"

- دورة مية إلهى تبقى رئيس الجمهورية..

- طب ما تخش دورة الجامع..

- الجامع قافل أهو يا حج..

- دورة المية مش جوة الجامع.. بص خشلهم..

أنا كنت أساسا جوة وهو بيقول الجملة اللي فانت في أقل من "سيت خطوات" متجردا من كل شئ.. محولا دورة مياه الجامع إلى فرع من فروع المراحيض العامة اللي موجودة في الميدان من أجل قتل الثوار بالغاز

أكرمنى ربنا وفكيت زنقتي.. واتعلمت حاجة مهمة جدا..

بعد كده يا حبيب قلب بابا.. أما تيجى نازل ميدان التحرير.. في ثورة بقى في فسحة في شنطة خضار

يا تكون عامل كل البيبى اللي في التاريخ اللي ممكن يتعمل..

يا تاخذ معاك عبوات بامبرز مقاس المسنين!! !

#مراحيض_مراحيض_نقول_لسة

#العقل_فى_مواجهة_الجسد

#المجد_كل_المجد_للبيبى

#بامبرز_المسنين

الاعتراف الثاني عشر

"بلاش التوووكة.. بلاش التووة يا ختالليiiiiiiiii"

فلاش باك.. أسبوع فات..

الرحلة الثانوية.. واللعب فى النادي..

كل يوم في الصيف.. كرة وسباحة وطائرة.. رياضة حتى الموت... لا اهتمام بأي شيء غير الرياضة..

على الرغم من إن في الوقت ده.. كان فيه اهتمامات أخرى لبعض الشباب بالجنس اللطيف.. البنات.. إنما أخوكم.. كان مسخرة أساسا.. سفا رنجة ماشية على الأرض..

أنا مالي أنا ومال البنات.. احنا فاضيين يا عم للسهوة دي؟؟؟

حد يسيب الكورة.. واللعب.. والرياضة.. ويروح يقضي كل يوم بليل في الجونية بتاعة النادي قاعد بيتكلم مع بنات!!!!

لا حول ولا قوة الا بالله.. إيه العالم دي!!

لحد زي ما انتو عارفين طبعاً.. يوم من الأيام الغبرة اللي ما طلعتلوش شمس.. جاني فيه "حسن" صديقي وقالى..

- شريف.. رانيا عاوزه تتعرف عليك

- رانيا مين؟؟ رانيا علوانى؟؟ بطة السباحة؟؟؟

- يا ابني رانيا لطفي.. أحلى بنت في النادي؟؟؟

- إيه ده هو النادي بتاعنا ده فيه بنات؟ كويس والله!!

- بتهرج؟؟!! ده نص النادي يتمنى تصبح عليه بس!!

- معقول؟؟؟ والنص الثاني يتمنى تمسي عليه.. صح؟؟؟ شربات انت يا ض.. شربات

- لا لا.. إنت اكيد مجنون.. أنا أساسا أما كلمتني عليك كان حيغمي عليا!!

- ليه؟؟؟ كانت واكله بصل؟؟؟

- يوووه.. بص.. تعالى شوفها عازرة ايه.. وياكش تولع في نفسك بعدها بقي.

وتحت الحاح صديقي اللطخ "حسن".. وتهديده ليا بأنه يحذف نفسه تحت عريية زبالة اذا رفضت أشوفها عازرة ايه؟؟؟ وتتعرف عليا ليه؟؟؟ رضخت.. إنما مش رضوخ كامل طبعاً..

توجهت.. للجونية.. وأنا في كامل رونقى.. شورت منتخب الأرجنتين بتاع السبعينات اللي كان مفتوح من الجنب لحد الصرة.. والفانلة.. "مش تيشرت" على أيامنا كان اسمها فانلة الكورة اللي ياققتها لو اتفردوا زيادة وانت بتجرى.. احتمال كبير تطير.. أو إن الياقة تلطش الواد اللي بيجرى جنبك بالقلم على وشه.

الخلاصة.. كان منظرى يموع نفس كلاب السكك.. ولكن.. هو ده اللي موجود.. وأنا مش بتاع وجع القلب ده أصلاً.. أنا فكرت أروح أقولها..

"قصرى عشان عندي فورة من ستة حبتبدي كمان ربع ساعة"..

إنما قلت برضو مفيش مانع من شوية لباقة وكياسة..

دخلت عليها وهى قاعدة وسط صاحبته اللي بالنسبة لشباب النادي.. كانوا البستان المشرق.. وملتقى العيون كل ليلة.. طبعاً كل اللي شافني داخل أكلهما.. كان متأكد انى أخرى أخرى.. اكون جاييلها بجنيه ترمس وبنص حمص من غير لمون من على العربية.

- مساء الخير يا رشا..
- احم احم.. مساء النور.. أنا اسمى رانيا..
- اه.. سورى معلش.. ازيك.. عاملة ايه؟؟
- تمام يا شريف والله.. انت أخبارك ايه؟؟
- لا تمام الحمد لله.. لسة كسبان فورة من أربعة من نص ساعة يا رنا والله..
- مبروووووك.. أنا اسمى رانيا على فكرة..
- هاهاهاه.. مش معقولة والله الواحد ذاكرته بقت جوليص خالص..
- ممكن يا شريف أنا عاوزاك في موضوع مهم..
- اه طبعاً.. تحت امرك.. عاوزة تلعبى معنا كورة؟
- كورة إيه اللي حالعبها؟!!!
- إيه؟؟؟ ليكى في البنج طيب؟؟؟
- يا شريف بنج ايه؟!!!!!!
- ما انت مش معقولة تكونى عاوزة تلعبى معنا جودو!! صعب بصراحة لسة حتشتري بدلة وشغلانة
- يا ابني افضل شوية.. أنا مش عاوزة العب حاجة خالص!!
- ايه؟! طب خير؟ في ايه يا راندا؟!
- رانيا على فكرة.. اسمى رانيا..
- شوف يا اخى الزمن.. معلش.. اخر مرة..

وطبعاً.. رانيا اخدتني على جنب عشان تحكى عن مشكلتها.. اللي ممكن أخصهالكو.. في إنها كانت من زمان معجبة بيا.. ومعجبة بأنى مش مهتم بالبنات بشكل عام.. ودى حاجة مش موجودة في الوقت ده.. وإن شكلى ابنى ناس.. وأكيد.. "ابابا" ربانى كويس.. وإنها من الآخر كدة.. نفسها نتعرف على بعض أكثر.. بس فيه مشكلة.. واحدة تعوق ده..

- خير يا راجيا؟؟؟ ايه المشكلة؟؟؟

- خدامتك رانيا! العادي كلها عارفة ان اسمى رانيا!

- سيبك من الاسم.. قوليلى ايه المشكلة وبعدين حنتصرف في موضوع الاسم ده..

- شوقي..

- ياااه.. شوفك ليا هو المشكلة؟؟؟ ازاي مش فاهم.. وضحيلي الله يكرمك عشان أنا متلخبط

- يا ابني شوقي.. شوقي صاحبي..

- شوقي مين؟؟؟

- اممم.. شوقي ده..

وشاورت بإيدها ناحية المطعم اللي الناس كانت بتشتري منه الأكل..

- فين ده؟؟؟ اللي واقف بيشترى من المطعم ده؟؟؟

- لا.. اللي قدامه..

للاسف الشديد.. شوقي ده طلع "المطعم" نفسه.. شوقي ده هى مسمياه كدة.. إنما هو كان مشهور في النادي باسم "الونش".. شوقي كان بياكل عيال كتير كل يوم.. وكان بيعسندو بيه الشجر اللي مايل...

شوقي كان بوطى جامد عشان يدخل من باب النادي.. وكان معموله خط سير معين في النادي عشان ما يدوشش العيال الصغيرة اللي راكبة عجل من غير ما ياخذ باله.. !!!

شوقى ده كان النادى كله.. وتقريبا المعادى كلها.. واحتمال شبه الجزيرة الهندية كانوا عارفين إنه مصاحب رانيا من سنين طويلة.. كتب التاريخ مكتوب فيها كدة.. وان أي محاولة لتغيير الواقع ده.. سيكون نهايتها عاهة مستديمة.. أو اسم يضاف إلى طلبات استخراج تصاريح الوفاة.. في خانة "المتوفي"

أتذكر إن آخر واحد سمعت انه حاول يتعرف على رانيا.. أهله سفروه يكمل علامه برة عشان يفضل عايش.. بعد ما شوقي كان حالف ياكل طحاله..

- طيب.. فرصة سعيدة يا رأفت..

- رأفت مين؟؟؟

- لا مش مهم الاسماء خالص دلوقتي... انتى عاوزة منى حاجة تانية؟؟؟!!!

- يا شريف يعني هو أنا غلطت اني عاوزة اتعرف عليك؟؟؟

إيه الإحراج ده بس؟؟!! أقولها إيه دلوقتي؟؟!! ماهى أصلها مش حتتفعني أما يكون شوقى السبب الرئيسي في إني أتجه لممارسة رياضة كرة الجرس بتاعة المكفوفين بعد ما يفقدني البصر من الضرب...!!! إنما برضو نظرة عنيتها كلها توصل.. وكأنها الأميرة المحبوسة في البرج العالي اللي مستتية بتاع الكثافة يجى ينده من تحت البرج عشان تدلله السبت..

هممم..

- طيب برضو يا رضوى.. مقولتليش إيه المطلوب؟؟

- بص.. أنا كا "رانيا".. مش عاوزة حاجة غير إنك ما تبقاش خايف منه ونقعد مع بعض

نتكلم عادى.. بس كدة.. فيها حاجة دي؟؟؟

- بصراحة لأ.. عادى يعني.. أصدقاء مفياهش حاجة..

- خلاص.. نتقابل بكرة هنا في نفس المكان بقى..

- خلاص اتفقنا يا روقية..

- رانیا

تاني يوم.. اضطريت أعذر للعيال اللي بلعب معاهم الفورة اللي من اربعة.. ووراهم الفورة اللي من ستة.. واعتذرت للشباب اللي بنزل معاهم حمام السباحة الظهر.. واضطريت ألغي ماتش البنج بونج.. وكلمت الكابتن استسمحه اني ما روحش تمرين الجودو..

ونزلت من البيت.. في كامل تأنقى بقی..

المنطلون الكلاسيك اللي واسع من فوق ونازل على ضيق.. والقميمص الأزرق.. والشاكت
الذى يجعلنى فاتنا زي رفعت اسماعيل قبل ما يتهرس في آخر اسطورة.. الله يسامحك يا دكتور
أحمد

وتوجهت إلى النادي.. عشان أقعد أرغي معاها في أي كلام تافه.. وأنا داخل على النادي وقربت خلاص.. كان في مشكلة واحدة كل تفكيرى..

ہی کان اسمها ایہ؟؟!! اسم..

- اجری یا شریییییییی

- فی ایہ یا حسن؟!!!!!!!!!!!!!!!!!!!!

- اجري يا شريف.. شوقي عرف انك مصاحب رانيا وحقيقتك..

- مصاحب مين؟؟؟؟ رانيا مين؟؟؟؟

- رانیا لطفی یا شریب

- لطفی مین؟؟؟ أنا مش مصاحب حد اسمه لطفی... أنا رايح اقعدي في النادي مع واحدة نتكلم

بس !!

- اللي وصل لشوقي انها خلاص سابتة عشان تتعرف عليك بعد انت ما قولتلها عنه إنه "بغل" وعقله فاضي.. وجسمه جسم تور إنما عقله عقل "دبانة".. وإنه معدوم الإحساس والرومانسية وإنك حتمسح بكرامة أمه الأرض!!

- إيه معدوم الفروسية دي؟؟!!

- رومانسية.. رومانسييية.. يعني حلوف..

- أنا مقتلش عليه حلوف.. هو اللي مولود كدة.. مين اللي قاله الكلام الفاضى ده..؟؟

- رانيا..

وهنا.. فهمت أنا بقى اللعبة.. وفهمت ان إلى ما تتسماش.. اختارت تغيط "التريناصور ريكس" اللي مسمينه شوقي ده.. بالشخص الوحيد في النادي اللي مش فاهم تقريبا.. وممكن يوافق.. وطبعاً.. نجحت خطتها تماماً في إنها تغيط شوقي.. وتخليه يستتاني قصاد باب النادي.. ومعاها صحابه.. وكأن الكونتير اللي جاي من الصين ده اللي اسمه شوقي محتاج صاحب كمان عشان يضريني!!!!

طبعاً.. شوقي اتحرك جنبى وحسن بيكلمني.. لأنه كان واقف من البداية.. بس أنا كنت فاكره شجرة قديمة.. وكنت أساساً حابتدي أسند عليه..!!! !

- انت مالك ومال رانيا يا زفت...

- رانيا مين سعادتك..؟؟؟؟ أنا اول مرة اسمع اللفظ ده أساساً..

- بقولك مالك ومال رانيا؟؟؟ عاوز منها إيه؟؟؟ انطق؟؟؟؟

- حضرتك والمصحف.. والمصحف الشريف.. أنا ما عاوز أي حاجة من أي حد.. أنا عاوز أعيش..

- بقى انت بتقول عليا بغل وتور ومعدوم الرومانسية؟؟!!

- إن شالله يا رب أطفحه لو كنت قلته... اللي قالك كده كذاب ابن كذابة..

- إنت كمان بتقول على رانيا كذابة؟؟؟! نهارك قطران..

وعنها.. تفضل شوقي مشكورا.. وخلع الحزام.. ودى كانت اول مرة اشوف "كبوت عربية" مربوط في طرف الحزام.. ويقولو عليه "توكة" الكدابين..

"بلاش التو ووكة.. بلاش التوو ووكة يا ختاااااااااااااااااااااا"

الضربة الأولى.. نزلت على الرصيف بعد ما تحركت بسرعة النحلة يمين.. هتكت عرض
الرصيف..

الضربة الثانية.. نزلت على الهوا.. لانى ساعتها.. كنت على حدود ليبيا..

شوقي نفسه انبهر إن في كائن بيتحرك بالسرعة دي.. وشهود العيان.. أقسموا إن كارل لويس لو كان شاف "الاسبرنت" ده.. كان قعد في بيتهم يشتغل تريكوه..

قبل ما شوقي يلبس الحزام.. كنت أنا فى البيت..

بعد مرور أسبوع وأنا مستخبي في درج المعالق بتاع "أماما".. كان صحابي ضغطوا على رانيا إنها تعترف للغواصة اللي ماشية معها بالحقيقة.. وفعلا.. قالتله..

الحمد لله.. شوقی شالنی من دماغه..

وأنا الحمد لله.. ما دخلتüş الجوزينة تانى لمدة عشر سنين..

#الله يسامحك يا راضية

#يمكن الكتالوج بتاع صاحبك عشان نشغله

#شوقى بينام فى بيت الزرافة

#الى عازرة تتعرف عليا تمضى كمبيالات

#سحقا للتعارف

#ان کیدهن عظیم

#حترّو حوا من ربنا فين

الاعتراف الثالث عشر

فترة الخطوبة.. ياااااااه ياااااااه على فترة الخطوبة.. الدنيا كلها حلوة وجميلة.. العريس رايح.. العريس جاى.. العروسة مستتية العريس.. العروسة خرجت مع العريس..
العريس جاى يزور أهل العروسة..
امسك..

طبعا أنا كشاب فخور بنفسى جدا.. لازم أما أكون رايح عند أهل العروسة.. أكون ملو هدى كده ولايس ومتأمع.. ويكون الواحد متألق كده.. عشان يبقى حلو في عين عروسته وأهلها..
كما هم الشباب الخطاب.. اتعزمت عند أهل خطيبتى.. على الغدا.. طبعا الكوارع والحمام المحشى والرز بالخلطة والملوخية.. حيكونوا في انتظارى على مأدبة الطعام.. حاجة تفتح النفس..
وصلت عند العروسة.. ودخلت.. سلمت على أهل البيت.. والعروسة كما هي عادتھا.. متألفة تألق الشمس في يوم شتوي بلا غيوم.. حاجة كده مريحة للنفس..

ريحة الأكل اللي جاية من المطبخ.. تخبل.. أنا مش حقدر أقاوم مرحلة إنهم يعزموا عليا واعمل نفسى مش قادر أكل والحركات القرعة دي.. أنا غالبا حعضعض في الأطباق الفاضية لحد ما الأكل يجي.. وحعمل سندوتشات مفارش سفرة

- "الله.. أو مال فين عمى؟؟؟"

سؤال طرحته أما لقيته مش موجود.. وعرفت إنه في مشوار وراجع حالا وعلى وصول
اهو.. - "انت مش غريب يا حبيبي.. وانت واحد من البيت"

والكلمتين اللي لازم تسمعهم من كل الحموات اللي بيحبوا عرسان بناتهم..

جميل قوي.. يا رب يتأخر عشان آخذ منابه من الرز بالخلطة.. "عقلي الباطن المفجوع"

المهم..

- "العروسة فين يا طنط؟؟؟ في المطبخ يا حبيبي.. ست بيت شاطرة.. واقفة واختها معاها
بتساعدها.. هي اللي عاملة الأكل ده كله"

برضو نفس البوقين اللي لازم تسمعهم في أي جوازة.. بغض النظر إنك في خلال الأسبوع
الاول من الحياة الزوجية بتتأكد إن معرفة مراتك بالمطبخ هي نفس معرفة العصفورة عن كيفية
تركيب القنبلة النووية!!! غريبة!!! ما علينا..

المهم.. قاعد في أمان الله.. في انتظار الولايم الممدودة..

وهوووووووووووووب

سريبيبيبيبي رهيبيبيبي... صادر من المطبخ..

فيه إيه؟؟؟ القنبلة النووية انفجرت؟؟؟ قصدى البوتجاز انفجر؟؟؟ في حاجة يا جماعة..

العروسة وأختها وأمها.. خارجين من المطبخ هربانين هروب المساجين من سجن وادي
النطرون.. ما بيبصوش وراهم أساسا..

"في إيه يا جماعة.. في إيه أنا كده اتوغوشت..؟؟؟ في حاجة حتنفجر طيب؟؟"

كنت منتظر طبعا.. إني أسمع إنهم اكتشفوا وجود 750 طن من المتفجرات على باب المطبخ
معدة للانفجار..

كنت منتظر أسمع إنهم اكتشفوا وجود مقابر جماعية للحمام المحشى في فرن البوتجاز.. كنت
منتظر إني أسمع إنهم اتفاجئوا بالتمثيل بالكوارع في حلة الضغط "البرستوم"..

لكنى مكنتش منتظر أبدا أبدا أبدا.. إنهم يبلغوني إن فيه كائن حي في المطبخ..

مبدئيا لو كان فار.. أنا كنت حاخذ بعض وأروح ويا دار ما دخلك شر.. وربنا معاكم يا جماعة.. أنا تجربتي مع الفران لا يمكن احتمالها..

لو قالولي فيه كلب.. كان حبيقى الوضع برضو مشابه لموضوع الفار.. بس ماكنتش حاخذ نفسى وأروح.. لأ.. أنا كنت حنط من الشباك عدل..

أي حاجة تانية غير الكائنين دول أنا مكنش عندى أي مانع أواجهها.. أسد.. تمساح.. خرتيت.. تريناصور ريكس.. رخ.. كل ده مقدور عليه..

"طالما مش فار ومش كلب.. إيه اللي في المطبخ؟؟"

سألت طبعا وأنا نافش صدرى وعامل فيها "هركليز" اما كان واقف مستنى هيكتور يخرجله من ورا أسوار طروادة عشان "يشندله".. كان ناقصنى عصايه مقشاة وغطا حلة.. ومحدث ساعتها كان حيفرقتى عن براد بيت..

أم العروسة فرحت بيا قوي على فكرة.. واطمنت إن بنتها حتكون عايشة مع "ال كابونى" في البيت.. اللهم صل على النبى..

العروسة طبعا.. للأسف.. عرفاني وخيزاني كويس.. وعارفة تجاربي المريرة..

بصت لي.. وقالتلي..

- "أظمن.. لا فار ولا كلب... دا صرصار".

أنا طبعا..

- "هههههههه.. خايفين من صرصار؟؟؟.. إنتو عليكمو هزار يا جماعة.. مش موووومكن والله.. مش موووومكن.. هههههههه.. شربات انتو والله.. "

- "طب خش موتهلونا.."

"- ههههههه.. يا جماعة عيب الكلام ده.. حقوم من الأنطريه.. وأروح المطبخ عشان أموت صرصار.. أنا عادة ما بتحركش غير أما يكون فيه ديب سحلاوى محتاج حد يموته.. بصو.. أقل من تنين مش حتحرك من مكانى.. هههههه.. أما انتوا عليكم حاجات.."

- "معلش.. خودنا على أد عقلنا.. احنا ستات.. وبنخاف من الحاجات دي.."

- "ههههه الأمر لله.. هو فين السبع؟؟"

وقمت بقى ونهضت نهضة الدب الرابض أما بيشوف أرنب.. وفردت صدرى وبقيت شبه الديك الرومى فوق قفص الفراخ عند الفراجى وهو منفوش وعمال يقول "بلولولولولوى.."

توجهت إلى المطبخ واثق الخطوة.. مفرد القامة.. وكأنى أنعى مسبقا الصرصار المرحوم.. الذى سوف يكون مصيره كلمة واحدة.. "سأسحقكم.."

دخلت المطبخ.. لقيت الصرصار حلو كده مربرب اللهم صل على النبي.. شاكله واكل ومتغذي كويس.. ومرمي على الأرض.. توجهت إليه بهدوء وثقة.. وأنا لابس الجزمة اللي حتكون كفته في خلال ثواني.. وبمجرد أن اقتربت منه..

هووووووووووووووووووووب

راح طائر..

شوفم.. شوووفم.. إحنا ما اتفقناش على كدة.. أنا بخاف من الفرن صحيح.. بخاف من الكلاب أي نعم.. إنما صرصار بيطير.

بيبيي كخ عل روعي فورا..

عارفين لو مش بيطير.. ولا يفرق معايا.. آخره.. حيستخبى في الغسالة الحقير.. إنما بيطير.. ممكن يدخل قفايا.. أضرب نفسى بسكينة بلا تردد..

طبعاً.. بمجرد إنه طار.. وقبل ما جناحه يضرب الضربة الثانية.. كنت أنا عند باب شقة العروسة بقولهم ان أنا جالي تليفون مهم بيطلبني إني أروح في أي حطة بعيد عن الطبخ.. أي نعم التليفون ما رنش.. بس معلش.. أنا حاسس إني لازم امشى فورا..

العروسة بقى.. ومامتها.. وأختها.. بصولى بصة مفادها..

"الرجالة ماتوا في الحرب صحيح.."

وأنا بصتلهم بصة مفادها.. ولا أي اندھاااااااش.. ايوة.. ماتوا في الحرب الله يرحمهم.. ابقوا دورو على واحد ما ماتش يموت الصرصار بمدافع مضادة للطائرات.

ده صرصار بيطير مش أي كلام.. ده احتاج يترقى ست ترقيات قبل مرحلة الطيران
أساسا!!!

بعد الأخذ والرد.. والمداومات وأنا مش عاوز أسيب اوكرة باب الشقة.. وبعد مرور ما يقرب من ربع ساعة محايلة.. أسئلة من العروسة.. وتبريرات مني لا تمت للمنطق بصلة من قريب او من بعيد..

قررت إنى استشهد فى المطبخ قصاد الصرصار.. حفاظا على ما تبقى لى من كرامة..

إلهي يحرقها الكرامة اللي تخلى بني آدم يقف في مواجهة صرصار بيطير..

أساساً ده شكله من العصر "الخشبي".. شكله محتاج حزام ناسف عشان يموت..

ده طار طيران يدل على إنه يلعب جومبار من انتشار سنة..

أنا حاسس إنه ممكن ياخدني ويطير من شباك المطبخ اللي دخل منه الله يحرقه ويطلب من أهلى فدية عشان يسيبنى!!!

- كان لازم يعني تفتحوا شباك المطبخ؟؟؟

سؤال ألقينه على المشاهدين اللي فطسانين على روحهم من الضحك وأنا بجرجر رجلي على المطبخ..

وقفت على الباب ثواني.. تذكرت كل اللحظات الجميلة اللي عدت عليا في حياتي.. تذكرت كل أصدقائي.. حزنت إنني مش حلق أفرح بشبابي.. قرئت الشهادة.. ودخلت المطبخ.. ووقفت عليّ الباب من جوة..

الدقائق تمر ببطء.. والصوت الصادر من المطبخ.. يدل على إن فيه فض اعتصام جوة..

عدت نص ساعة.

وخرجت..

استقبلتني أم العروسة بسؤال وهي مفزوعة..

- "يا خبر اسود.. إيه اللي على هدمك ده؟؟؟"

- "لا ياطنظ دى حلة الملوخية.."

- "وايه يا حبيبي صوت الصويت الرهيب اللي كان في المطبخ ده؟؟"

- "لا يا طنط ده الصرصار التافه كان بيحاول يستغيث بالجيران بس أنا ما ادتلوش فرصة"

- "موتہ یا حبیبی؟؟؟"

- "هرب الجبان من الشباك بعد ما هزمته في معركة التحطيب"

- "طوب الحمد لله.. يعنى ندخل نكمل تحضير الاكل بقى؟"

- "لا.. انتو ممكن تجيبو العيش ونقعد نفت فيه فى أرضية المطبخ أوقع.. أو فى حل أنصف..

هاتو العيش وغمسو من على البلوفر اللي أنا لابسه"

#اللياقة والاولمبية والوكسة

#صرصار إف سبعتاشر

#اين المنجنيبيينييق

#ليه دايما بواجه مخلوقات مفترسة

الاعتراف الرابع عشر

لما تحب تتكلم عن الفروسية.. يبقى تذكرنى بكل فخر وعزة وكبرياء.. لما تحب تعرف حاجة عن ركوب الخيل.. تجيب كرسى.. وتقعّد قصاى وتسمع وتكتب اللي حقولها فى أجندة.. لأن ده حىكون مرجع هام جدا لفرسان المستقبل..

خصوصا أما تعرف كويس قوي.. إنى طول حياتى.. ركبت "حصان" مرة واحدة..

هى كانت كفاية إنى أتعلم كويس كل حاجة عن "الاحصنة".. وإنى أعرف أتعامل مع "الحوصنات" كويس قوي قوي يوم "موقعة الجمل"..

شلة الشباب الفاسد.. فى مرحلة المراهقة..

شلة الشباب الفاسد.. عاوزة تخرج..

شلة الشباب الفاسد.. عاوزة تروح حتة تتطلق فيها..

شلة الشباب الفاسد.. عاوزة تقضى اليوم كله من أوله لحد آخره...

شلة الشباب الفاسد.. قررت تروح "الهرم"

وإذا ذكر الهرم.. ذكر ركوب الخيل..

وإذا ذكر ركوب الخيل.. أسيبكم أنا وأروح بكرامتى.. بدل ما اليوم يبوظ

أنا مفيش عمار بيني وبين الاحصنة.. فيه بينا مشاكل وراثية متراكمة من زمان..

ومرورا بكل المرات اللي حاولت فيها أحسن علاقتي بيهم إلا إن رد الفعل كان هياج عصبي
وكأنني بحاول آخذ مكانه على عريبة العرجي واقطع أكل عيشه!! أو انى مثلا طمعاف في حدوته
اللى فى رجله وعاوز امشييه حافى..!!!

"یا لا نرکب خیل"

"يا جماعة الناس بتوع الخيل حيسرقونا.. ومش حىخلونا نستمتع أنا عارفهم"

"لا أنا أعرف واحد هنا في النزلة صاحب أبويا وأبويا مكلمه.. وحيدينا الخيل لحد ما نزهق وببلاش كمان"

الكل هلل.. الكل انتطط من الفرحة.. الكل ابتسم فرحاً..

وأنا زيهم.. هللت معاهم.. "يا ختاناااااااااي"

انتظت معاهم.. "والنبي أنا مش عاوز اموت"

ابتسمت معهم.. "أنا عاوز اشوف أماما قبل ما اتهرس تحت أقدام المحاصيين"

توجهنا في مشهد مهيب.. في موكب رهيب.. وأنا ماشي رافع السبابة وعلى جملة واحدة لا تتغير..

"لا إله إلا الله"

إلى أن وصلنا إلى النزلة.. اللي المشهد الصحراوي المفتوح من وراها مميز.. وجميل..
فكرت أقولهم.. طب اركبو انتوا الاحصنة وأنا حجرى وراكم برجلي.. بس حسيت إني حيبقى شكلي بايخ قوي.. ومهين

فكرت أقولهم أنا عندي تسلخات ومش حقدر أركب معاكم.. بس أنا بلعب من الصبح زي الناس والحجة حيبقى شاكلها ماسخ برضو..

فكرت للحظة أعمل دايخ ويصيني إغماء اصطناعى مفاجيء.. بس كان السيف قد سبق العزل.. وأتى ملاعين النزلة.. بمجاميع من الاحصنة..

كل فرد من القروء اللي أنا مصاحبهم.. نط معتليا سطح حصان من الاحصنة..

ولم يتبق على الأرض إلا شخص واحد.. وحصان واحد.. "بحبك قوي أماما.. الوداع"

طبعا.. بيبقى معروف انه في مثل هذه المواقف.. لازم الحظ يتخلى عنك تماما.. لازم كل حاجة في حياتك.. تتحول إلى لوحة مكتملة الألوان والأركان تقعد تحاول لسنوات تفكر ازاى اتجمعت كل المصايب دي في موقف واحد فتفشل في التبرير لنفسك..

الحصان كان تقريبا "حصان طروادة" حجما... "حصان عنتره ابن شداد" لونا..

كان محتاج سلم عشان تطلع عليه.. ومحتاج كشاف عشان تشوفه من كثر السواد.. ومحتاج مهدئ طبعا لأن الصوت نفسه كان يدل على إنه خلاص.. ناقصله دقيقة وينفجر زي العبوات المتفجرة اليدوية الصنع..

توجهت إلى الحصان وأنا فارد جسمى.. متخذا الطريق اللي بيسموه "المنطقة العمياء".. وهى المنطقة اللي مش ممكن الحصان يلمحني منها.. إلا لو كان عنده عنين في الحشفة.. وهوووب..

بقفزة عز الدين بيبرس.. "مش كان اسمه عز الدين باين؟!!!" اعتليت سطح الحصان.. جمب المنشر والايريال كدة.. هو أي نعم.. عالي ومرتفع.. لكن.. أنا معنديش استعداد أخاطر إنه يشوفني.. والرعب ده كان كفيل بإني أتحرك بناء على أساسه..

ركبت على صوت "فهد بلان" يتردد في أذني وكأنه الصوت الأخير في تاريخ الجنس البشري..

"وركبنا عالحوصااا.. واتنيلنا سوى".

عارف يا حبيبي.. عارف إننا اتنيلنا.. اصبر على رزقك.. الله لا يسيئك

مسكت اللجام.. وابتديت أعمل زي ما بشوف في الافلام..

- كيك.. كيك.. كيك

- يا كابتن ده حصان.. مش حمار

- نعم؟! آه..؟؟ هاهاها.. لا ما أنا عارف طبعاً.. أنا بس بالعب معاه

- تلعب معاه؟!!! نهايته.. حضرتك اطلع بقى

- ما أنا طلعت خلاص.. هو الحصان ده ليه دور تانى؟؟

- يا كابتن اطلع ورا صحابك من الباب اللي هناك ده

- آه.. هاهاهاها.. طيب.. حاضر.. من عنيا.. بس كدة؟؟؟ حالاً.. دلوقتي أهو

- هو حضرتك ما بتعرفنش تركب خيل؟؟ الحصان ده شديد على فكرة.

- إخرس!!! انت بتكلم شكرى سرحان في فيلم رد قلبي قبل ما يتكفي على الأسفلت من فوق

الحصان.. بص.. قولى بس.. بيشتغل ازاي؟!

- أنا حطلك برة.. وهو إما يشوف باقي الخيل حيثحرك وراهم

الله يكرمك يا عم.. ويوقعك في ولاد الحلال.. ويكتبلك في كل خطوة سلامة

وفعلا.. الراجل سحب الحصان.. وأنا فوقيه.. وتحولت في هذا الشهد إلى ليلي مراد وهى تشدو "اتمايلي واتمخطري يا خيل" ..بس من غير كنيش

خرج الراجل من الاسطبل.. ومن أمامه.. ظهرت الصحراء المفتوحة.. وفى الأفق.. كانوا الكلاب أصحابى منطلقين بالخيول.. وكأنهم راكبين عجل عادي.. طبعاً.. أنا قررت إنى أسيب الحصان في حاله.. وإنى أكون مجرد شوال بينقله في المكان اللي يحبه فخامته.. وإلا أكون عبء عليه تحت أي ظرف.. حتى لو حموت مش حنطق.. لحد ما نرجع.. ويا دار ما دخلك شر.. وتبقى دي بداية علاقتي الطيبة بالـ "حصاصين" الحلوين..

لكن ازاي؟؟؟؟!!!! هو أنا بتاع الكلام ده برضو؟؟

الراجل صاحب الاسطبل.. قرر إنه يزق الحصان.. ويضربه على "البوبو" ضربتين.. ويضرب بالكرباج ضربتين في الهوا - يا ريتهم كانوا نزلوا على ضهري وخلصت - عشان "يحفز" الحصان على اللحاق بالسرب.. ومعاها "يحفر" غدد البيبي عندى على إنها تاخذ وضع التأهب لإنى في ظرف لحظات حاعملها على روعي من الخضة..

وانطلق الحصان.. وانطلقت معه صرخاتي.. صرخات فارس..

مش عارف ليه فجأة قفز إلى ذهني.. مشهد عنترة وهو رايح يجيب "النوج الحمر" من عند السلطان النعمان.. بس المشكلة إن عنترة ما كانش بيلطم في المشهد ده وهو سايب اللجام.. وعمال يقول

"ياختناaaaaaaaaaaaaaaaaaaaaaaaaاى"

و لا كان في ناس واقعة في الأرض من الضحك على صوت سريخه.. غريبة قوي!!

انطلق الحصان.. وبعد حوالي اتنين كيلو من الرجرجة.. حسيت إنى بقيت شبه كوباية الميالك شيك بتاعة ماكدونالز...!!! خلاص.. أنا مش قادر.. الحصان عمال يجري.. وأنا خلاص.. تقريبا "سقطت" .. أنا محتاجه يهدى بس.. وأنا حفتح الباب وأنط.. فين أم أوكرة الباب؟؟

حصان ما شاء الله.. واخذ فياجرا.. قرر إنه يلف بيا في الصحراء الغربية شوية.. وبعدين
يوصل لحدود موريتانيا.. ومفيش مانع من زيارة الأخوة الأشقاء في جوهانزبرج..

أنا خلاص.. بتحول إلى "جودا أكبر" أما انضرب سهم في كتفه.. وفي طريقي إنني أدلّل من
على الحصان زي اللجام بالظبط.. لحد ما لقيت الحصان متجه إلى "حافة جبل"..

أي والله العظيم يا سلطان زي ما بقولك كدة..

حافة جبل..

طيب.. أنا لو قفزت بالسرعة دي.. حموت..

ولو وصل لحافة الجبل.. مش متأكد حقدر أعمل زي "اميتاب باتشان" في فيلم "مارد"
وأطير بالحصان والا لأ.. وغالبا برضو.. حموت..

هنا كان لا بد من التدخل..

قبل الوصول إلى حافة الجبل.. بحوالي خمسة متر.. كنت مسكت اللجام.. زي ما بشوف في
فيلم الناصر صلاح الدين الفيومي.. وبشده عشان الحصان يقف.

طبعا الشدة كانت شديدة.. مع السرعة..

الحصان.. وقف على قائمته الخلفيتين.. قبل الحافة بمترين تقريبا..

وبدا المشهد في غروب الشمس مهيبا..

أنا راكب الحصان.. والحصان واقف.. على حافة الجبل..

ناقص في الخلفية صوت "مارك أنتوني وتينا ارينا" وسمعتني أحلى أغنية..

أشوفك محروق يا زورو بحق جاه المصطفى..!!!

دي اللحظة الوحيدة اللي الحصان وقف فيها... ودى الفرصة اللي كنت مستنيها..

"أليبيبيبي.. هووووووب".. باك سمر صولت.. ونزلت من على الحصان..

ودي كانت غلطة جديدة.. الحصان لف.. وشافني.. وابتدى يتمشى ورايا.. أنا فهمت بقى!!!
فابتديت أجري..

"ياختاااااااااااااااااااااااااااااای."

وهو برضو ماشی بهدوء ولسان حاله بیقولی..

"حتروح مني فين..؟؟؟ دي صحرا يا ابن العبيطة".

وبعد فترة من اللحاق بيا.. زهق.. ووقف.. أو تقريرا صوعوبت عليه..

وأنا بقي..

حاملا تسلخاتي.. وكدمات الحوض اللي توضح بكل تأكيد إن علاقتي بالأبوة شبه منتهية..
 قطعت العشرة كيلو اللي تفصلني عن الشيء الوحيد اللي شايفاه عيني.. "الهرم".. ماشيا..

حقوقی طب و الحصان..؟؟

حضرتك الحصان رجع الاسطبل من 7 ساعات..

وبالنسبة ليوم موقعة الجمل.. واجهت الحصان بكل خبرتي.. بكل شجاعة..

جريت بلا وعي.. أكنى شفت أسد

#انا الى علمت احمد مظهر ركوب العجل

#حبیبی یا عاشق یا برص زی الطیر

#ماسکو بف زورز

#عنتر عنتر اوعى يجيياك عنتر

الاعتراف الخامس عشر

الحب.. يااه على الكلمة دي.. الحب خلانى أجري من المعادي لحد العجوزة عشان أروح
جامح المغفرة اللى ورا مسرح البالون.. أشوف فيه حبيبتي اللي بتأخذ هناك درس قرآن أسبوعي..
واستناها وهي خارجة.. بس عشان أشوفها.. ألمحها.. تضحكى.. فا تضحكى الدنيا كلها..

ورغم إني متأكدك على الآخر.. ولايس بنطلون كلاسيك.. وقميص وبليزر..

ورغم أننا كنا في عز الشتاء.. في عز البرد.. في عز المطر

إلا إني كان لازم..

أجرى بسرعة.. لأن الدرس بيخلص بعد المغرب على طول..

أجرى بسرعة لان المغرب أذن فعلا.. أدخل جرى وأصلى المغرب جماعة..

وبعد ما أخلص.. يا سلام على الأحاسيس.. أبص ورايا.. عشان أشوفها اما تخرج..

لكنی بصیت..

ملاقيتش الجزمة..

لا مش حبيبتى أقصد.. أنا قصدى ملاقيتش الجزمة بجد..

یاختااااااااااااااااااای

طب أنا حاعمل إيه دلوقتي!!!!

إليه الموقف الزبالة ده؟؟؟؟!!

ده أنا لسة تلموذ صغير مفيش في جيبى غير 35 قرش تمن تذكرة الميني باص اللي حروح بيه؟؟؟.. طب حمشى بيه ازاي وسط النظرة دي؟؟؟ يا دي الليلة الكويتية يا ربي..

طب حقابلها ازاي؟؟؟ لو شافتني كدة.. يبقني ده حكم بالإعدام على العلاقة لإنها حتتأكد إنني ابن بواب أكيد وأنا حافى كدة!!! وطول النهار باجري حافي في الحارة.. خلاص.. أنا مش لازم أشوفها النهاردة.. أحترم نفسي أحسن.. وأروح

فضلت ألف جوة الجامع.. أسأل هنا.. وأسأل هناك.. أسأل المصلين.. وأسأل الإمام..

لحد ما صعبت عليه.. غاب دقائق.. ورجعلي بالحل

القبقاب..

يا خبر اسود ومنيل...!! !!

قېقاب..؟؟ طب البسه ازاي على الشاااااكت؟؟؟ طب أروح بيه ازاي؟؟؟

ده مصنوع من خشب مستقطع من جذع شجر الماهوجني الاستوائي اللي بيتميز بالصوت العالي أصلاً.. تستخدم في عمل الطبول في شتى أنحاء العالم.. ولكن في مصر.. تستخدم في عمل القباقيب

خشبة طويلة.. أطول من القدم بكثير.. وأرفع منها طبعاً بكثير..

أكد دي كانت طريقة هامة لتعليم البهلوانات المشي على الحبل في الأزمنة الغابرة..

طبعاً الخشب دي كان متمسك فيها حتة جلد تمساح.. وaaaaاالسعة.. مووووووووت..

دي لو كانت رجل العالقة اللي في حكايات جاليفر حيبقى واسع عليهم نمرتين ثلاثة على الأقل..

أنا فكرت للحظة ألبسها في فخادي..

بس أثرت السلامة.. وحطيت فيها وش رجلي.. وبقيت ماشي زي اللي ماشي على الفحم..

يقع منك القبقاب مرة.. تقع انت من القبقاب مرة.. كده يعنى..

شكرت إمام الجامع مع وعد لطيف إني حرجع القبقاب.. وهو بحلف بأغلظ الايمان إنه ما هو راجع.. وشكله غالبا كان بيتخلص منه وما صدق لبسهولي..

وانطلقت في رحلة العودة من العجوزة إلى المعادي.. مرتديا ذلك الزي الذي يجعلني فاتنا.. وراكبا ذلك المركب الإيطالي المسمى إفكا بالقبقاب..

فكرت للحظة أخذ عصاية من الشارع واقف فوق القبقاب زي سواقين المراكب في المدينة العائمة.. فينيسيا الإيطالية.. وحيقئ مشروع يجنن في المطرة دي.. وأهو تنشيط للسياحة..

وصف تفصيلي بقى..

مبدئيا.. صوت القبقاب في كل خطوة كان كفيل إنه يصحي الأموات.. ويموت الصاحيين..

مع كل خطوة الناس كانت بتعتقد إن فيه عجلة عربية فرقعت.. فتبصلى مخضوضة.. وبعدين تفهم...

تفهم إيه؟؟

تفهم إن فيه واحد مجنون من المجاذيب ماشي في الشارع جنبها..

صوت ارتطام القبقاب بالأرض الممطرة في شكل برك مائية.. كان بينطور المية على العربيات اللي ماشية.. مش العربيات هي اللي كانت بتتنطور مية عليا.. عيب عليك

الشاكات مع المنطلون مع القميص مع القبقاب اللي لابسه عل الشراب كانوا عاملين كونتراست ابن جزمة لدرجة إن فيه ناس شبه أغمى عليها من الضحك على منظري..

انتظرت الميني باص رقم 70 اللي بيعدى ويروح المعادي.. أكثر من ساعة ونص على المحطة.. والناس بتعدي عليا.. تضحك وتمشى.. تروح تنده صاحبها.. وييجو.. يضحكو ويمشو.. يجيبو أهاليهم.. يضحكو ويمشو..

كان فاضلي دقائق قليلة.. وابتدى أقطع تذاكر للمشاهدة.. وأنافس السيرك القومي واسحب منه المتفرجين

إنما الميني باص وصل الحمد لله.. حاملا حى العجوزة والمهندسين وامبابة بالكامل.. وما وقفش كمان في المحطة زي عادته.. وكمل مشي ولا أكن فيه نسناس بابوني واقف على المحطة لابس شاكيت ومنطلون كلاسيك وقميص عليهم قبقاب بني بجلدة سودة..

ابدأ معايا في التخييل.. واحد لابس شاكيت.. ومنطلون كلاسيك.. وقبقاب.. بيجري ورا ميني باص مليون وعمال يدوس في برك مية ويطرطش مع صوت ارتطام القبقاب بالأرض في خطوات واسعة كقفزات الغزالة في محاولة للحفاظ على القبقاب اللعين في متناول القدم.. ده غير إن الشراب بعيد عنكم بقى عبارة عن سفنجة حفاضة بتمتص المية من الشارع زي عربية شفط المياه بالظبط.. ياريتنى كنت قبعته مع الجزمة واتسرق هو كمان وخلصت

ربنا وفقني ولحقت الميني باص.. واتشعبطت في ناس كانت مدلدلة من الباب.. عافرت لحد ما دخلت الميني باص أنا والقبقاب.. ومن الزحمة.. الناس هرست صوابعى.. بلا رحمة.. ومع اقتراب الميني باص من نهاية الخط.. بدأ يفضي.. وبدأت الناس تشوف إيه اللي بيطرقع ده..

السواق وقف الميني باص تسع مرات وبقي ينزل ينام تحت الميني باص في المية عشان يشوف الصوت ده جاى من الماتور والا من عامود العجل؟؟؟ وأنا عامل عبيط..

وصلت البيت.. طلعت ودخلت الشقة.. وكنت في شبه حالة انهيار من البرد والمطر والقبقاب..

ودي كانت نهاية حكايتي مع القباقيب للأبد.. إلهي يقطع الحب وسنينه

إيه؟؟؟ نعم؟؟؟

القبقاب؟؟؟!! مالو؟؟؟

لا دة ساندين بيه التلاجة لحد النهاردة.. بدل عجل القاعدة اللي اتكسر

#قباقيب_قباقيب_نقول_لسة

#الحب_والعشق_وحرامية_الجزم

#السيرك_القومي_طلبني_لاداء_فقرة_ثابتة

#انا_بصلى_بالجزمة_من_يومها

الاعتراف السادس عشر

يوم شم النسيم والخروج في يوم شم النسيم.. ذكريات الفسح والجنائين والبيض الملون والجو الجميل.. اليوم اللى الناس كلها اعتادت تحتفل بيه من زمان..

اليوم اللي ليا معاها أحلى ذكريات جميلة.. طبعاً الكلام ده لحد ما "أبأبا" قرر إننا لازم نحقل بيه بشكل جديد.. ما هو لازم حاجة تبوظ ذكرياتي أنا عارف..

- یا بشر یٰۤاَیُّهَا الَّذِیْنَ اٰمَنُوا

- أفنظم أبابا

- قول لآخواتك إننا نحتفل بيوم شم النسيم السنة دي فى وادي الريان

- الريان؟؟ مش اتقفش الرجل ده أبابا من مدة وخسرنا فلوسنا كلها فيه؟؟؟

- إخرس يا حيوان.. ما تفكر نيش.. جتك الهم.. واللى ادي الريان بقول يا جاهل

- وایا ادي قعدة.. مش فاهم.. ده ايه دا أبابا؟؟

- مفیش فایده.. جاهل.. قولہم بس.. وقول للبغال اخواتک تجهز

- حنجهز البغال أبابا.. حاضر أفنظم..

وفي صبيحة يوم الاثنين.. قفلنا التليفزيون اللي كان جايب سعاد حسنى عمالة تغني لحد أما نفسها اتكرش..

"الدنيا ربيع والجو بديع.. وأنا حاسة ان عمري بيضيع قفل قفل قفل قفل".

"أبأبا" مأنجش "اماما" ونازلين من البيت "صلانسيه" في خطوات ملكية زي استقبال ملوك النرويج لتجار أتواب القماش بتوع الوكالة.. واحنا وراهم.. واحد فينا شایل "الكولمان" على قلبه.. والتاني "شایل كراسي البحر اللي بتتقرد وتنتى".. وأنا شایل "كيس الملوحة والسردين والرنجة".. وماشي بيه زي خبراء المفرقات ما بيثيلو مادة السي فور الشديدة الانفجار..

ركبنا العربية على دقات التاسعة صباحا.. وانطلقت بينا العربية في أول أيام الصيفية نواحي الجيزة ومن بعدها شارع الهرم ثم ميدان الرماية.. ومن وراه طريق الفيوم.. وعدينا.. ودخلنا بقى من قلب الفيوم للوصول إلى وادى الريان اللي "أبأبا" أول مرة يروحه لأنه سمع إنه مكان جميل.. وفيه شلالات.. ومحمية طبيعية..

طبعا أبأبا كان خايف إن يكون فيه أمن هناك لأنهم أكيد كانوا حيعملولو مشاكل وهو مروح لأنه واخد ثلاث حيوانات من المحمية ومروح بيهم.. وانه مكنش حيقدر يقنعهم إن الحيوانات دي ولاده..

إنما.. كل ده كان سابق لأوانه بكثير.. وده لإن العربية القديمة نفسها.. وفي تمام الساعة العاشرة والنصف صباحا.. أعلنت لفظ أنفاسها الأخيرة.. والموت ميكانيكيا.. وتوقفت بينا بفعل القصور الذاتي على جانب الطريق.. في وسط الطريق الزراعي اللي على جانبه التربة اللي البلهارسيا فيها بترعى..

طريق رايع جي.. لا يقطعه إلا لواري الستينات كل ربع ساعة من جنب العربية هواها حيطيرنا..

الخماسي العائلي اللطيف جلس في العربية.. عشر دقائق صمت عدت..

محدث بيتكلم.. الصدمة كانت عنيفة

نظر اتنا كلها كانت كفاية بتتكلم.. وبتقول في صمت "والمصحف حرام عليك أبأبا.. مش كنت سبتنا محمودين أحسن"

"مالها القناطر بس أبابا؟؟ كفرت؟؟ لازم الفتى يعني يوم الأجازة؟؟"

"ايه العمل بقى دلوقتي؟؟؟ أنا شايف نعيش في المكان ده ونكون مجتمع عمراني حديث"

وكان رد "أبابا" على أفكارنا.. اللي واضحة في ملامحنا

- اخرس يا حيوان منك له..

- احنا ما نطقناش أبابا!!!

- بقولك اخرس بقول

- حاطر أفنظم..

- ياللا خلصوني

- ياللا ايه أحاج؟؟

- ياللا انزلو زقوا

- نرق مين أبابا؟؟؟؟؟؟؟؟؟؟؟؟؟؟

- ياللا يا حيوان منك له.. أومال أنا مخلف بغال ليه!

- حاطر أبابا.. حاطر يا مخلفنا عشان تهينا

- بتقول إيه يا حيوان!!؟

- لا أبابا دا أنا بقول إني بحب الزق قوي.. من وأنا صوغنن

وبالفعل.. اتسرسبنا أنا والغلبة اخواتي من العربية.. وعلى وشوشنا آثار استقبال يوم على ما يبدو أنه سوف يذكره التاريخ كذكره ليوم إلقاء الامريكان للقنبلة النووية على مدينة "هيروشيما" ومدينة "نجازاكي" في الحرب العالمية أو العالمية وخمسين.. مش فاكربصراحة.. وبدأنا الزق في استسلام.. وبدأنا الغناء التشجيعي الحماسي أنا واخواتي..

- مفيش فايدة.. بغال ولا فى ريحة تحمل للمسؤولية

- لا بس ريحة القتيل اللي طالعة من شنطة العربية.. مغطية على ريحة المسؤولية أبابا

- يا انااا خبر!! نسيت الملوحة والسرددين دا زمان الحر بوظهم.. انااه يا حيواااااااااااا

- وأنا مال أمي اللي قاعدة في العربية أبابا؟؟!!

- مفيش فايده.. الواحد ما بعتمدش عليكم في حاجة أبدا.. برربي بغال

- جعانين أبابا.. اعووووو

اخرس يا حيوان.. وروح شوف الحاجة اللي في الشنطة بسرعة

- حاضر أبابا

ويا ريته كان قالي ارمى نفسك في الترة عشان تكون فريسة للبلهارسيا كان بقى أرحم.. رحت فتحت شنطة العربية.. وكأنى فتحت بلاعة مقفولة من أيام معركة عين جالوت.. الرنجة نفسها كانت قربت تتخنق من ريحة الملوحة والسردين.. وكأن الحكاية ناقصة عفن أساسا!!!!

أخذنا الكيس أنا واخواتي.. ورفعناه من شنطة العربية.. ووصلنا بيه لحد أبوابا اللي قاعد على شط الترعة على كرسي البحر اللي بيتفرد ويتني

- ايبيبيبيبف.. ايه الريحه دي يا حيوان

- والصحف ما ريحتي أبابا..

- خلاص.. الحاجة دي باظت.. مش حينفع ناكلها.. إرميها..

- أرميها فين بس أبابا؟؟

- شوف أي صندوق زبالة ارميها فيه

- أبا احنا مش فى الحديقة الدولية.. احنا على الترة.. صندوق زبالة إيه دلوقتي؟

- اتصرف انت والبغال اخواتك

- حاضر أفنظم

شيلنا الكيس أنا واخواتي.. من الأطراف.. وابتدينا نمشي بيه على الطريق المسفلت.. وكأننا شايلين جثة خروف دهسته عربية نقل على الطريق.. كل واحد شاد من حته.. والريحة بتوقع ورق الشجر اللي بنعدى من تحته..

طبعاً لا فيه صناديق زبالة ولا زفت احنا عارفين.. بس اهو بندور على حته ندفن فيها الحفنة.

لكن...

ريحة الجيفة.. اجتنبت مخلوقات تانية..

مخلوقات جعانة.. وإيها أسنان.. وبتيهو هو.. وأول حرف من اسمها "كلاب مسعورة"

طبعاً.. مع أول صوت "هاو هاو هاو هاو" خرج من وسط الزراعات

[illegible]

وهاتك يا جري وسط الطريق.. واللواري بتضرب النفير لاننا خلاص حنبقى تحت العجل
في ثوانى.. وحتعامل معاملة الكلاب البلدي اللي منفخة على جوانب الطريق من الهرس
رجعنا لـ "أبابا" اللي قاعد على شط التربة وكأنه أنور وجدى في فيلم "ليلى بنت الأغيبا"..
ولاااا هو هنا..

إنما.. كان فيه بارقة أمل جديدة.. عربية نص نقل.. بتربط عربيتنا بسلبية.. بعد ما اتفق معاها "أبابا" إنه يقطرنا للبيت.. اللهم لك الحمد.. الحمد لله رب العالمين..

بوق مية بقى نبل ريقنا.. حنمووت من العطش من الصبح.. فيبين أم الكولمان..

ابہ؟؟؟

الكولمان فاضى؟؟؟!

[illegible]

- أبابا فين المية؟؟؟

- شربت أنا وممكم.. وخطينا المية في "ريدانير" العربية عشان كان الماتور حيولع

- طب واحنا أحاج؟؟ فلذات أكبادك؟؟ مفيش منديل مبلول حته؟؟؟؟

- اخرس يا حيوان.. كلها ساعتين ثلاثة ونوصل البيت وابقى اطفح زي ما انت علوز

[illegible]

#نحن غرابا عك عك عك

#الموت عطشا او عضا او زقا

#حتموت حتموت

#ما لمحناش وادی الريان

#باز_اليوم_والاكل_والشرب

الاعتراف السابع عشر

في سنة الفين كنت لسة موظف يا دوب باشتغل مكملتش ثلاث سنين..

كان عندنا في الشغل بروجكت كبير جدا.. والحمد لله.. خلصناه بامتياز..

وتقديرًا لمجموعة الموظفين الجذعان.. اللي من ثقافات مختلفة..

قرر مديرنا الله يمسيه بالخير.. إنه يعزمنّا على عزومة محترمة جدا.. في مكان جديد جدا
بالنسبة لي

المطعم الايطالي - اللي في فندق الكونرد..

"حماية" جامدة من بتاعة العيد.. المنطلون الكلاسيك اياه - بتاع القبقاب - والشاكت الذي
يجعلني أبدو فاتنا.. وجزمة كلاسيك بقى إنما إيه!.. اللي حيقولي اقلعها بالشلوط في عينه..

توجهت إلى حيث الفندق اللي طبعًا عمري ما دخلته..

يااااه يا ولاد.. ده حاجة فخيمة جدا.. ما شاء الله.. هيلمان.. إيه الأوبهة دي!!؟

تدخل.. تلاقى نور خافت.. يقابلك واحد على الباب برة شاكلة راجل محترم قوي.. تقرب
منه.. يروح فاتحك الباب..

تقوم مسلم عليه.. وتقوله "ربنا يعزك".. وتفكر للحظة تبوسه تقديرًا لمجهوده بس تتراجع في
آخر لحظة عشان ما تخرجوش..

تدخل البهو.. أوووف... إيه ده؟؟؟ إيه النجفة اللي فوق دي.. يا أماما..

تعدى بعيد عنها وانت باصص لها فوق براسك.. أحسن تقع عليك والا حاجة..

تقوم طاسس في واحد واقف في الضوء الخافت.. وانت طبعا مش شايفه من قلة النور.. شكله محترم أكثر من الراجل اللي فتحلك الباب..

- مساء الخير

- جود افتر نون سير.. هاو كان أي هيلب يو؟؟

- اممم.. ايه فور Apple.. بى فور بطة تقريبا مش فاكرك.. ثوانى كده اما افتر!!

- أقدر اساعدك بايه حضرتك؟؟

ايوة كدة.. النبي عربي.. حبيب قلبي.. بعد إذن جنابك.. ممكن تقولي المطعم الايطالي فين لو سمحت فخامتك؟؟

- اوووه.. زي ايتاليان ريستورا.. سكند فلور سير

- معقول؟؟؟؟ قفل؟؟؟ ليه؟؟؟ شكله ما اشتغلش كويس.. خسارة.. دا أنا كنت واخذ معاد فيه النهاردة!!! لا اله الا الله.. ياللا ملناش نصيب

- الدور التانى حضرتك!!!

- هاهاها.. ما أنا عارف بس بهراً معاك.. شربات سعادتك

- أي خدمة تاني؟؟

- لا الله يكرمك.. كده فل قوي.. وألف ألف مبروك على الأوتيل.. جامد قوي بصراحة

- نعم؟؟؟؟؟؟؟؟؟؟؟؟؟؟؟؟؟؟!!!!

سبت الراجل وهو مش فاهم أي حاجة ومشيت بقى ناحية ما شاورلي كدة.. وطلعت سلم لافف كبير.. فكرت للحظة أطلع لحد فوق وانزل زحلقة على الطرابزين الرهيب.. بس قولت بلاش

عشان ما وسخش الطرابزين اللي شكله لسة متلمع من ساعة..

طلعت الدور الثاني.. لقيت باب المطعم الإيطالي.. دخلت.. لقيت الدنيا ضالمة مووت..

يادي النيلة.. اظاهر أنا قریت على الأوتيل والكهربا قطعت باين.. طب إيه العمل بقى دلوقتي؟

- جود افتر نون سير.. كان أي هيلب يو؟

أنا سمعت الكلام ده فين قبل كدة..؟؟ آه من شوية..

- مساء الخير.. مش ده المطعم الايطالي..؟؟

- تمام يا فندم فيه ريزرفيشن؟؟

- لا والله معايش فكة خالص.. كل اللي معايا ورق بخمس

- نعم؟؟؟ بقول لحضرتك فيه حجز مسبق؟؟؟!!

- ااااه.. لا بوص.. احنا جايين تبع الاستاذ عزت الشريف

- تمام سعادتك.. تابل نامبر 8

- لسة ماجاش؟؟؟ غريبة؟؟ مع إنه مأكد عليا الساعة 7؟؟ خلاص حستناه عند ملف

الطرابزين

- يا فندم بقول لحضرتك طرابيزة تمانية

- أبوة أبوة.. هههههه.. شربات انتو هنا في الفندق.

- بعد إذنك.. استأذنك في الموبايل

- آآآه طبعاً.. اكتب عندك.. زيرو عشرة..

- حضرتك أنا اقصد استأذنك تسبب العدة هنا لأن ممنوع دخول الموبايل عشان الإزعاج

- العدة؟؟ بس دي لسة عليها كمبيالات!!

- اطمئن حضرتك.. كل الناس بتسيب موبايلاتها هنا وتدخل

- طيب.. بس خللي بالك بالله عليك.. أنا فاتورة والدقيقة باتنين جنيه.. أنا برن بس الله يخليك

اوعى تفكر تتكلم!!

- اتفضل يا فندم.. طرابيزة 8

دخات المطعم بعد ما واحد من الويترز جه وأخذنى عشان ادخل.. ضاالة.. هوس

هووووس خااالص.. فاندعت أنا بتلقائية

- يا ابحم

[illegible]

الناس من كل الطوائف بهشهة اشمناط واشمنزاز ونظرات تصفك بالهمجية الشديدة..

المهم إنه رغم الشهشة.. عبد الحميد رد..

- ايوووووووووة يا شيررررف

شش

هوووو وووو وووو وووو وووو وووو وووو وووو وووو وووو وووو وووو !! !!

وصلت للطرايبزة وسط نظرات الاستهجان وبصات القرف المنتاهي والضلمة عمياني..

سلمت على كل الشباب والشابات ومديري العظيم.. وقعدت في كرسي جنب "عبد الحميد" ..

نتوشوش بصوت واطى.. لحد ما معاد الأكل جه.. وجالنا الويتر بالقائمة.. المنيو..

لطيف قوي قوي إنك تمسك منيو بالإيطالى.. فى الوقت اللى أكثر أهل الطرابيزة علما بيتكلم

سوهاجي مکسر تقريبا..

بصيت للمنيو.. أكنى بتفرج على مجلة علمية بالظبط.. وأكد الكلام اللي مكتوب فيها ده هو
وصفة تحضير ثاني أكسيد الصنوبر.. أو كربوهيدرات البييتزا

فازة قاعدة على الكرسي.. دقائق كمان وكنت حبتدى أنهق.. أنا وكل اللي قاعدين على
الطريزة..

بصينا لبعض بصة معناها.. يادي الليلة الكوبية.. وهوب.. لقيت "زورو الانيق" واقف فوق
راسي عشان ياخد الأوردرات.. وبصفتي أول واحد على يمين الطراييزة.. كان لازم ابدأ بالطلب..

طبعاً.. في معلومة تهتم اللي بيقرا عشافن يبقى فاهم يعني.. أنا الحمد لله.. وأعوذ بالله من كلمة
أنا.. مقسوم إلى جزئين.. جزء من لحم كتافى من خير عربية الكبد بتاعة عم رجب حميدة اللي
كانت واقفة في التحرير.. والنص الثاني.. من خير عم عبده بتاع عربية سندوتشات المكرونة
بالشطة في العيش البلدي.. اللي كانت جنب شارع البروصة في وسط البلد..

كل اهتماماتى عن الاكل هي حنطر امتى؟؟ حنتغدى امتى؟؟ في عشا والا لا يا حاجة؟!
عودة بقى إلى الراجل المحترم اللي واقف قدامي.. وماسك ورقة وقلم.. أكنه حياخد مقاس
البنطلون بتاعي.. عشان يفصلي بنطلون بدل اللي أنا لابسه

- يور اوردر ايف يو بليز؟!

- الله يعزك.. هي كمان بتسلم عليك قوي والله.. السلام لمامتك انت كمان أمانة

- طلب حضرتك يا استاذ!!!!

- اممم.. احممم.. آه.. طب.. انتو عندكو إيه بتشتهرو بيه هنا بقى عشان الواحد محتار من
كثر الأصناف الفظيعة اللي عندكم في المنيو بصراحة؟

- أنا أرشح لحضرتك الايتاليان شوربيملتسحفلسبنليكنو

- اممممم.. بس يا ترى بتعملوه زي برة..؟؟ والا احسن؟؟ عشاف أنا كلته في حنت كثير

كويسة

- لا حضرتك.. ده المين ديش الرئيسى بتاع المطعم اللي بتميز بيه

- ممتاز.. طیب بتعملوه از ای بقی؟؟!!

- ده بنجيب حضرتك الزوفليط الإيطالي ونحشيه مفلوضيللو بالكاري المشوي عل ديول الماعز الجبلى وفى الآخر بيبقى الدريسينج صوص الغلافيوسوكينو السويت اللي ممزوج بسوالف العرسة اللي فى بوقها شمعة.

- ياااااااااااه على الروعة.. ياااااه.. طيب أنا حاخذ منه بقى عشان أجرب.. ولو عجبنى..
حاخذ منه كل مرة أجيلكم فيها.. واحتمال أبقى اطلبه دليفرى كمان

- تحت أمرك يا فندم.. وان شاء الله حيعجبك طبعاً

- المهم يعجبك انت!

- افندم؟؟!!

- لا هههههه انتو شرباااات في الفندق ده والله العظيم.. بص.. علوزه بيغلي الله لا بسينك؟؟؟

وطبعاً.. الحوار ده اكرر أكثر من اربعتاشر مرة مع الغلبة اللي قاعدين وكل واحد طلب حاجة شكل عشان يعمل نفسه فاهم.. الوحيد طبعا اللي كان فاهم اللي في المنيو هو المدير ربنا يديله على قد نيتته بقى..

الأكل بعد دقائق ابتدئ ينزل على الطرابيزات..

خليني أخلص ليكم منظر الطرايبزة في جملة واحدة..

"السيرك"

اللى قاعد ونزله بطة مطعونة بمكرونة اسباجتى على شكل سهم فى بطنها..

واللى نزلہ دراع معزة فقدتها فى حرب المعيز اللى كانت فى القرون الوسطى

واللي نزل طبق فيه بقع.. ما بقاش عارف ياكلها والا يمسحها..!!!
وأخيرا العبد لله..

نزل طبق فيه ثلاث دواير..

دايرة بورتقاني.. دايرة بيضة.. دايرة خضرا..

أنا شكيت للحظة إن ده برنامج الكاميرا الخفية.. ومطلوب منى أمسك الطبق اللي شبه
الإشارة وأقوم أنظم المرور في المطعم!!
بس والصحف طلع أكل..

بدأ الشباب في التعامل مع الاطباق على طريقة تعامل خبراء المفرقات مع الديناميت..

اللى يهز الطبق من بعيد أحسن تكوف في حاجة صاحية.. واللى يلمس الأكل بالشوكة
ويشيلها بسرعة أكنه اتكهرب.. واللى قاعد بيبص للطبق مستني إن الطبق هو اللي ياخذ الخطوة
الأولى...!!!

العبد لله.. مسك الشوكة..

وقطعت حنة من الدوارية الخضرا..

طبعا ده ضفدع مهروس تحت عجل أوتوبيس... اووع.. بلاها الزفت الأخضر ده خالص..

قطعت حنة من الدوارية البورتقاني..

إنا لله وإنا إليه راجعون.. الطمطماية اللي كان شايلها الضفدع اللي اتهرس وهو بيعدى
الشارع اتهرست معاه.. اوووع... بلاها الزفت البرتقاني ده كمان..

أنا لله وإنا إليه راجعون... كان من اللي في النص..

الدوارية البيضة..

تصدقوا كان طعمه كويس.. أو هكذا قرر عقلي الباطن لإنى ما عادش قصادي اختيارات..

المهم ان الكل أكل.. أو هكذا شبه لهم.. وشكرنا مديرنا.. مع وعد "داخلي" بالانتقام حين
تسبح الفرصة.. خرجنا أنا وعبد الحميد الغلبان زي المجانين عشان نروح نشوف حنة نتزفت نتعشى
فيها.

وحنا ماشيين.. سألت عبد الحميد..

- انت إيه الطبق اللي كنت بتاكله ده يا عوبد؟؟؟

- ده كان دبس الرمان مع كمبيالات المصرف البيتزاوى.. بس طعمه كان قبر كلب..

وانت؟؟ إيه البتاع الأبيض اللي كنت بتاكله ده؟؟؟

- ما تفكر نيش يا عبد الحميد.. ده تقريبا كان كفن الضفدع الله يرحمه

#سى_سنيورى_ما_تطفح_بيتزا_وبلاش_فتى

#المطعم_الايطالى_فى_شارع_عماد_الدين

#عاوز_ادوق_البورشيح_المتشوح_على_فخاد_النمل

#احبيبي_اعم_عبد

الاعتراف الثامن عشر

كل ما كلمة الحب بتيحي على بال الواحد.. بتعدي عليه صور جميلة.. ورد.. وشمس..
وهوا.. وقلوب حمرا طائرة في الفضاء.. وحاجات كده بتخليه يبتسم..

انا كده برضه.. كل ما كلمة الحب بتيجي على بالي.. بتجيلي حالة من الابتسام اللا إرادي..
زي التبول اللا إرادي بالظبط.. وبتبدأ صور جميلة تعدي على عقلي..

قبقاب خشب.. مطرة.. ميني باصات مش عايزة تقف إلهي يهد اللي ساقها.. جزم مسروقة..
حاجات كدة.. بتخليني أقعد وابتسم وأقول في قرارة نفسي
"يااااه.. أنا اتمرمطت كثير قوي عشانها والله"..

أول عيد حب عدى علينا.. ماكنش لسة فيه احتفالات فلانطايين والحاجات دي زي اليومين
دول.. كانت لسة الأمور هادية.. ويقولك بكرة عيد الحب وبتاع.. اللي يطنش يطنش.. واللى يحتفل
يحتفل..

وبما إني رومانسي موووووت - في البدايات طبعا - كنت لازم استغل اليوم ده.. واعملها
مفاجأة زي اللي كنت بشوفها في الأفلام الأجنبي.. بس للأسف.. المفاجأة كانت فعلا شبه اللي في
الأفلام الأجنبي.. أفلام الزومبي.. مش الرومانتيك.

قعدت اسألها في التليفون أبو سلك.. لأن وقتها لا كان في موبايلات ولا قرد.. رايحة فين؟؟؟
حتعملى إيه؟؟؟ وهي غلبانة مش عارفة طبعا الشرير اللي هو أنا بسأل ليه؟؟؟ ولية الإلاح ده في
إني أعرف خط سيرها بالظبط.. وكانت حجاتي إني باطمئن عليها

طبعاً الفلانطين.. في فبراير.. لازم تعرف إن وقتها.. كنت لسة طالب.. لا كان في عربية ولا كان اختراع الموبايل ظهر.. وكان الشتاء زمان شتاء.. مش زي اليومين دول.. تمطر يوم وتانى يوم تبقى درجة الحرارة أربعين وكل سنة وانت طيب..

الساعة بقت واحدة الظهر.. أهى.. وصلت مع صاحبها.. يا واد يا شريف يا أبو الخطط يا جامد.. دلوقتي بقى.. هي حتدخل المول.. وأنا حروح للراجل بتاع الورد.. اخد "باكو" الورد.. واطلع اخش وراها.. وهوووووب

جري جبت الورد.. ورجعت المول.. دخلت.. أدور في الدور الأول.. لا مش لاقياها.. الدور الثاني.. مش موجودة.. راحت فين بس؟؟؟ التالت طيب.. ولا الهوا.. يمكن في محل في الرابع.. مفيش أثر.. ببص على السلالم تحت بالمصادفة..

[illegible]

"بعد إندك يا أستاذ.. حاسبى شوية ياهانم.. كتفك يا حاج.. شنطتك يا آنسة"

جري بلا وعي على السلالم الكهربا وأنا شايلى أكبر بوكيه ورد فى العالم.. والناس بتتفرج عليا وبتقول عليا مجنون.. طبعاً.. كويس إنهم بيقولوا عليا كدة.. ومالو.. دي حنبقى ذكرى جميلة قوى قوى.. ياااه.. المجنون اللى بيجري ورا حبيبته عشان يديها بوكيه الورد الكبير فى المول.. بس

- الحمامة سنتر.. بس بسرعة

- فين؟؟؟؟!!!!

- معلى قصى اليمامة سنتر.. بس حمامة الله يخليك

انطلق التاكس.. وأنا بحاول اهنم البوكيه الفطيع اللي واخده.. وأوضب فيه.. الللله الورد
ريحته فطيعة.. ببص من الازاز.. لقيت الدنيا بتندع..

مش مهم.. عادى.. هى بتندع وبعد كده حتسكت ان شاء الله

ثوانى.. ولقيت الندعة زادت.. عادى دي سحابة وحتروح لحالها في دقيقة

لحظات.. الندعة قلبت مطرة.. ياااه.. خير خير ان شاء الله.. المطرة خير.. ولسة يا دوب
حادعي

المطرة ابدت ترخ.. ومع الرخ.. سمعت شوية صوت رعد.. وشفّت برق..

اللهم اجعله خير يا رب دي معملتش كده من كذا سنة!

بس دا اكيد حيبقى يوم تحفة.. وحتبقى ذكريات جميلة.. ياااه

- اليمامة سنتر يا أستاذ

- مالها؟

- يا أستاذ وصلنا اليمامة سنتر!!!

- آه.. أبوة.. ممكن بس تنزلني على الرصيف عشان مش لابس المايوه

مسافة ما حطيت رجلى في الشارع.. حسيت إن السحب كانت كل ده لسة بتهزر.. وأول ما
شافتني نازل من التاكس.. هاتك يا رخ على حق بقى..

طبعا مش مهم أنا.. المهم البوكيه.. الورد.. شقى عمري..

حيكون شكلي رهيب على فكرة.. غرقان مطر.. وبنقط مية.. وأنا داخل عليها وبديها
البوكيه.. يا خبر ابيض على الرومانسية.. شروخان في فيلم مين اللي ما يحبش بطة.. حبقى رهيب..

دخلت اليمامة سنتر.. على حارس الأمن

- لو سمحت.. ماشوفتش أنسة مع ثلاث أنسات من شوية لسة داخلين

- افندم؟؟؟؟!!

- بص هي لابسة فستان ازرق ومعاها شنطة بيع كدة

- لا يا استاذ ما شوفتش!!

طبعا الراجل بصلى وأنا غرقان مية.. وشايل بوكيه الورد اللي محاطه عشان ما يتبلش
فواخده في حضني.. وحسيت انه عاوز يخبطني بحاجة.. سييته ودخلت أعتمد على نفسى.. أدور
يمين.. مفيش.. أدور شمال.. مفيش..

يمكن لسة ما وصلتش؟؟!!

بس هي أكدت علي انها حتيجى هنا الأول مع صحباتها

طب اعمل ايه؟؟؟ أيوة.. أنا أقعد استناها..

بس ممكن تدخل تلاقينى في وشها.. المفاجأة تبوظ!!!

امممم.. أنا حاخرج برة.. واستنى قصاد المول الناحية الثانية.. لحد ما ألاقوها وصلت..
ونازلة من التاكس.. وهوب.. أروح داخل عليها باغنية

"طلعت فوق السطوح هز الهوا كمي.. خليك حنين بقى وارحم عذاب أمني"

فكرة رائعة.. نزلت بسرعة.. وأنا مترقب أحسن تيجى والا حاجة.. شايل بوكيه الورد..
وورايا بركة مية عمالة تنقط من هدومي اللي بقت "نوعة".. وخرجت من المول.. وجريت ساروخ
عديت الشارع في المطر الناحية الثانية..

زي فريد شوقي أما كان بيجرى ورا زكي روستم في فيلم رصيف نمرة تسعة

طبعاً.. وضع البطّة.. ورا العربية.. ببص من الإزاز على باب المول.. أهو.. تاكس.. ايوة بقى.. إيه ده؟؟؟ لامش هي..

أهـی أهـی.. تاكس تانی.. أكید هـی بقـی.. لا برضك مش هـی..

هو ده بقى.. هو ده.. لا.. مش هو دة!!!

عشر دقائق.. و المطر

نصر ساعة و المطر

ساعة و نص.. تششششششششششششششششششش

انا بقيت خيشة.. الكوريشة بتاعة البوكيه ابنتت تنزل لون على هدومي.. الورد كان ناقصله
ثواني ويتف عليا.. ومفيش حد جه.. طب أعمل ايه؟؟؟

ايوووووووووة.. خط السير.. ارجع لخط السير..

هما أكيد لما لاقو الدنيا مطرة.. خدوها من أصيرها.. وراحو آخر حاجة بقي..

"كافيه روستري" اللى فى المهندسين..

- تااااااااااااااااااااا... المهندسين يا اسطى

- فين في المهندسين يا استاذ؟؟

- محيي العز ابو الدين

- فين؟؟؟؟؟؟؟؟؟؟؟؟؟؟؟؟

- سور نادى الصيد خلصنى.. أنا قرب يجيلى حمى من البرد

انطلق التاكسي.. وأنا ابتديت أدخل في "كومة" من البرد والبلل.. البوكيه بقي مدلدل على رجلى.. بس مش مهم.. دي حتبقى ذكرى جميلة قوي قوي..

حتبقى خاتمة قرف لو التعب زاد كدة.. مش حيلحقوني..

متخيل منظرى.. وأنا داخل عليها روستري.. وتعبان.. ومبلول.. ومعيا الورد زي بائعي
الزهور في سيبيريا وهما بيموتو من البرد.. وهى بقى.. يااه يا كوكو.. كوكو مين؟؟.. إنت كوكو..
وتروح واخداني مشقة عليا.. تجييني حاجة سخنة.. اشربها.. وأروح ساقط من طولى..

حتبقى ذكرى رومانسية بنت جزمة..

- سور نادى الصيد يا أستاذ

- اشمعنى؟؟!!

- يا بيه وصلنا.. انت حتخشلي قافية؟

- آآه.. أيوة.. يديك الصحة.. معلى.. شووكرن

نزلت مترنج.. حاولت أكون مترقب بس المطر كان نازل على الهدوم المبلولة أساسا عملني
ممسحة.. البوكيه مجرجه ورايا في الأرض خلاص.. دخلت على روستري.. ابتسامة الموت..
أدور في الطربيزات..

طبعاً.. مفيش..

يمين.. شمال.. هو يوم شمال من أوله..

أخذت لفة وسط نظرات الناس في الكافيه.. وخرجت مجرر البوكيه وخيبة الأمل اللي
راكبة جمل..

يا ترى بحسي الأمني والمخابراتي والباحثي أعمل إيه دلوقتي...؟؟؟

أنا بقول تتوكس يا موكوس.. وتروح تشفلك ترب قريبة تحط فيها الورد اللي بقى شبه حزمة
الفجل ده.. وتتنيل تروح..

انا بقول كده برضو..

- تالالكس.. المعادي يا اسطى

- فين في المعادي يا أستاذ؟؟

- البيت أو ترب البساتين.. أيهما أقرب

طبعا السكة من المهندسين للمعادي في السيول.. وأنا مبلول زي كوز الحموم.. مع البرد..
مع الورد.. مشهد جنائزي مهيب..

وصلت البيت.. طلعت.. أول ما دخلت من باب الشقة..

التليفون أبو سلك.. تررن تررن.. بررن بررن

- الو.. إنت فين من الصبح؟؟؟

- أنا؟؟ لا أبدا يا حبيبتي.. كنت في مشوار أسود كدة.. انتي اللي فين من الصبح؟

- لا دا أنا روح البيت بعد هيلتون رمسيس عطلول.. الدنيا كانت بتمطر مووووووت

- موت؟؟؟ اممم؟؟؟ موت.. طيب اقفلى كدة!!

ليه؟؟؟!!

- لا أبدا.. على ذكر الموت.. حروح أغير هدمي وألبس كفن.. بس يكون ناشف

#يهدا لذكریات

#هو الفلانطاین ده مش لینا اصلا

#حسی المخبراتى المباحثى الامنى

#اتوکس

#یا تعیش وانت ناشف یا موت وانت ساقع

الاعتراف التاسع عشر

"انت لازم تعتمد على نفسك يا شريف.. يا شريبيبييف"

كلمات أبابا الله يرحمه عمالة تتردد في وداني وأنا داخل على "كانتشين" المدرسة في الفسحة.. في مدرسة الثانوية العسكرية اللي في المعادي..

طبعا الكلمات دي كانت بتتردد لان نسبة الفاقد في العيال اللي بتروح "الكانتشين".. أكثر بكثير من نسبة فاقد أفراد الصاعقة في الحرب.. منظر شباك "الكانتشين" اللي عرضه متر ونص.. وارتفاعه متر.. ومقفول بالقضبان الحديد زي الزنزانة عمره ما راح من بالي أبدا..

مش بس كدة.. المنظر اللي كان الأبتشع دوما.. هو منظر أكثر من ثلاثلاف طالب.. بيهجموا عليه وقت الفسحة عشان ياخدوا منه "السانجوتش" الوحيد اللي كان بيبيعه..

"سانجاوتش الطعمية".. أذ.. أذ

في عيال كانت بتتوضي.. وتصلى ركعتين صلاة غائب.. وبعدين تاخذ نفس عميبيبيق.. وتدخل.. أو للتصحيح.. بيبقى نفس اخيبيبيبيير وتدخل..

المدرسة الثانوية العسكرية هي اللي تخرج منها الراحل "اللى بنى مصر".. قديمة قدم الدهر.. أعتقد إن سكان الكهوف اتعلموا على "صبايرها" كيفية رسم الغزلاف ورحلات الصيد اللي رجعوا بعد كده رسموها على جدران الكهوف وقت الامتحانات..

ورجوعا إلى أقسى مكان في الكوكب.. شوباك الكانتشين..

- مالك يا ض؟

- ثلاث تيام مش عارف اطلع.. يااااااااااااارب

طبعاً أنا سببتني منه خالص.. خصوصاً بعد ما ابدتت جموع الجائعين تدوس عليه عشان توصل للشباك... و ابتدى هو يا عيني يغوص تحت الأقدام كما غاص فريد شوقى في بحر الرمال المتحركة لما كان عامل فيها عنتر.. يا ريتو كان يوريني نفسه هنا..

مسكت في قضبان السجن.. قصدي قضبان الكانتشين.. ومديت إيدي بالفلوس..

—لو سمحت.. لو سمحت.. ستة طعمية.. لو سمحت.. لو سمحت

الراجل يا عيني بتاع الكانتشين.. كان بياخد الفلوس من بعيد.. ويحدف الساندوتشات في كيس نايلو من بعيد.. زي بالظبط حارس السيد قشطة أما بيحدف حزمة البرسيم في بق السيد قشطة..

ولما استفسرت منه بعد سنين إيه السبب في كدة.. أكد لي إنه في مرة طالوه من ورا القضبان.. وكانوا حيفتكوا بيه من غير سبب - زومبيز كفار -

الراجل حدفلي ثلاث أكياس نايلو فيهم ست انصاص طعمية.. وجاء موعد الخروج..

طبعاً.. لطيف قوي إنك تحاول الخروج في مواجهة شعب كامل بيحاول الدخول.. نفس نظرية محاولة الخروج من جوة عربية المترو كده في مواجهة الناس اللي داخلة..

أنا دلوقتی بس عرفت وفهمت الواد كان بيعيط ليه!!

انا دلوقتی بس.. ابتدیت أعیط زیہ تمام..

- لو سمحت يا كابتنش.. أخرج لو سمحت.. يا كابتنش.. يا عم.. بعد إذنك.. انت يا ابني.. يا

[illegible]

وبدأت موجات من السريخ أثناء محاولة الخروج اللي استمرت أكثر من نص ساعة.. طبعاً انت حتقولى بلاش فشر.. دي الفسحة كلها عشر دقائق.. حقولك.. انسى الكلام ده.. الحصة الرابعة

الاعتراف العشرون

أنا واحد من الشباب قضيت فترة كبيرة من عمري كله اتمرن كرة مية.. كاتش يمين.. كاتش شمال.. أربعين طول يا ابني.. المية مثلجة يا كوتش.. عوم ياض لخليهم تمانين.. حاطر أكابتن.. وكدة يعني..

مش قادر أنسى يوم ماتش "نادي سكر الحوامدية" أول ماتش ليا مع الفريق العيال عندي في الفريق كلها كانت طول بعرض شبه فرس النهر.. طول عمرهم بيلعبو اللعبة دي..

إنما أنا بقى.. إوعى..

سلك كهربا مرمي على وش المية.. أنا محتاج عوامات "بن تن" في درعاتى أساسا عشان أطفو

يوم الجمعة.. كان يوم الماتش الصبح.. الأوتوبيس أخذنا وطلع وبعد ساعتين وقف في حطة مهجورة فا قولت في عقل بالي.. يا ترى مين اللي اتزنق وحينزل يعمل "نامبر وان" هنا؟؟؟!

لقيت المدرب بيقولنا

- ياللا يا جماعة حننزل

- إيه يا كابتن حننزل الاوتوبيس؟ هو عطل؟

- لا يا لمض.. وصلنا

- وصلنا؟؟؟ وصلنا فين يا كوتش!!!!!!

- وصلنا النادي يا خفيف.. انزل يا خويا انزل

بصيت كويس ودققت.. لقيت سور سلك محاوط أرض فضاء ومكتوب عليها

"مرحبا بكم في نادي سكر الحوامدية"

يادى الحظ الاسود.. شكله يوم مش فايت من أوله

الفرقة نزلت من الأوتوبيس.. "اتسرسبت" واحد ورا الثاني من وسط السور.. زي المطايرد

اللي هربانة من سجن القناطر بالظبط.. !!!

ومشينا كلنا.. العيال اللي شبه فرس النهر في القوة والبنيان.. بقت شبه فار الغيط وهو لسة خارج من التربة..

كان في سؤال مهم في راسي.. فين أم حمام السباحة اللي حنلعب فيه الماتش وسط الزرعات

دي كلها؟؟؟!!!

وكان القدر اختار أن تكون الاجابة أسرع من السؤال.

حفرة بلاط.. مستطيلة الأبعاد.. فيها ما لا يقل عن ضعف عدد سكان الصين.. أنا أي نعم مش

شاياف المية من كتر الناس..

بس باينة.. آآآه يا عفاريت.. مخبيين المية فين؟؟!!

أكيد اللي رجله فوق وراسه تحت ده أكيد في المية..

أكيد اللي بيرمى ابنه لفوق ويسيبه ينزل على ملا وشه ده.. أكيد بيسييه ينزل في المية

الولية اللي عاملة بلونة بالجلبية دي.. شوووور البلونة دي مكانها في المية..

طبعاً مسؤولين النادي.. قعدوا ساعة ونص بيحاولوا يقنعوا أهل المكان إنهم يخرجوا من

حمام السباحة عشان فيه ماتش.. ساعة وينزلوا تاني.. وسط اعتراضات رهيبة من الأهالي.. لان ده

يوم الجمعة وأجازة الجميع..

المهم.. خرجوا الحمد لله.. ويا ريتهم ماخرجوا لا إله إلا الله

للأسف لما خرجوا.. شفت المية بعينى.. اكتشفت طبعاً إنه حمام.. بس مش سباحة.. خالص..

لا لا لا لا لا.. ده حمام عمومی..

لون المية كان بالظبط بالظبط شبه لون مية المسيح بعد ما يتمسح بيها الشارع كله!!

أنا متأكد إن المية دى فيها بلهارسيا بحجم الأناكوندا.. مستنينة أول ضحية تحط صباغ رجلها

في المية.. وحتبلعه...!!! بس هي مش باينة مش أكثر!!!

الناس بعد ما طلعت أساسا.. شفت منهم مجموعة بتتبع عيالها تلبى نداء الطبيعة فى المية..

اوووووع

أنا معنديش أدنى استعداد أموت غرقان في خليط "نامبر وان ونامبر تو" على فكرة!

طبعاً بعد الكابتين ما حلف بأغظ الإيمان إنه حينكد علينا كلنا..

بدأ اللعبة ينزلوا المية واحد ورا التانى.. وكل اللي ينزل يحاول الخروج بسرعة.. بس

الزفطة اللي على بلاط الحمام كانت بتوقعه تاني في المية.. أو غالبا الأناكوندة كانت بتشده.. مش

متأكد.. هو كان بيعيط من سكات.

قراءة الفاتحة.. والقفر في البيبي.. وبعدين ترجيعه خفيفة.. وتشرباك بوقين.. بقيت فلة.. من

سكان المنطقة.. وحيطلعولك تصريح ركوب تماسيح.

و هوووووب.. لقينا الفريق التانى.. خارج علينا من غرف "شلح" الملابس ويبجري على

المية..

اللاعبين الى تحت ستائر سنة المفروض.. أهم.. واحد فيهم.. أطول من أبابا.. والثاني قد

عم حجاج بواب العمارة بتاعتنا.. والتالت..

یاختا اaaaaaaaaaaaaaaaaaaaaaaaaaaaaای

مخدناش وقت كبير إلا وكان الماتش ابتدئ.. وكانت المعركة بينس وبين "المان" اللي
ماسكني رهيبة.. تخيل.. معركة بين تمساح وباسرياية في المية..
النتيجة محسومة..

!!!?? ~~~~~ -

!!~~~~~ -

أروح يمين.. ورايا.. أروح شمال ورايا.. أمسك الكورة.. ورايا.. ياعم فيه ماتش.. ورايا..
أحدفله الكورة.. يسقف زي كلب البحر وبعدين يسببها وورايا.. أنا علوز أروح..
كان زير نساء الله يحرقه...

فى واحد قعد طول الماتش.. يهزلي في حواجه أنا واللاعبيه.. وفى واحد كانوا رابطينه فى العمود اللي ورا.. عشان خطر شكله.. هو كان بيعوي.. يا أما.. وفى واحد كان بيبعت بوس فى الهوا لباقي اللاعبيه.. يا خرائى على اللى حيجرالى يا خراشى..

سكان الصين الشقيقة مرة أخرى إلى الحمام.. بالهدوم.. والجلابيب.. عشان يرووا عطشهم من عصير البلهارسيا.. وعشان ياخدوا نصيبهم من التورته..

الاعتراف الحادي والعشرون

كانت تيتا الله يرحمها.. ودى غير "نينا" خالص.. دي الناحية الثانية فرع أماما.. حنينة قوي

كان بيت تيتا هو الفسحة والخروج الحقيقي..

تيتا كانت عندها بيت في المعادي.. وارثاه عن أبوها.. وكان بيت العيلة.. وكانت تيتا آخر العايشين... كنا بنروح ليها مع أماما الله يديها الصحة.. نقابل خلاتي وخلاني كل يوم خميس ونبات للجمعة..

ونصحى الصبح بدري.. نطلع السطوح.. وده ما كانش سطوح عادي بالنسبة لينا خالص..

ده كان السطوح اللي كانت تيتا مربية فيه كل حاجة ممكن تربي.. بط ووز وفراخ وأرانب وحمام وخرفان وديوك رومي..

كانت متعة حياتي إني أتفرج على المخلوقات دي وأنا عندي لسة تمان سنين.. كنت بكون في منتهى السعادة

كنت بحب بالفطرة كل المخلوقات الحية.. كان فيه عمار دايم ما بيني وما بينها..

إلا الديك الرومي.. وزى ما قریتوا قبل كده الحصان والكلاب.. أنا أصلا الحيوانات ما بتحبنش بس أنا اللي بقاوح.. المهم..

الديك الرومي مش عارف ليه بصراحة.. عمري ما استلطفته..

كنت بحس دائما إنه شكله غبي على الصبح كده أما باصحي واطلعه.. أقرع.. رقبة حمرا..
مدلدل من مناخيره زوائد لحمية تحسها مش مفهومة... كنت أسأل نفسي..

"يا ترى دي حد شده منها والا كان شعر وهو ضفره ونشف عليه والا إيه حكايته؟؟!"

فوق ده كله.. كان كمان بممشي بتناحة.. وينفش ريشه.. وعامل فيها ابن خالة الأسد بس
مستخبي عندنا على السطح عشان عليه حكم والحكومة بتدور عليه!! !

وسبحان الله.. كان دائما الشعور ما نينا متبادل.. هو كمان ما كانش يطيق يشوف سحتني..

الله في الله.. كنت دائما مسبيله مشاكل نفسية..

طبعا أنا كنت معتقد إن وسامتي وحلاوتي وجمالي بالمقارنة بيه كان ليهم عامل في
الموضوع ده بكل تأكيد..

فى يوم من ذات الأيام.. أمي الله يمسيتها بالخير كانت جايبالنا بيجامات الكاراتيه اللي كل
مواليد السبعينات في جمهورية مصر العربية لبسوها بدون استثناء.. بيجامات الكاراتيه الحمرا
الستان اللي مكتوب عليها بالصينى وليها حزام اسود ومنيل كدة..

طبعا نمت بالبيجامة الخميس.. وصحيت الجمعة.. بدون تفكير.. جرى على السطح.. عشان
أفطر وسط الطبيعة الخلابة.. ويبقى شرشر نط.. لأكل البط.. وكدة يعني.

كان في انتظاري طبعا فوق المأسوف عن شبابه الديك الرومي.. وهو في حالة نفسية بشعة..
تقريبا كان شايف حلم وحش بالليل وصحي الصبح ينكد على السطوح كله.. عمال يولول.. ويضرب
في الطيور ومثبت الخرفان عند سور السطوح وبيراودهم على الفراوى يا يولع فيهم وفى السطح
وفى نفسه تقريبا...

كان مزاجه زفت..

وأنا طبعا طالع وعلى وشي ابتسامة بوقلز على الصبح.. ومشرئب.. ومقبل على الحياة..

وعادييييييييك..

شالتني تيتا من على الأرض شيل.. ونزلت بيا وأنا منهار من العياط..

يوميها.. أكلت أحلى ديك رومي في حياتي..

بس أكاد أقسم.. إنه وهو محمر في الصانية.. غارق في دماء الملوخية

قالی..

"بلولولولولولولولو"

طبعاً انتو عارفین معناها ایہ...

#یا_ختاااااااااااااااااااااااای

#ديك_فلل_جبنة_كلهم_رومی

#بلو_لو_لو_لو_لو

#ديك_رومی_سافل

#كان_يجنن_مع_الملوخية

الاعتراف الثاني والعشرون

جدو بقى الله يرحمه.. مش بتاع الأهل!!..!! لا بتاع أماما ربنا يديها الصحة..

كان عاملنا مشاكل جامدة بصراحة..

كان دايم عصبى وبيزعق.. وبيشخط وينطر.. كان البيت كله بيخاف منه.. كان أسد

إلا أما نيجي أنا واخواتي.. تتقلب الدنيا ضحك ولعب وتبقى تيتا الله يرحمها مش عاوزانا
نمشي عشان يفضل مزاجه تمام طول الوقت.. أحبيبي أجدو

أحنا بقى.. كنا بنحب جدو جدا لأنه كان مدلعا..

بس كان فيه دايم موضوع منكدا عليا أنا واخواتي..

صحة جدو للأسف..

لا يا حبيبي.. ما تقلقش.. مش حتقلب دراما.. جدو كان زي القرد البابوني.. كان عنده القدرة
إنه ينكد على قرية إفريقية كاملة..

بس كانت عنده مشكلة جامدة في الظهر والفقرات.. كانت مخلياه دايم مستحيل يقدر
يوطي..

كان شبه العمدة الآلى في المشية.. اللي كان بيحي في رمضان.. فوازيير جدو عبده..

وكنا نفضل أنا واخواتي نغيظه ونغنيه الأغنية بتاعة

وأنا علاقتى بالكلاب زي ما كتير منكم عارف.. تشبه تماما علاقة روسيا بأمريكا كدة.. ما نطيقش بعض إطلاقا.. لله في الله.

كفاية قوي إن الكلب يشوفني في الشارع عشان يتسعر ويجري ورايا من غير سبب.. لحد ما يجيله تسلخات.

كنت مادة خام لاستثارة الكلاب..

طبعاً.. كنا بنلعب كورة.. وطبعاً.. الكورة نطت انتيلت وقعت في المنور.. وطبعاً الدور المرة دي كان على مين؟؟؟؟ حيكون على مين يا حسرة؟؟؟؟ علياً أنا طبعاً..

أحنا عمرنا ما كنا بننط في المنور إلا أما نتأكد من إن الكلب اللي عايش هنا.. خرج راح الخرابة اللي في آخر الشارع عشان يسترزق من أكياس الزبالة حديثة العهد.. ويقلب عيشه فيها.. عضمة بقايا فرخة.. كده يعني..

كنا نخرج واحد منّا عشان يقف ناضورجي.. والثاني اللي عليه الدور ينط في النور يجيب الكورة.. وبعدين يتسلق نص السور.. والشباب يقوموا بدورهم في سحبه للنص الباقي لأنه كان عالي

- يا جماعة ما بلاش أنا!!

- ليه يا شريف؟؟؟؟ ده دورك..

- لا ما أنا عارف.. بس ركبي واجعاني..

- معلش.. بس ده دورك..

- آه ما أنا عارف.. بس دراعي واجعني بالجامد

- طب نعمل إيه يا عم.. ده دورك..

- أيوة أنا ما اعترضتش.. بس أصلى عندى كحة..

- يا عم بطل تهريج ده دورك

أنط أجيب كورة من المنور يتحول لمقبرة؟؟؟ الناس كلها بتموت عشان بتقع في المنور.. إنما أنا حكون أول واحد يموت عشان معرفتش أخرج منه...

- يا ختاللااااي.. طلعوني يا ولاد الذيبينية

- احذف الكور وروووة

- أبو أم الكورة على أبو أم اللي علوزها.. طلعووني

- يوووه يا عم احذف الكورة عشان نعرف نطلعك..

- طلعونى الكلب خلاص قرب وحيش يسيب الكيس ويمسك فى لبالبيى يا

ختااااااااااااااااای

- يا عم احذف الكوووووووورة

- على فكرة.. تفوا على قبري لو حذفت الكورة قبل ما تطلعوني..

[illegible]

ده كان صوت الكلب اللي دخل ملجأه لاقاني واقف بالشورت.. بصلي بصة وكأنه قفشنى مع مراته فى سرير المنور...!! !! كان ناقص يطلع مسدس من درج الكومودينو ويضربني رصاصتين..

طبعاً هو رمى الكيس من بقه.. أنا قلت حيثتم الأول

ابتدی یکسر عن أنبیاءه وهو بیص بصة معناها واضح

"هات لاباليبك بكرامتك يا روح خالتك.. عشان حتتقرم حتتقرم منها ما تحاولش الهرب"

طبعاً كل اللي أنا فاكراه كويس قوى.. ان "سبايدر مان" اخذ مني فكرة المشي على الحيطه..
وإن السور العالى للمنور اللي داخل على ثلاثة متر.. كان بالنسبة لي أكثك طالع على السرير تنام
عادي...

في أقل من لحظة كنت على الجانب الآخر واقف وسط العيال اللي مصدقوش عنيه..

طبعاً اللي حاول يسأل على الكورة كنت حذفه يجيبها.

طبعا الكلب قعد يهو هو أسبوع بعد ما اكتشف اننا أعتنا فسادا بملجأه.. كنت حاسس إنه حيشتم من المنور ويقولنا "يا كلاااااااااااااب"

وطبعا سيادته قفش وما خرجش من الملجأ بتاعه يومين.. والكورة عنده

واحنّا طبعاً حاولنا نخرجه بالأكل مرة.. بالطوب مرة.. بالقسط مرة... أبدا.. قافش تماماً..

اللى جاب الكورة البواب بعد ما لمينا عشرة جنيهه وخليناه يجيبها..

وطبعاً بطلنا نلعب في الطريقة النجسة دي أساساً لإن الكلب بعد كده كسر سور المنور.. وفتح الصالة عنده على الطريقة عشان يوسع.. واتجوز كلبة تانية بدل اللي قفشني معاها في المنور..

ایہ !!!

#احذف الكورة

#فى المشمش

#كل واحد يخلى باله من لباليه

#الاباليوووووووووووووو

الاعتراف الرابع والعشرون

كان ليا أصدقاء طول عمري بعزهم جدا.. اتربيننا سوا وكانوا دائما هما اللى بنقضي معاهم الصيف كل سنة.. كانوا ثلاث اخوات بنات ربنا يمسيهن بالخير بقى..

في سنة من السنين.. وفى غير أيام المصيف في عز الصيف وأغسطس.. عزمونا أنا واخواتي على عيد ميلاد واحدة فيهم..

كانوا طيبين قوي هما وأهلهم.. وكنا حقيقي بنعزهم جدا جدا..

الموضوع كان عادي جدا يعني..

ألو.. احنا عازمينكم.. عازميننا على إيه؟؟؟ عيد ميلاد نرمين.. كل سنة وانتم طيبين.. طب احنا حنستناكم يوم الخميس الساعة سبعة.. إن شاء الله جايين..

بس كدة..

لا مش بس كدة.. هو أنا مقولتلاكش؟؟؟؟ يقطعني!!

طب معلى العنوان فين بالضبط عشان طبعا مجيناش قبل كدة..

امبابة - شارع الوحدة

طيب.. أوك.. سلام سلام..

اشترينا هدية "دبوب" وغلفناه بجلاد الهدايا وحطيناه في شنطة هدايا

- نروح ازاي أماما.. - الله يسامحك يا أماما

اركبوا أوتوبيس 911 اللي بيروح امبابة من المطبعة.. مرة واحدة

من المعادي لامبابة عدل؟؟ اممم.. شاكلك فاهمة أماما

أيوة يا حبيبي.. "هما قالولي كدة"

وبدأت الرحلة..

الخميس 3:00 PM

وصولاً إلى محطة المطبعة أنا واخواتي.. كانت أول مرة أعرف ليه رقم الأوتوبيس 911..

ده لإنه ما بيخرجش من المحطة غير أما يكون محمل ب 911 مواطن كضربة بداية..

بعد الهرس والبرم والمرمطة وصلنا إلى جوار الكومسري..

- بيروح امبابة ده لو سمحت

- أيوة يا ابني ساعات

- ساعات؟؟؟؟! مممم ما علينا

الخميس 3:30 PM

يبدأ الأوتوبيس في التحرك راحلاً عن محطة المعادي الفضائية.. مخلفا وراءه المئات من

المواطنين منهم من يبكي لعدم وجود مكان على اكصدام الأوتوبيس.. ومنهم من جاء مع الأهل

ليودعهم في مشهد مهيب!!!

هو في إيه يا جدعان؟؟ هو رايح فين ده؟؟ غريبة

الخميس 4:00 PM

الأوتوبيس في مصر القديمة على الكورنيش وما أدراك ما الأتوبيس في مصر القديمة على

الكورنيش يوم الخميس الساعة أربعة العصر.. أنا كنت منتظر إن الناس تقلع وتلف باشاكير عشان

الركاب يتوافدون على الباب الخلفى اللي الكومسرى حالف يقفله عشان يقتل كل الناس اللي عليه لأنهم مش "جوة الأوتوبيس".. وده كان مبني على أساس جملمته المشهورة اللي أذهلت الفارابى في قبره

"قدام فاضي يا حضرات"

أشوف فيك سنة.. مش يوم يا بعيد

الخميس 6:00 PM

تلاحم المواطنين في الأوتوبيس خلق نوع جديد من أشكال الحياة على الكوكب.. ابتديت أشوف لأول مرة جسم برأسين.. وبنى آدم طالعه كيس نيلون من قفاه.. كان لطيف جدا إنى أشوف راجل عجوز برجلين عيل.. إيه ده؟؟؟؟!! دا دايس عليه باين.. يا ضنايا يا ابنى.. ما علينا..

احنا دلوقتى واخدين اتجاهنا بعد كوبرى الجامعة.. رجوعا إلى الجيزة..

حتقولى: يا عم امبابة الناحية الثانية.....!!!!!!

حقولك : مش الأوتوبيس فاضي ولازم نعدى على الجيزة نحمل؟؟؟؟

الخميس 6:30 PM

ميدان الجيزة.. مكانش لسة الدائري اتبنى.. سرعة سير الأوتوبيس.. متر في القرن.. الميدان كله كان مستنى الأوتوبيس تقريبا.. عدد سكان الأوتوبيس تجاوز عدد سكان جيبوتي بحوالى سبعة مليار نسمة.. فيه أخ من اخواتى راح منى خلاص وما بقتش شايفه ولا سامع صوت سريخه اللي كان مستمر لساعات كنوع من أنواع المقاومة.. سلم أمره لله وانسال بين جموع الحجاج.. لحد ما وصل إلى رمي الجمرات حيث يجلس السواق الشيطان..

الخميس 7:00 PM

الجامعة.. طلاب كلية التجارة والحقوق والآداب والجامعة المفتوحة والجامعة المقفولة والجامعة المواربة في انتظار الأوتوبيس.. ماهو لسة "فاضي قدام يا حضرات"..

اخويا الثاني ببحاول يوصل للكمسري عشان يفتك بيه.. إنما جموع الصاعدين بتدهسه في الطريق بلا رحمة..

الخميس 7:30 PM

شارع السودان من بين السرايات.. من عند حدود الكنغو كدة.. باقي سكان المجرة اللي لسة مركبوش الأوتوبيس.. موجودين في الشارع ده في الوقت ده.. الشارع ده ملوش أول.. وملوش آخر..

الناس في الأوتوبيس ابتدت تخش في "غيبوبة سكر" من العرق والحر والتعب.. وما زال هناك بشر بتجري ورا الاوتوبيس مصممة على الركوب أكنها بتجري ورا أكل عيشها.. لآخر لقمة.

الخميس 8:30 PM

الحدود الشرقية لمطار امبابة الدولي.. اللي بينزل عندها كل سكان الكواكب الأخرى اللي راكبين الأوتوبيس استعدادا لركوب سفن الفضاء القابعة في المطار والانطلاق إلى محطات الزهرة وعطارد وأورانوس.. بدأ الأوتوبيس يفضى شوية.. وما بقاش فيه ناس تحت الكراسي.. اللي تحت الكراسي دي جثث قديمة.. مش تبعا.. وبرضو مفيش ناس على الاكصدامات.. دي أشلاء ناس دهسها الأوتوبيس.. كان فيه بس ناس قاعدين فوق الناس اللي قاعدين على الكراسي.. يعني نقدر نقول بتاع مليون أو اثنين على أقصى تقدير..

الخميس 9:30 PM

الوصول إلى خط النهاية.. شارع الوحدة.. ننزل بقى.. الآخر يا جماعة.. يا ريس خلاص كده دا الآخر!!! الناس ما بتتحركش.. يا جدعان.. عودة إلى البرم مرة أخرى.. والفرك أيضا.. والنزول زحفا من على سلالم الأوتوبيس الخلفية.. لأن الوصول إلى المقدمة يعتبر دربا من دروب الخيال.. الوصول إلى الحجر الأسود في الحج أسهل كثير..

الخميس 10:00 PM

واقفين احنا الثلاثة بنحدف الأوتوبيس والسكان الأصليين ليه بالطوب والدبش.. وفي إيدينا شنطة الهدايا اللي جواها لفة الهدايا اللي جواها الدبوب اللي اتحول لعصير دباديب من الهرس..

وبقى شبه القماشة اللي بتشدّها من بق كلب..

الخميس 10:30 PM

- مالكم؟؟ هدمكو مقطعة كده ليه؟؟؟ انتو اتخانقتوا في الشارع؟؟؟

- لا لا خالص.. كل سنة وانتو طيبين.. احنا حنتخانق لسة في البيت أما نروح.. أشوفها بس
أماما.. أشوفها..

#_ولا_تقل_لهما_اف

#الست_دى_لو_ماكنتش_اماما

#رحلة_السندباد_السافلة

#معداش_على_بيونج_يانج_على_فكرة

الاعتراف الخامس والعشرون

زمان أما كنا نحب نازل أنا وصحابي نشترى "بناطيل جينز".. كنا بنفكر ألف مرة قبل اتخاذ القرار ده... مش عشان الفلوس.. ولا عشان المواصلات ولا عشان أي حاجة غير لحظة اتخاذ القرار بدخول الشارع الأشهر في تاريخ المناطيل الجينز.

"شارع الشواربي"

طبعاً.. إنك تقول إنك عاوز بنطلون جينز في شارع الشواربي.. ده أكنك بالظبط أعطيت الإذن للأوباش ببدأ عملية التحرش بيك عن رضا واقتناع تام بأهمية التحرش على نطاق واسع.

آلاف من العاملين في المحلات اللي في الشارع.. والعاملين في المحلات اللي جوة ومش على الشارع.. والعاملين في المحلات اللي في زخانيق الشارع.. والعاملين في حنتت مستحيل تصدق إنها موجودة ورا زخانيق الشارع وبيقولوا عليها محلات.. كلهم..

بيشدوك..

وتفضل من إيد ده.. لإيد ده.. لشدة ده.. لسحبة ده.. لبوسة ده..!!

"انت بتبوس ليه يا ابن ال....."

ما علينا...

وفي النهاية.. فاز بينا الأقوى.. اللي باقي العاملين في الشارع يخافوا يتعرضوا ليه..

اقتادنا أنا وصحابي وراه.. واحنا مساقين كالأنعام.. فكرنا كذا مرة أنا والعيال صحابي
نجري.. بس أكيد حنتمسك.. وحيبهدلونا.. تحس واحنا ماشيين وراه إنه لسة دافع فينا صرة الدنانير
وواخد صك العبودية من سوق النخاسة اللي في أول شارع عماد الدين.. سبايا حرب رسمي..

دايما كنت بتخيل اننا لابسين بناطيل واسعة من تحت.. وفوق عريانيين.. وداهنين اسود..
ومربطوين بسلسلة طويلة طرفها في إيده.. وبنجري وراه..

"يا جدعان احنا جايين نشترى بناطيل.. خافين من إيه؟؟؟ مش عارف"

هو إحساس الخوف من البيع اللي بياخدك معاه من حارة لحارة لحارة.. وانت ماشي وراه..
وفى كلامه طول السكة.. لهجة أمرة قاطعة مش عرضة للنقاش.. إنك حيعجبك قوي البنطلون اللي
حتشتريه.. وتأخده..

حتأخده حتأخده.. البنطلون أقصد.. الموضوع منتهي.. المسألة مسألة وقت مش أكثر

قصة إنك تشوفه عاجبك والا لأ دي.. مش هنا.. دي رفاهية لا تملكها سعادتك في المكان ده..

أما وصلنا للخن.. وده الاسم الرسمي للحنة اللي عرضها مترين.. وارتفاعها مترين..
وعمقها مترين.. وفيها بناطيل مرصصة.. فرجنا على اللي عنده.

وإيشي تركي مستورد.. وإيشي مش عارف إيه.. وماركة إيه.. واحنا بنهز في راسنا في
إعجاب مصطنع.. على أساس اننا بشوف خلاصة محصول الطماطم الصوب الجاهز للتصدير!!!

طبعا هو عارف الحركات القلة دي كويس قوي.. وعارف ان الحركات دي بيتبعها محاولة
هروب الزبون بأى حجة من الحجج.. فبيكون هو له دور ثاني لمحاولة غرسك أكثر وتديبيسك
زيادة..

- اقلع البنطلون

- نعم سعادتك؟؟

- اقلع البنطلووووون بقول

- هاهها شرابات انتو في الشواربى.. شرابات

- اقلع البنطلون وقيس يا أستاذ.. ولو معجباكش بيقى لك الكلام

- لا في الحقيقة أصلي عندي برد في معدتي ومش علوز اتهوى

- بص حضرتك خش في البروفة دي

- بروفة إيه؟؟.. فين دي؟؟

- هو الخن ده بروفة حضرتك!

- أيوة بس مفيش لا باب ولا حاجة تغطى يا ريس والناس رايحة جاية!!!

- بص صحابك حيغطوا عليك.. ومش حيبان منك حاجة.. اقلع بقولللك.

وطبعا بعد محاولات مستميتة للتحجج.. ومقابلتها جميعا بحلول مستحيلة إنما هو دائما
بيخليها حلول منطقية.. اضطريت أخش الخن.. والاتنين صاحبي وقفوا على مدخله جنب بعض
عشان يعملوا ساتر... يا ساتر ياااااااااا رب.

قلعت البنطلون.. وناولته للواد "عمرو" صاحبي حطه على جنب.. ويقول لصاحبي التانى

محمد

- هات ياعم ناولني الزفت التاني عشان أتتيل أقيسه.. الجو برد الله يحرق اليوم اللي قررت
أشتري فيه زفت من هنا.. وكل مرة بنقول كده وبرجع تاني..

جاءت الصرخة التي لم تستوعبها أذني بكل معانيها مدوية هادرة.. من بعيببيد

"بلديييييييييييييييييييييييية"

طبعا.. المشهد تحول في لحظة إلى مشهد دخول البوليس وكر العصابة في فيلم "قلبي

دليلي" ..

المكان تحول إلى ساحة لمسابقات "تلي ماتش" .. إش.. هايظ.. فايظ.. نخخ

- ادينى بنطلون إلهي يستر ك ما يفضحك

- او عى يا أستاذ البلدية خلاص داخله الحارة

- أبوس إبيبيدك.. أستر نفسى.. ادينى بنطلون بدل اللي أخذتوه يا عم

- أخذنا إيه؟؟؟ احنا أخذنا بنطلونك؟؟؟؟

- أومال أنا جاي كده من بيتنا؟؟؟ بمشي عريان من تحت هواية مثلاً؟؟؟ بعالج التسلخات؟؟؟

- طب خد ده استر بيه نفسك لحد ما تعدي البلدية

- يستر عرض أمك.. إلهي يسترها عليك يا خويا

وفي طرفة عين.. كنت لبست البنطلون اللي اداهولي

أي نعم هو كان يلبسني أنا وصحابي الاتنين مع بعض.. بس مش مهم

أي نعم هو كان أطول من شارع الشواربى نفسه وكانت رجلي عند ركب البنطلون
وبجرجره ورايا.. بس برضو مش مهم؟

أي نعم عسكري البلدية قفشني وافتكروني بيعا بهرب بنطلون.. وأنا ظرفته خمسة جنيه كانت
في جيب القميص عشان يسييني.. بس مش مهم..

أى نعم البنطلون كان فيه المحفظة.. والحمد لله أخذتها تاني يوم مع البنطلون.. مع وصلة
سباب من أقذع وأفزع أنواع السباب مني للبيع واللي حواليه من مساعدين ومشتريين والكل كليله..
بس مش مهم.

المهم.. إن دي كانت آخر مرة أشتري فيها بناطيل من شارع الزفت الشواربي..

بصراحة..

باكذب عليكم..

فضلت اشتري منه كل سنة..

الكيف بعيد عنكم.. بيذل

#شارع_الشوارعى

#بناطيل بناطيل نقول لسة

#الخن_للجميع

الاعتراف السادس والعشرون

كمية الاعترافات اللي بيدخل فيها "ابابا" كنجم شباك أول عندي كبيرة جدا.. أحبيبي أبابا الله يرحمك.. كان مجنن البيت كله.. لا.. كان مجنن العمارة..

هى المنطقة عموما اتجننت كلها بسببه..

كان أبابا بيتعامل معانا في البيت زي أي أب حنون بيحب ولاده ويضربهم بالجزم.. كان مصمم يخلينا رجالة تحت أي مسمى وبأي شكل من الاشكال..

وعشان كدة.. كان بيتعمد يحطنا في مواقف يا تخلق رجالة.. يا تدفعنا اننا نرمي روحنا قصاد ميني باص 58 اللي كان بيعدي من قصاد البيت عندنا..

أذكر إنه رحمه الله.. قرر في يوم إني كبرت خلاص.. ولازم بقى أنزل اشتري ليهم الفاكهة في البيت...

طيب.. عادي إيه المشكلة في الكلام ده؟؟؟ ولا حاجة.. ما اشتري.. فيها إيه يعنى؟

شوية بورتقان على يوستفى.. على عنب على جوافة.. على كومترا تلاجة من اللي بتوقع سنان الفيل دي.. ولا فيه أي مشكلة..

لا.. بابا كان له فكر تاني خالص في موضوع الفاكهة ده.. هو قرر إني أنزل أشتريهم "بطيخة"

اداني الفلوس.. أخذتها ورحت افتح باب الشقة وانزل.. فنده عليا بمنتهى الحنية زي ما كان معودنا..

- أفنظم أبابا...!!؟

- ليه أبابا؟؟؟

- آآآآه.. حاضر أبابا

- خطوة دي أبابا.. كويسة.. وأنا حعرف منين يعني؟

- أأمر أبابا.. كلى آذان صاغية..

- والبيع حير قص.. صح؟؟؟

كان له صدى تبقى مش مستوية

- هي البطيخة بتصدى أبابا؟!!!

- صدى صوت يا حيوان..

- آآآه.. طب أبا.. حاطر أفنظم..

- او عى يشوقهالك..!!

- عيب كده أحاج.. ما عاش اللي يمد إيده عليا..

- أنا بقول على البطيخة يا حيوان..

- آآآه.. هاهاها.. شربات أبا.. حاطر.. اطمن

وعنها.. قبل ما يزود في الكلام.. نزلت ورحت السوق مسافة ربع ساعة كنت عند الفكهاني..
وبدخلة مفتش التموين المعروفة دخلت عليه..

- فين البطيخ..؟؟

- ما اهو قدامك يا أستاذ..

- أيوة أيوة.. قصدي مفيش عندك حاجة جوة كويسة؟

- نعم؟؟ البطيخ كله كويس يا أستاذ..

- ممم.. هو كمان بيشكر فيك قوي.. وريني كده واحدة تكون كويسة..

- اتفضل..

أخذت البطيخة من ايده واستلقفتها.. ودورتها في إيدي وأنا يعاينها أكني بدور على حاجة
ضايعة مني فيها.. وهو قعد يبصلي بنظرة معروف طبعا معناها
"انت بتفتي عزيزى الدوق".. أنا طبعا معبرتش.. وبعد ثلاث دقائق.. رجعتله البطيخة..
وقولت له..

- يا عم شفلنا حاجة كويس.. دي شكلها شق زفت..

- اه ان شاء الله.. بس لو طلعت شق زفت؟؟؟

- حضرتك لو طلعت زفت.. هاتلي الزفت وتعالى..

طبعا أخذت البطيخة بعد ما حاسبته وروحت البيت شايلها على قلبي.. وطلعت الخمس ادوار.. ودخلت على بابا.. أكني شايل أكاليل الغار.. أول ما شاف البطيخة..

- إيه دانا يا حيوانااا؟؟!!!!!!

- أكيد مش موز يعني... بطيخة أبابا!! !

- دي بيضة وفاتحة خالص من القشرة.. دي شكلها مش مستوية خالص.. !!!

- أبابا لا طبعا.. بص طيب

"طن طاطا طن طن بوم بوم بوم" صوت طبله الزفة..

- انت عبييط يا شريف؟؟؟؟

- أبابا ركز معايا بس ثواني..

"طن طاطا طن طن بوم بوم بوم" صوت طبله الزفة..

- دي حتطلع شق زفت من جوة يا حيوان..

- اسمها شق لفت أبابا..

- إخرس يا حيوان.. روح رجعها للراجل وهاتلنا واحدة تكون قشرتها غامقة من برة

- أبابا هو قال شقها ولو طلعت وحشة رجعها

- انت بتصدق يا حيوانااا؟؟؟ إجري روح رجعها وهات واحدة تانية زي ما قتلتك

طبعا.. حاملا همومي وتعبي وخمس ادوار نزول ومشوار ربع ساعة مشي وبطيخة 5 كيلو توجهت إلى المأسوف على شبابه الفكهاني.. ودخلت عليه دخلة مفتش التموين اللي قفش عند

الفكهانى عنب "بناتى" فى وضع مخل..

طب أقوله ايه؟؟؟ أقوله ايه؟؟؟

أقولكم..

أقولكم بعدين..

#طن_طاطا_طن_طن_بوم_بوم_بوم

#صوت_طبله_الزفتة

#يا_شربيبيبيبيبيبيبيبيب

#افنظم_ابابا

الاعتراف السابع والعشرون

لكل اللي تابع الاعتراف السابق.. لازم طبعا أكون تركت فيكم التوشيق والإثارة.. بخصوص
حكاية البطيخة اللي كل واحد بيمسكها لازم يتعامل معاها بطريقة
"طن طاطا طن طن بوم بوم بوم" صوت طبلية الزفة..

زي ما قلنا لكم.. دخلت علي الفكهاني دخلة مفتش التموين اللي قفشوا عنده عنب "بناتى" في
وضع مغل

- يعني ينفع كده يعنى؟؟؟

- خير يا أستاذ بس؟؟؟ يادي الصباح الكوبية

- ازاي تديني البطيخة قشرتها فاتحة.. أنا كنت عاوزها قافلة..

- نعم؟؟؟؟!!!

- قصدي غامقة.. قصر..

- طب وده حيفرق في إيه يا بيه بس؟؟؟

- أكيد طبعا من جوة حتكون مش مستوية.. إخص.. وأنا اللي استأمنتك.. !!

- هات يا بيه ثواني كدة..

الراجل خد البطيخة وراح شاقق منها مثلث.. طلعه لونه أحمر غامق لون دم الغزال.. وراح
باصصلى بصة معناها..

"توب علينا يا رب من جنون البقرا"

طبعا أنا اتخرجت.. وبقي وشى احمر من حمار البطيخة..

و قتلته

- هات يا عم هات.. امسحها فيا.. الله يسامحك أبابا

وأخذت البطيخة المشقوقة.. ولطعتها على صدرى أكنى شایل ابني.. طبعا التيشيرت
"الوينر" اتبهذلت وبقيت زي اللي مضروب سكينة في القفص الصدرى.. ومشيت بيها ربع ساعة
مروح تاني.. اتكسحت.. وطلعت خمس ادوار.. زحفت.. ودخلت على بابا زي البت البكر اللي شائلة
جيبته بعد ما اعتدوا عليها.

- إيه ده يا حيواناااااااااااا؟؟؟

- البطيخة أبابا بقى.. البطيخة حلوة.. البطيخة حمرا أبابا.. كفاية ظلم بقى

- الواد اتجنن!!

- ما اتجننتش أهو... شوف.. حمرا دي والا مدية على محموحى..؟؟ ها؟؟

- همممم.. طيب.. دوقها كدة.. يا حيوان

- أهو.. آدي البطيخة.. اهووووووو

وروحت قاطم قطعة من البطيخة.. هوووووب.. مطلعش بطيخ.. طلع بامية حمضانة من
اللي أمي ساعات بتسيبها للصراصير عشان تسمها في الفرن.. إيه القرف ده.. أقوله إيه؟؟ أقوله
إيه؟؟ يا لهو بالي يا اما.. ده حينفخني.. بص.. ملهاش حل يا شريف.. الحقيقة.. ثم الحقيقة.. ثم
الحقيقة...

- حلوة أبابا.. مالها..؟؟؟ سكر.. شهد مكركر

- مکرکر؟؟ حیوان والا مش حیوان؟؟

- فاضي أهو هولاك أبابا.. ارحمني.. أنا غلطان.. شاب أرعن.. حيوان فعلا

- روح رجع البطيخة..

- أبابا أنا أكلت منها خلاص.. اخصمها من مصروفي.. ارحم ضعفي..

- روووح رجع البطيخة.. وهات الفلوس..

- أبابا أنا لو جبت الفلوس دي حتصرف قدهم مرتين مراهم تسلخات عليا.. أنا تعبت

- إمشي يا حيوااااان..

- حاضر أفنظم..

وبعد ثلاث ثواني..

[illegible]

- اناaaaaaaaaaaaaا عم..؟؟

- تروح عند واحد تاني وتتقى بطيخة كويسة بقي.. ما ترجعش من غير بطيخ

- آه طبعا طبعا.. مش فيه بطيخ في القسم؟؟؟

- بتقول ايه يا حيوان...؟؟؟

- لا أبابا.. عيني.. حبيب بطيخة زي ما اتعلمت..

ورفعت البطيخة وبصيت له وضحكته ضحكة الزحلفة اللي في بوقها ذمل ورحت مخبط

على البطيخة

"طن طاطا طن طن بوم بوم بوم" صوت طبلّة الزفة..

- الواد اتجنن!!

وأخذت البطيخة المشقوقة.. ونازل بيها الخمس ادوار.. البواب ابتدى يرفص من الضحك عليا.. ومتجه إلى السوق اللي على أوله قهوة بلدى.. ابتدوا يعلنوا عن عودتي كمان شوية والناس تنزل مشاريب على حس الفرجة اللي حيتفرجوها عليا وأنا شايل البطيخة ورايح جاي بيها زي العمل الرضي..

دخلت على الفكهاني دخلة مفتش التموين اللي مسك كيس سكر بودة ولقى جواه دقيق.. خناقة كبيرة.. ولميت عليه الناس واللي رايح واللي جاي أدوقه من البطيخة.. والستات اللي ساكنة فوق الفكهاني تبعت عيالها اللي راجعة من المدرسة تدوق وتطلع..

وفي النهاية.. انتهى الأمر.. بأنه أخذ قشر البطيخ اللي فضل.. وادانى بطيخة تانية.. ذات مواصفات مطابقة لمواصفات الجودة العالمية.. أخذتها.. رocht البيت.. شقيتها.. "البطيخة طبعاً"..

طلعت سكر.. بجد

أبابا طبعاً.. كان له تعليق شهير ساعتها..

- إانت دليل دامغ على إن الحيوانات ممكن تتعلم..

#طن_طاطا_طن_طن_بوم_بوم_بوم

#صوت_طبلَة_الزفتة

#ماله_ام_البرقوق_مش_فاهم_انا

#بطيخ_مولانا_اقرع

الاعتراف الثامن والعشرون

أنا قدرت أحقق حلم كثير من الشباب في وقت المراهقة

الخروج مع بنات جميلة في الرحلة الثانوية في عز الشتاء.. هيببييه

خروجة جميلة.. في مكان جميل.. مطعم محترم.. بتبقى حاسس في الوقت ده إنك كبير وراسي كده ومتأني.. شعور بيخليك تمشي مشية الفنان أحمد عبدالعزيز في "مين اللي ما يحبش فاطنة".. أما كانت جيهان وشيرين حيولعوا في بواريك بعض عشان يتعرفوا على أونكل شنبو.. إحساس جميل فعلا...

إحساس كمان عالي عالي عالي.. وانت لابس المنطلون البيج الكلاسيك اللي كان منفخ من الوسط.. وضيق من عند الرجلين زي الموضة في بغداد ساعتها.. تحس ان سندباد ماشى في المطعم.. مش ناقصلي غير صديري على اللحم وسيف وفلوكة..

وطبعا بقى.. شوية الشعر اللي تحت المناخير دول اللي لا منهم شنب.. ولا منهم وساخة.. بيحسسوسك انك سمير الاسكندراني أيام الشقاوة..

"نبنننى... نعلالالالال... نه رررررررى"

ويا سلام بقى أما يحصلك زي ما يحصلي.. والولاد الشباب اللي المفروض يكونوا معانا في الخروجة.. كلهم يحصلهم ظروف.. اللي أبوه طلق أمه.. واللي يجيله حصبة على كبر.. نصيب.. فجأة تلاقى نفسك أعزل.. وسط خمس بنات.. يا سلام على أيام الثانوي الجميلة.. كازانوفا الثانوي بنين... كذا نوفا.. مش نوفا واحدة..

تاكلوا.. وتشربوا.. وتتكلموا.. وتهزر انت بقى.. وتستخف دم أهلك.. ومهما كان دمك ثقيل..
يتبقى أوكر.. أوووكر.. شربات انت في وسط البنات دي.. فزيبيع

تستأذن منهم.. بشياكة الفنان محمد الحلو في أغنية القلب حب وتاه.. وتقوم تروح الحمام
تصلح مكياج.. إيه؟؟؟ معرفش هما بيقولوها كدة..

تدخل الحمام.. تقفل الباب بالترباس.. الحمام متر في متر.. حوض صغير جدا.. تواليت
أصغر.. تغسل إيدك.. تمد إيدك عشان تضغط على هبابة الصابون اللي متعلقة في الحيطه..
تروح مخلووعة.. ونازلة مهبودة في الحوض الصغير.. وكل الصابون اللي فيها ناطط في
حجرك!!..

"يا ختالالالالال.. البنطلووون البيج باظ يا ختالالالالال"

اعمل إيه؟؟؟ اعمل إيبيببييه؟؟؟؟

أيوة.. مناديل.. مناديل بسرعة.. فين أم المناديل.. ؟

الالالال.. دا مفيش مناديل... يادي النيلة.. أعمل إيه.؟؟؟ اعمل إيه؟؟؟

أيوة.. طيب أخرج أطلب من الويتر مناديل بسرعة..

تمد إيدك عل ترباس الباب.. تدوره عشان تفتح.. هو بيلف الحمد لله.. بس الباب ما بيפתحش..
تلفه تاني.. يلف معاك حلو قوي... كويس الترباس ده.. بس الباب ما بيפתحش برضه..

"ياختالالالال.. منظورة أم الخروج دي أنا عالاراف"

طب وبعدين؟؟؟ الصابون ابتدى يخش على الوراالالال.. والدنيا ساقعة أساسا.. أجرب الحق
انضفه بشوية مية طيب...

تفتح حنفية الحوض.. وتأخذ بايدك شوية مية.. تمسح الصابون..

كان نفسي بعد انتهاء الموقف أسألهم حقيقي في المحل.. إيه نوع الصابون ده اللي أول ما
المية بنتجي جنبه يعمل رغوة زي الرغوة اللي بتستخدمها قوات الحماية المدنية والمطافى في إنقاذ

المصانع الكيماوية؟!!!!..

حَتَبَقَى فُضِيحَةً فِي الْعَالَمِ أَمَّا أَكُونُ أَوَّلَ وَاحِدٍ فِي التَّارِيخِ يَغْرُقُ فِي الرِّغَاوَى!! فُضِيحَةٌ بِجَلَالِ

إلهي يحرق الصابون على الرغاوي على الحمام المهب.

ابتديت أخطب بقى على الباب من جوة.. زي العيال الصغيرة.. وخلاص.. المنطوف باظ..
الجزمة الشامواه باظت... الغيارات الداخلية بترغى.. بواذر إسهال مريع من الساعة.. الصابون اللي
في الحوض المية نازلة عليه من الحنفية.. الرغبة بتزيد لحد ما طلعت برة الحوض.. نزلت على
الرغبة اللي على الارض اللي من الصابون اللي كان على المنطلون..

كارثة بيئية بكل ما تحمله الكلمة من معاني..

أعصابى باظت.. وابتديت أعيط تقريبا.. وعلى كلمة واحدة بصوت مسرع.. وأنا بخبط
على الباب

"لو سمحت... لو سمحت... لو سمحت"

وهما برة ولا هنا... محبوس بقالي ربع ساعة جوة الحمام.. والبنت برة زمان الشباب البايظ مبهدلها...

یا ختایااااااااااااااااااااااااااااااا

حیقولو علیا ایہ دلوقتی؟؟؟؟ اُخبط علی الباب

"لو سمحت.. لو سمحت.. لو سمحت"

الرغاوي ابتدت تسرح من تحت عقب الباب.. الجزم اللي شغالين في المحل أخيرا أخذوا بالهم.. أما الرغاوى ابتدت تخش على المطبخ.. مشيو وراها.. وصلو لحد الحمام.. اللي عمال أخط على بابيه من جوة.. وأقول بنفس ذات الصوت المسرع

"لو سمحت.. لو سمحت.. لو سمحت"

#يُخرب_بيت_ام_القر

#اومال_لو_كنت_شديت_السيفون

#رغاوى_القهاوى

الاعتراف التاسع والعشرون

العجلة.. صديقة كل إنسان في الدنيا.. أعتقد إن أغلب البشر ركبوا عجل.. سواء ولاد أو بنات.. حكاياتنا مع العجل كلها جميلة ولذيذة وتضحك..

أنا بقى حكايتي مع العجلة كانت تراجيدي على ساسبنس على شوية رعب على ميلودراما..

أخذنى "ابابا" الله يرحمه.. عند أبو الجوخ.. بمناسبة المجموع الكبير في الابتدائية.. وجابلي العجلة "الصفرا في الحمرا" البى إم إكس الرهيبة..

العجلة اللي كل ما كنت أركبها.. أحس إن البنات مستعدة تحدف نفسها تحت الجنزير بتاع العجلة علشان تنال نظرة من عيوني الحولاناتين في هيام..

العجلة غيرت شخصيتي تماما.. مع مرور الوقت.. تحولت شخصيتي إلى الدكتور محمد عبدالوهاب راكب عجلة.. ابتديت أغني.. ابتديت أبطل معاكسات.. وأعاكس ليه؟.. هما البنات بيعاكسوني... أو أنا اللي كان بيتهيايلى إن جريهم من قصاد العجلة قبل ما اهرسهم يعتبر نوع من أنواع امعاكسة.. بطلو بقى..!

ماكنتش بروح في مكان إلا بالعجلة.. المكانين الوحيدين اللي ماكنتش باخد فيهم العجلة هما التواليت والسريير.. غير كدة.. كنا توأم ملتصق..

وكان "أبابا" في الرايحة والجاية ذالل أبداني طبعاً..

- يا شربيبيبيبيبيبيبيبيبيب

- أفنظم أبابا؟؟؟

- أخبار العجلة إيه يا حيوان؟؟

- بتبوس إيدىك أبابا

- طيب خللي بالك عليها

- فى عونيا يا أونكل

- اخرس يا حيوان

- حاضر أبابا

بعد مرور أسبوع من شراء العجلة.. أيوة أسبوع واحد حصل فيه كل التغيرات دي.. بعد الأسبوع ده... اتسرقت العجلة!!! !!

لا تسألني من أنا.. محدش يسألني اتسرقت ازاي وفين وليه.. ركنتها.. دخلت أشتري بيبس.. خرجت بعد أقل من خمس ثواني.. ملقتهاش.. بس كدة..

اتسرقت العجلة يا ختاناااااااااااااااااااي

لطم.. لطم.. لطم.. لطم.. لطم.. لطم.. لطم..

یا ختاای.. یا ختاای.. یا ختاای.. یا ختاای..

بلا توقف..

أنا مكنتش بالطم أو بسرخ على العجلة.. أنا كنت بالطم وبسرخ على اللي حيعمله أبابا فيا..

سرحت بخیالی لمشاهد من فیلم فجر الإسلام والشیماء وكل أفلام السادة الأفاضل سكان
"قریش سیتی"...

الجلد بالحزام حبيقى للركب.. يحيط مكان الحجر البوتا جاز على بطني.. حيدفني في قصرية
الزرع اللي في البلكونة.. حيعلقتي في الدش..

- لا دا أنا غيرتها أبا.. روست العجلة.. هاهاها.. شربات أبا.. شربات..

- غريبة!!! مش يا ابني الكرسي دة كان أحمر؟؟؟

مالك؟! آه والنبي.. تصدق!! ! وبعدین مكانش عريض كده فعلا..!!

- ايه؟؟؟؟!!!!

- لا يا أبابا أحبيبي.. دا أنا غيرته عشان كان تاعبنى فى القاعدة

- طيب.. غريبة!! مش عارف ليه حاسس ان العجلة صغرت!!!

- إنت عارف بقى أبابا.. الغلية بتخلي الحاجة تكش.. هاهاهاهاها.. شربات أبابا.. شربااات

- إخرس يا حيوان.. أنا طالع البيت.. ورايا عطلول.. وكفاية لعب بالعجلة..

- حاضر أُنظّم..

و توجه "أبابا" إلى الشقة.. وأنا ركنت العجلة في الجراش.. وطلعت وراه بعد ما صليت ركعتين شكر إنها عدت عليه.. وإنني ممكن اعيش لحد ما اعمل مصيبة تانية.. الحمد والشكر لك ياااااااااا رب.

دخلت الشقة.. لقيت بابا قاعد في الصالون.. مع خالي الثاني.. اللي عرف من خالي الأولاني موضوع سرقة العجلة.. وراح لف على محلات العجل.. لحد ما لقي العجلة اللي الحرامي باعها في محل من المحلات.. واتصرف وجابها وجه وقاعد بيها في الصالون.. مع "أبأبا".. اللي بصلي وقاللي في منتهي الهدوء..

"كشت العجلة.. هاه؟؟؟ أصبر.. أصبر"

للأسف.. ملحقتهش أودع أهلى

یا ختاللی

الاعتراف الثلاثون

ماما خافت عليا جدا وأنا في سن الطفولة.. من الأمراض اللي طول النهار في التلفزيون بياكدوا إنها حتجيلك حتجيلك مهما حاولت تستخبي منها.. زي شلل الأطفال والسعال الديكي والثلاثي..

ما يعرفوش إن الأمراض دي بتحاول الهرب من البلد بأي طريقة.. إنما للأسف مفيش دول راضية تستقبلها

أماما طبعاً.. كانت بتخاف عليا أنا واخواتي جداً.. فسحبتنا زي ما الناس بتسحب الخرفان الحرنانة يوم الدبيح الصبح.. وتلاقي الخروف قاعد على قرافيصه ومسحوب من قرونيه ولسانه مدلدل برة بقة حالفا مقسماً مليون كعبة ما هو رايح معاكم في حطة..

إنما على مين.. أماما كانت مصممة تاخذنا.. وتطعمنا.. التطعيم إياه ده اللي بيستخدموا فيه إبر من بتاعة العصر الجوراسيكي.. اللي بيسيب دايماً فتحة غويطة في مكان ما بتاخذها.. بتستخدمها انت بقى باقي حياتك بعد كده في حاجات كتير.. تشيل فيها فلوس.. تخبي منديل.. تحوش.. كده يعني..

وصولنا للمستوصف.. كان بداية مرحلة جديدة من مراحل محاولات الهروب الجماعي.. لأن رؤية المذابح وضحايا القصف الصاروخي على المستوصف اللي خارجة من بابيه ومعظمهم فاقد الإحساس للطرف اللي اتطعم فيه.. أو فاقد الطرف نفسه تقريبا مش متأكد.. وفي حالة إعياء تام كانت كفيلة بتحطيم قلوب أقسى الرجال.. فما بالك بمجموعة معيز مرعوبة في الأساس.. !!

ومن ورايا كانوا اخواتي بيرددوا في صوت أكثر وضوحا مع ريثم إيقاع اللطم على الوش..

التعريف بالكاتب

شريف اسعد من مواليد القاهرة 1976

حاصل على بكالوريوس التجارة من جامعة القاهرة عام 1998 - دور
نوفمبر "ناجح بالعافية"

عضو مجلس إدارة جريدة المواطن الإلكترونية

كاتب حر في عدد من المواقع والصحف مثل:

- موقع "المواطن"

- موقع "الجريدة"

- موقع "شبكة أخبار مصر"

- موقع «البديل»

- جريدة «الوعي العربي» الورقية

مدير إدارة التخطيط والمتابعة بإحدى شركات المشروعات الصناعية
الكبرى.

مؤسس «التيار الكوميدي».

للتواصل مع الكاتب

<https://www.facebook.com/sherif.asaad1>

المحتويات

7	مقدمة
9	تقديم
11	الاعتراف الأول
17	الاعتراف الثاني
23	الاعتراف الثالث
31	الاعتراف الرابع
37	الاعتراف الخامس
41	الاعتراف السادس
49	الاعتراف السابع
55	الاعتراف الثامن
63	الاعتراف التاسع
69	

	الاعتراف العاشر
77	الاعتراف الحادي عشر
85	الاعتراف الثاني عشر
95	الاعتراف الثالث عشر
105	الاعتراف الرابع عشر
115	الاعتراف الخامس عشر
121	الاعتراف السادس عشر
131	الاعتراف السابع عشر
141	الاعتراف الثامن عشر
153	الاعتراف التاسع عشر
159	الاعتراف العشرون
167	الاعتراف الحادي والعشرون
173	الاعتراف الثاني والعشرون
179	الاعتراف الثالث والعشرون
187	الاعتراف الرابع والعشرون
195	الاعتراف الخامس والعشرون

203	الاعتراف السادس والعشرون
211	الاعتراف السابع والعشرون
217	الاعتراف الثامن والعشرون
223	الاعتراف التاسع والعشرون
231	الاعتراف الثلاثون
237	التعريف بالكاتب



دار توياء للنشر والتوزيع